

ПЕТО 1926 ВОСЯНЬ

ЛЭДЗЁНЫ: КОМИ РЕСПУБЛИКАСА ГИЖЫСЬ КОТЫР, ПЕЧАТЬ ДА ЮОР
СЕТАН КОМИ РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТÖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

4

КОС МУ (АПРЕЛЬ)

2010

ТАЙÖ НОМЕРЫН:

Надежда ПАВЛОВА. Морт тайö шудсö, югыдсö оз кусöд...	
Кывбуръяс	3
Владимир ТИМИН. Биармиаса викинг. Роман	6
Надежда ВОКУЕВА. Менам радлунöй. Кывбуръяс	22
Мария ОСТАПОВА. Горький. Висьт	26
Михаил ЛАДАНОВ. Ёля тыын. Висьт	35

ВЕЛИКÖЙ ПОВЕДАЛЫ 65 ВО ТЫРИГКЕЖЛÖ

Алексей ВУРДОВ. Вунлытöм тшупöдъяс. Висьт	43
Евдокия ЛОДЫГИНА. Сьöкыд нэм	55
Александр ЩАНОВ. Салдатлы письмö	71

ВУДЖÖДÖМЪЯС

Ульфат БАДРЕТДИНОВ. Сюзь. Висьт	73
---------------------------------------	----

Обложка вылын снимокыс Фёдор Макаровлөн.

© «Войвыв кодзув» («Северная звезда»), 2010 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



РЕДАКЦИОННАЯ КОЛЛЕГИЯ:

Главный редактор

ЕЛЬКИН М.А.

Зам. гл. редактора

КОЗЛОВ Е.В.

Ответственный
секретарь

ПОЛУГРУДОВ А.В.

ЛИМЕРОВА В.А.

ТИМИН В.В.

УЛЬЯНОВ А.В.





«Морт тайö шудсö, югыдсö оз кусöд...»

Атьö, батьö

Муса папук, вынöй-бордöй,
Эг тай эшты воны гортö.
Кора прöща, эн жö дивит,
Со тай кутшöм путьтöм нылыд.
Он жö-й эськö некор вунлöй,
Гортлань бергöдö пыр думöй.
Сэтчö, быдтыны көн сетис,
Енмыс тiянлы поэтöс.
Лов бордйöдан гажаинö,
Чужан позйö, тiян дiнö.
Йöрми тай со öтдор карас,
Да öд мый нö сэсся каран.
Абу жö нин вывтi тэрыб,
Вын он апнит, удж он бöрыньт.
Сöмын кад пыр том да перыд,
Тöv ни гожöм тай оз пöрысьт.
Вайис миянсьыным тулыс,
Быд чир сылö шондi улас.
Ме тшöтш сывтöм сылан, батьö,
Ыста тэныд, нимыс «Атьö».
Гажа тулыслысь сэн кора
Вын тэн эбös, висьöм шорөн
Бузгöдас мед Эжва дорö,
Томмöдлас мед гажа горыс!
Бать, ог сетчö на, сё морö!
Уна сылан на тэн сыла,
Унаысь на гортöдз вола,
Топöдчыла морös дорад,
Бать, эн сетчы, Енмөн кора.

Чойлы

Муса чойё, дона мортёй,
Вола тэ дінё, кыз гортё.
Чужан лунсянь видзан, лыдды,
Өнөдз менё мод мам пыдди.
Веськыд сёрнинад, стрёглуннад
Пальөдлывлан ковтём унмысь.
Видзан омольсьыс и шогсьыс,
Сы вёсна эг вош, эг торксьы.
Мыла кывнад сьёлём шонтан,
Майбыр тіпкё, оз на-й ёнты.
Мый и кевмыны тэн, энлы...
Медым видзас Ыджыд Енмыс,
Медым став, код тэкөд орчча
Шаньён лоасны и водзё.
Пөртны могъяс вын мед судзяс,
Этшаджык мед шедлас мудзыс.
Шогыс бокиті мед шлапкё,
Шудыс коръя лым моз сапкё,
Киссьё вывсянь Енлөн соддзысь
Сөстём муслун мед и водзё.
Муса чойё, дона мортёй,
Сьёлём мавтысь выя бордёй,
Чужан лунён, важ выль воён,
Кыпыд гажён, няньён-солён!

* * *

Көть мыйтаысь вежөр
Быд бурсё оз вөзйыв,
Он гижышт на сійёс,
Мый йылысь зэв көсьян.
Мый сьөлөмад олө
Тай сійёс и сылам,
Сэн абу кө радлун,
Он некодөс ылөд.
А шогыс мед сывлас,
Ме ньөжйөник сывла
Нор сыланкыв аслым,
Мед некод эз кывлы.

* * *

Муса-й коркё звөнитлас да юалас:
Кык недельнас гажтөмтчин көть эн?
Лөньом шудөс пыдіджыка гуала:
Шуа «да» кө, кокни лоө мен?
Сёрни помассяс. А сьёлём горөдас:
Гажтөм меным! Муса мортёй, лок!
Вежөр суйсьылас да лов шы орөдас:
Өні гажтөм на, а лоө шог.

* * *

Бöрдис ичöт сьöлöм, бöрдис,
Кывбуралысьö тадз пöртис.
Бöрдис öтка сьöлöм, бöрдис,
Муслун корсьны йöзö вöтлис.
Бöрдö шуда сьöлöм, бöрдö.
Мыйла? Коді сійöс тöдö.

* * *

Станислав пилы.

Збыль, чужанінным миян — ангел борд ув,
Со тэ и гортын, пиук, со и гортын!
Кузь туйяс бöрад нюжöдчыв да ойбырт,
Мед сывдас мудзтö челядь ун, кызд войдöр.

Ме чöла пукалышта дінад, бурöй,
И казья быдтысьöм, но, шабді юрöй,
Ог важ моз чорзьöм кималасöс инмöд,
Но шыльöда быд си мам сьöлöм, синмөн.

Дай мусаыдлөн кийс мамлөн серти
И небыдджык, и меліджык. Узь. Бöрти
Ми кыкөн казьям, коді коли вöтөн,
Он вочав кодöс, он нин коль ни вöтöд.

Со тэ и быдмин, пиук, ыджыд, ён и...
Тэ верстьö морт, а ме со дзикöдз дзорми,
А олöмын, мам сьöлöм шöрын — радыс!
Тэ — менам томлун, мед кө мунö кадыс.

* * *

Лöнис, ори сьылан гөлöс.
Эз вош, пыртчис югыд чöлас.
Воас кад, да кодкö кылам,
Ловъя чöвсьыс сьылан кыам.
Со нин ачым, кодкö мөд-ö
Тöдса туйяс дженявмөдö
Сьылігтыръя. Ен ськөдөн.
Олöм кытш тадз гөгöртöдам,
Кытысь петлім, сэтчань мöдам.
Туй пом абу. Ме öд тöда.
Асылын и рытын кыа
Сійöс пасйöдлö да кыö
Зарни шöртысь, ас ки помысь
Туй ни сьылан мед эз помась.

❖ ❖ ❖



Биармиаса викинг*

Р О М А Н

Тэ эськё көсйин лоны викингөн?..

Оти рытö, кор кымөръяс дорвыв вевттисны енэжсö, лыбис төв ныр, мөдiсны быглясьныгырысь гыяс. Бьярма буретш ноксьö вöли посни уджъясөн чери кыян пыжныс дорын. Ваöдыс ылынкодъ, но сола ваа бусыс воöдчыліс пыжöдыс, төв нырыс зіліс Бьярмаос кок йывсьыс уськөдны. Лои содтöд зэлöдны пыж ку-тан гезъяссö да пырны керкаö. Ассьыс керкасö Хеймдалль скальд лöсьöдöма неыджыд куръя помын, тшöтшкөсінын, кытчö тöлыс озджык веськав. Резыштiсгырысь войта көдзыд зэр.

Кадыс вöли рытланьыс нин. Керка пыткас лөнъ, рөмдiс. Бьярма кималасөн корсис да аддзис бердпöлөнса паськыд лабичысь, аслас узылан куяс костысь, ичöтик сепыс, көнi видзö биа из да бива көрт, гольс-гольс кучкалыштiс бива көртнас биа изйö, öзтiс вöсньыдик сямöдтор, а сэсся бисö вуджöдiс сарта-сö... Керкаас вöли ыджыд сись, но сійöс öзтыліс ачыс Хеймдалль скальд... А сійö буретш и пукаліс чöла паныда пельöсас. Көнкö удитöма нин көтасьнысö. Сыöдз удитöма пырнысö.

Бьярма эз лысьт торкны пуксьöм чöвлунсö. Велалiс таö. Скальд мөвпалiс мыйкö ассьыс.

Сэсся кутiс шыасьны быттьö аслыс:

— ...Воöма Скандинавияö драккар, Англияысь, Эссекс королевствоысь. Воисны доймалöмаяс Лондиний кар вöсна тышын. Усьöмаяссö босьтiс ас ордас саридз пытшса Ньёрд ен. Ветлісны корсьны аслыныс бур олөм. А көн сійö, бур олөмыс? Öтилы кө чуктас бурыс, мөдлы сыысь артмö лёк. Нэмөвöйся олөмыс — ыджыд төв ныр, кодöскö кок йывсьыс уськөдас, кодöскö збой-мөдас. А водзö мый?..

**Вокъяс кутасны
Тышкасьны ёрта-ёртыскöд,**

* Заводитчöмыс колян номерын.

матыса рөдвуж
косясын усясны.
Сьёкыд мирас
вөвлытөм кырсалөм,
шыпуртъяслөн да черъяслөн нэм.
Чегасны шыпуртъяс.
Бушковъяслөн да кёинъяслөн нэм лоё
олөмыслөн кусөмөдз.
Морт мортөс пыдди пуктыны
оз кут...

Мый вөчны? Быд мортын оло став мортвужыс, сылөн уна сюрс вояс чөжся выломнас. Мортлөн лолыс дзебё ас пыткас помтөм-дортөм оломсё. А мый эм оломыс? Арфалөн шыяс воөдчöны мөдаръяугыд мирөдз. Да, да, Бьярма! Тэ гөгөрвоан?

— Ме кывза тэнö, Хеймдалль бурай.

— Ме кыла став куломаяссö да чужтөмъяссö на. Найö ставныс талун олоны. Найö ми пытшкынөсь, Бьярма. Сидзкө, ми оламöй огö сөмын ассыным оломнымöс, но и налысь, кодъяс олісны миянөдз да кутасны овны миян бöрын. Гөгөрвоан?

— Ме кывза...

— Помасьлытөм кадас пырö и тайö звукуыс, кор ми тэкөд öнi сёрнитам. Öд быд морт — тэ, ме — ичөтик, но колана юкөн енъяугыдыслөн. Кывзан, Бьярма?

— Ме кывза, Хеймдалль бурай...

— Нинөм оз вош муыугыдас. Кувсис морт, но эз вошты йитөдсö муыскöд, сынöдыскöд. Лолыс сылөн сөльнитчас ставыскöд, мый эм и пыр лоас... Тадзи, биармиаса зон!

Öтчыд, Гримсон Көрт Нырлөн кутшөмкө могъясөн пыралөм бöрын, кор олома викинг, чотөмөн, петіс нин ывлаö, Хеймдалль скальд виччысьтөг юалис:

— Тэ эськө көсийин лоны викингөн?

— Ме?— чуймис Бьярма.

— Да. Мөд туй бөр воөдчыны Биармиаад тэнад абү. А викингъяскöд воөдчыны позьö. Сэтчö век кодкө да мунö.

— Ас му выlö шыпуртөн?

— Абү став викингыс öткодь.

— Найö разалоны асланыс драккаръясөн мир пасьталаыс и кытчö воасны, пыр жö босьтöны кианыс шыпуртъяс, медым вины, мырддыны...

— Тіян став енмыс бур?

— Эм ен, но эм и омоль.

— Аддзан со: оломыс — сійö помасьлытөм тыш бурыслөн лөкыскöд. Сэтысь и чужис ставыс, мый ми öнi аддзам. А сэсся öд и колö на кужны вөдитчыны шыпуртнас. Ме эска, воас кад, кор Биармиа оз кут повны викингъясысь. Енъяс матыстасны миянös. Ло медводдзаяс лыдын бур вöсна тышын. Вензян кадыс коркө помассяс. Кутам велөдчыны лөсявны.

Вөвъяс видзанинын Бьярма идрасис. Медся дыр бергаліс Төвныр вөв гөгөр. Сылы тайö вөлыс медводдза лунсяныыс кутіс кажитчыны, мывкыд вөв. Велөдтөм на вөлөма. Некымын лун орччөн котралісны. Орснас ворсіс, но öтчыдысь весиг эз кучкывлы. Шойччисны орччөн жö, Бьярма вердліс ки помсыс няньөн, варовитіс вөлыскöд, вочасөн сибөдчис, и кор медводдзаөн пуксис

сы былө, вөв сөмын өтчыд и пыркнитіс мышнас, эз уськөд дом-повод кутысь мортөс. Мича, весиг тшап воськолөн мөдіс новлөдыны сійөс. Некутшөм орс вөвъяс дорын Бьярма киас эз босытлы. Эз на вунөд Бельверклысь орссө, сылысь көрсө, быд кучкөмөн улө уськөдөмсө. Асланьөдліс сёрнинас. Меліаліс. Сыналіс сылысь бурысьсө. Вомгорулас сьылөмөн весаліс вөв видзан йөрсө, и пыр вөлі сьлөн дзим-дзурк. Гримсон Көрт Ныр былө донъяліс Бьярмалысь уджсө.

— Тэ, видзөда ме, прамөй викинг.

И Бьярмалы дум вылас уси Хеймдалль скальдлөн викингъяс йылысь сёрниыс. Төвныр вөлөс помтөг сыналігмоз юаліс орччөн уджалысь Гримсон Көрт Нырлысь:

— А кыдзи лоны викингөн, бурө пуктана Гримсон Көрт Ныр?

Пөрысьмөм, доймавлөм уна лыда тышъясын викинг чөвтис ассьыс уджсө — виддаліс вөвъяскөд вөдитчан көлуй, мыйсюрө торйөдаліс дзоньталөм былө.

— Збылысь кө, тайө абу кокни, а көсьян кө, воон кымын велөда. Викинг али абу тэ — лоө тыдалана медводдза тышын. Быдөнлөн оз на и артмы...

— Быдса во велөдчыны?!

— Мөвпышт ачыл: шенасьны шыпуртөн, дерт, бура колө кужны, сытөг некыдз, но сөмын та серти викингөн асьтө лыдыны — тайө вывтіасьөм. Сэк тэ некутшөм на абу викинг.

— А мый колө?

— Прамөй викингөс Один ен лыддьө муыввса аслас лолөн, төждысьө да кывкутө сы вөсна. Некор оз эновт. Весиг тышын усьөм бөрын. Гөгөрвоин?

— Да.

— Медым лэдзисны викингъяс котырө, колө лоны ен дор вир-йинад, ловнад и сьөлөмнад. Тайө, өти-кө.

Мөд-кө, шыпуртөн, черөн да став мукөдторнас кужөмөн вөдитчөмысь кындзи, колө, шуам, кужөмөн да стөча чөвтни өтпырйө кык шы, либө кык чер.

Коймөд-кө, кужны көдзыд ваө сунны да варччыны тэо лэдзөм ньөвъясысь дорйысян сайөдчанөн.

Нельөд-кө, лоны пелькөн,— кужны перйыны ёсь жель көмтөм коксыд, воськовъястө надзмөдтөг.

Витөд-кө, чеччыштны тэнад юр весыт вылна пу ув вомөн...

— Сы мында колө кужны?— дивуйтчис Бьярма.

— Тайө абу на ставыс. Квайтөд-кө, котралан өдөн, надзмөдчытөг, вуджны пидзөс судта пу ув уліті.

Сизимөд-кө, Бьярма, кужны дас кык ног гижны кывбуръяс, юрвизь помъясыс мед өтмоза шыалісны. Вылын поэзиясө ёна радейтө Один ен.

— И тэд лои лөсьөдавны кывбуръяс? Тайөс өд вөчны вермас сөмын скальд, но найө этшаөнджыкось викингъяс дорысь.

— И меным лои лөсьөдны кывбуръяс. Тайө менам артмис медбөрын, кор нин шыпурт помысь чергысис йөз муысь эз этша морт. Томдырийыд артмис кокниджыка, өні та йылысь и мөвпыштны ог лысыт. Кывбур лөсьөдан удж абу быдөнлы.

— Ставсө кө вөчан, сэсся мый?

— Викинг котырса ыджыдыс чукөртас кутшөмкө тыш бөрын викингъясөс, сувтас тэкөд орччөн, кучкас шыпурт дорнас пель-

помад да гораа юёртас: «Тэ кулін! Тэ абу нин! Но — чужис викинг!» Вермас виль ним сетны, сы серти, кыдз тэ асьтö ку-тан тышгъясын.

— Тэнад — сетом ним?

— Сетом ним, көрт юркыш серти, ныр видзаныс кузь да паськыд вöлі. Уна шыпурт ныжмөдіс, кор чужом кузя лөсийсны. Видзис менö. А ме ярмылі да венлі. Мөд ногон эськө и сёрниным миян тэкөд эз ло.

— Абу кокни лоны викингон, бурö пуктана Гримсон Көрт Ныр,— Бярма казяліс, мый тадзи нимтöмыс кажитчөджык олома викинглы.

— Абу кокни, сөглас. Но ми тэкөд заводитам медся кокныды-сянныс — кужны шыпуртон вөдитчыны, медем вермин дорйыс-ны өтнадөн некымын мортлы паныд. Ме дорö шыасьліс нин та кузя миян Хеймдалль скальд. Сылөн эмось зэв бур шыпуртьяс викингъяссянь козингъяс. Наон вөдитчисны усьом том викингъяс. Кужомон кутан вөдитчыны, скальд козыналас өтиос тэныд. Медся шудасө. Тайос тэд ковмас төдмавны асльд. Скальд тэнö пыдди пуктö. Лооны и шыяс.

— Шыяс? Тырмас и өти.

— Оз. Кык шы өтнадыдлы.

— Шынас ме кужа вөдитчыны...

— Он. Но велалан. Лооны и арбалетгъяс. Ньөввужгъяс серти наысь позьö веськавны ылөджык.

— Ме нином на эг вöч бурсö скальдды.

— Ог төд. Шуи тай, сійö тэнö пуктö пыдди. Скальдлөн сингъяс судзöны арбалетгъяс дорысь ылөджык на. Со тадз, биармиаса зон.

Ингридкөд окыштчөм

Коли нөшта во кык. Бярма лои дзик нин верстьö мортон. Быдсяма уджсö бертіс-вөчис, и өттшөтш викингө велөдчис Гримсон Көрт Ныр веськөдлом улын. Олома викинг велөдіс и вөв вылын бура ветлыны, и тышö пырны верзьөмон, но өлөдіс: тышö пыригон викингъяс пырджык домавлөны вөвгъяссö и тышкасьоны ас кок йылын. Тадзи велалөмаось.

Өти лунö, Бергнаар Ньөжмыд Ки конунг дорö ветлом бöрын, Хеймдалль скальд корис ас дорас Бярмаос.

— Колö ветлыны Бельверк дорö, орча фермаö. Сысянь тэ заводитін төдмавны Фрейя дінымос. Эн на вунөд? Бергнаар Ньөжмыд Ки конунг ыстö пось чолөм да — скальд видзөдліс ас гөгöрыс — ыстö со тайö топыда гартлом гижөдсö. Бельверк вермас быдмыны ыджыд мортөдз, мед и арлыда нин.

— Кывза тэнö, Хеймдалль бурай. Кор ветлыны? Тайö өд абу ылын. Тади поннымкөд ми өдйö ветлам.

— Оз ков Тадикөд. Нинөмла. Тэ ветлан вөлөн, мед матын кө. Босътлы Төвныр вөвтö, ськөд ті медся бура лөсяланныд. Пыранін весьтас горөд — тэ öні абу кесгьялысь сылөн. Сэсся ачыс төдас, мый вöчны. Петас да. Ветлы аски асывнас.

Бярмалы и сідз окота вöлі ветлыны Бельверк овмөсö, видзөдлыны кыдзи-мый, и аддзысьлыны бур өрт Сноррикөд. Кольом

вояс чөжыс найо гоз-мөдыс сөмын и аддзысьлісны, ю отар-мөдарсянь чолөмалісны ота-мөднысө. Сноррилы оз вөлі позь весиг недыр кежлө эновтлыны Бельверклыс овмөссө, а Бьярма-ос эз кыскы мунны сэтчө виччысьтөг да кортөг...

Мөд асывнас Бьярма верзьомөн мөдөдчис Бельверклөн ов-мөсө. Лои кытшовтны, көні вөлі ю вомөн нейджыд пос. Воөдчис. Бельверк паськөдчөма, некымын керка содөма, и пыж видзан-інкөд орччөн мөд татшөм жө кыптөма. Дівывса овмөсьясын олысьяс оз ёна волысьны ота-мөд дораныс, быдөн аслас төждья-сөн оло. «Эдвин Ён Килөн козиньясыс — зарни да эзыс — отсалісны паськөдчыны Бельверклы»,— мөвпыштис Бьярма.

Сійос казялісны, керкасыс петіс ачыс, Бельверк. Чолөмасисны.

— А тэнө он и төд, Бьярма, лоөмыд верстьө мортөн. И веж-сьөмыд. Кутан асьтө викинг моз.

«Дерт,— бара мөвпыштис Бьярма.— Öні тэ он нин чолөмав орснад».

Чечыштис вөв вывсьяс, мыччис Бельверклы топыда гартлөм гижөдсө Бергнаар Ньөжмыд Ки конунгсянь.

— Хеймдалль скальд, сійө вайис конунгсянь гижөдсө, шуис, мый сэсся асьныд сёрнитчаннуд. Менам мог лои пөртөма оломө, позьө мөдөдчыны бөр.

— Нөрөвитлы неуна, зон. Пырала да видзөдла гижөдсө, гашкө и, скальдлы мыйкө висьталантор лоө. Эн тэрмась.

И пырис керкаас.

Аддзысисны Сноррикөд. Кутлісны ота-мөднысө. Снорри абу нин кесйөг Бельверклөн, сійө öні Бельверклөн видзыс котырын. «Көсья кө, весиг гөтрасьны верма, сөмын водз на. Виччысь-лам»,— важ моз кокниа серөктіс Снорри. А со и Локи...

— О-о!— нюжөдыштис матысмьс Локи.— Тэ, Бьярма, весь-кыда шуа — викинг. Но тэ и водзті вөлін збой. А öні...

Локи чолөмасис Бьярмакөд, но видзөдіс сы вылө век на быт-тьө вылісянь. Юөртис, мый сійө дружинаас жө Бельверклөн.

— Тані унатор вежсьөма,— мынтөдчана вочавидзис Бьярма.

— Тэнө оз на кыскы франкьяс му вылө? Сэні пө зарниыс уна чукөрмөма. А мича нылыс... Ставсө вунөдан на дінын.

— Эз-ө мый Англиялань сетчы Бельверклөн пиыс, Эдвин Ён Ки?— юаліс Бьярма.

— Э-э!— шеныштис кинас Локи.— Викингьяс Лондиний кар-сө пуркөшитісны да сотісны. Нинөм нин сэн вөчнысө, биармиаса зон. Викингьясөс öні кыскөны Париж, Рим... А вөлыд тэнад — ого — и конунглы эз эськө вөв яндзим татшөм вылас красуйт-чыны. Да мый конунглы, корольы!

И быттьө нинөм лөкыс на костын эз вөвлы. Но Бьярмалөн став сөнъясыс эзлавлісны. «Вирнаным огө лөсялөй»,— юрас воис сылы.— Вермам на тангысьлыны...

Керкаыс петісны кыкөн: Бельверк да сьлөн Ингрид нылыс. Бельверк кыпыда нюмъяліс, Ингрид, мөдарө, жугыль чужөма. Ингрид, дерт, мича ань лоөма. Но мыйкө торксьөма ая-ныла костын.

— Аттьөав Хеймдалль скальдөс!— горөдіс Бельверк, да сідз, мед ставыс гөгөр кылісны.— А Бергнаар Ньөжмыд Ки конунгкөд ме, дерт, йитчыла,— кутліс Ингрид нывсө да пырис бөр керкаас, кисө кинас ниртөмөн. Некод вылө сэсся эз видзөдлы.

Бьярма сиис став бурсё Сноррилы, Локилы, Ингридлы. Сёліс вёв вылас. Вёрзис аслас онъя гортланыс.

Вёв окотапырысь кокниа вёрзис. Бьярма мёвпаліс ассъыс. Кутшом лоо олан туйыс Сноррилон, Локилон, аслас? Ингрид, Бельверклон нылыс, шаньмёма, воёдчёма сэтшом арлыдодз, весиг видзоднысё сы выло любө.

Бьярма воёдчис пос дорөдз. Вуджтөдзыс на кыліс бёрсьыс вёв кок шыяс, бергөдчыліс — сійөс суөдіс буретш Ингрид. Айыс мыйкө вунөдёма висьтавын Хеймдалль скальдлы? Орччөнасисны. Ингрид чеччыштіс вёв вывсьыс. Бьярма чеччис жө, домповодсө киас кутөмон, матыстчис ныв дорө. Чөла видзөдісны өта-мөд выланыс.

— А тэ бура сөвмөмыд, биармиаса зон,— медводз шыасис Ингрид.— Ёнмөмыд. Меным жаль, мый мунін миянысь. Унаысь мөвпыштлі тэ йылысь. Тан кө олін эськө... Тан кө олін...

Ингрид матыстчис зон дорө и вочасөн лои дзик нин матын. Бьярма кутіс кывны ловшысө.

— Тіян ыджыд овмөс. Уна лоо төждысьны,— тайөс и вермис шуны Бьярма.

Ингридлөн гырысь лөз синъясыс сотыштісны сійөс.

— Арлыдаджык эськө вөлін кө,— пось ловшыясыс вочаасисны,— окышт менө...

Тайө лои дзик виччысьтөг.

— Ме өд...

— Тэ өні вольной морт. Вөчан, мый көсьян.

Топөдіс ас бердас Бьярмаөс, и зон чепөсийс нывлань. Вом доръясныс өтлаасисны. Топыд, шоныд морөсыс Ингридлөн шөйөвоштісны. Мөдысьсө, посьвывсьыс, Бьярма ачыс нин окыштіс. Дыр-ө тадз сулалісны өта-мөд бердас топөдчөмон? Бьярма лэдзис кысьыс домповодсө, Төвныр сулаліс, эз вөрзый. Ингридлөн вөлыс шенасис юрнас, но эз жө вөрзый местасыс.

— Тадз, зон,— медбөрын шуис ныв.— Воис верөс сайө пөтан кад, и менө казялісны весиг төдтөм йөз. Ме өд морт вольной жө, но айө вичмөдө мем став ассъыс овмөссө и көсий, мед верөсөй содіс сылысь озырлунъяссө. Кодсюрө саяд оз на и сет. Гөгөрвоан?

Бьярма чөв оліс. Гөтрасьөмъясөдз сылөн мөвпъясыс эз на воөдчывыны, мед и быдсяма көсийөмъясыс садьмөдісны сійөс и вой шөр войө.

— И тэ, мый шуан ас кузяыд тэ?

— Боргнаар Ньөжмыд Ки конунг ыстөма гижөд айлы. Ассъыс писө көсийө гөтравны. Корасьө. Айө тайкө эз йөймы нимкодъысла. Сійө дась көть талун менө верөс сайө сетны.

— Сідзкө и бур,— Бьярма заводитіс воны ас сядяс.— Ме йылысь өд сёрниыс оз мун. Ачыд со висьталан, тэысь пө том, да и озырлун менам некутшөм.

Ингрид гөгөрвотөма нюммуніс.

— Неуна матысним...

Бьярма лөсьөдыштіс вёв вывсьыс пуклөссө, малыштіс бұрысьсө, клопөдыштіс небыда мышсө.

— Сідз кө и сідз,— нюжөдыштіс сійө, водзө мунны лөсьөдчиг.

— Сідз да не сідз, биармиаса зон. Ді мөдар помас оло овмөс

кутысь Агнар, зумыд, том айулов. Повтём морт, кодёс ме тōда и радейта. И, кора тәнō, со тайō зарни пелькытшōс,— Ингрид кыскис пельсьыс да мыччис Бьярмалы,— ну сылы, сет и шу: Ингрид виччысьō корасьысьясōс. Кыдз позьō ōдйōджык мед ыстас. Айō, дерт кутас мунны паныд, но эмбур кузя ми Агнаркōд лōсялам, и ставсō кō вōчны миян пōлясōн тшōктанног серти, сылы некытчō лоō воштысьны.

— Ді мōдар помас? Юасьтōг-висьтасьтōг? И сувтны Бельверк-лы паныд? Ставсō вōчны гусьōн? Мыйкō тэ не сійōс сёрнитан...,— Бьярма заводитіс дōзмыны — Ингрид явō сійōс наяна ылōдліс: «Шлявді сōмын на чужōм кукань моз, льōб нюжйōдла этійō яндысьтōм бутыльыслы».

— Ну и сет,— чорыда шуис Ингрид.

— Ме петі тiян улысь, и метōг нин гудрасьōй, кыдз кужад,— орōдіс Бьярма, вōв вывсьянь нин, да кōдзыда содтіс: ме кывлі, нормантьяслōн гōтрасигōн да верōс сайō петігōн бōръя кылыс век сōмын ай-мам сайын.

— А тэ кывлің, дона Бьярма,— вōв вывсьянь жō нин гораа шуис Ингрид,— мый ай-мамысь гусьōн нылыскōд сёрнитōмысь, киōн инмōдчōмысь, ог нин шу окыштчōмысь, тәнō виччысьō нормантьяс ёрдын мыжалōм. Сәні шуасны миянлысь оланпас торкалысьōн да тшōктасны мынтыны ай-мамыслы сьōм — нэм чōжыд сы мындасō он нажōвит. Ковмас бōр лоны Бельверк-лы верōн. Кыдз тэ та ылō видзōдан?

— Ме эг кōсий тәнō окыштны. Ачыд суōдiн да ышōдiн. Ме эськō ōнi гортын нин вōлі. Но тэ...

— Тайōс, зон, тәнō мыжалысьяслы нин висьтав. Ингрид кырсьнитіс-муніс Бьярма дорті, да ылісянькодъ горōдіс:

— Эн вунōд! Зарни пелькытш Агнарлы! Киысь киō!

Бьярма дзикōдз шōйōвошис. Мый ōнi вōчны? Тōвзыны бōр Бельверк овмōсōдз? Чōвтны пелькытшсō Ингридлы..., но ōд адзыласны, быдōн мыйкō ассъыс шуас... Сэтшōм кокниа налькйō сюрис!

Бьярма эз тэрмōдлы вōвсō. Югдіс ōти мōвп: висьтасьны лоōм-тор йивсьыс Хеймдалль скальды. Мывкыд морт, мый сійō шуас. Саридзладорсянь ōвтiс ыркыд тōвру, кольіс совсō пыр на пōсь вом доръясас. «Чōскыдасьōм бōрын лоō и курыдсō видлыны». Но тайō на мый...

— Ветлыны Агнар дорō колō,— шуис Хеймдалль скальд, Бьярмаōс кывзōм бōрын.— Пелькытшыс тэ ордын. Сыысь мынтōдчы. Ме тәнō ысті Бельверк дорō, сідзкō кывкута и ме. Бельверк коркō вōлі веськыд оласа, повтём викингōн, но сәсся синъясыс дугдісны адзыны бурсō, сьōлōмыс рыжмис, ōнi весиг Один енлōн Хейдрун кōзлука дон оз сулав. Сы выйōдз уси! Ас мортōс вермас дзескōдны, став ловсō кыскас, сылы вомас кō оз видзōдны. Ветлы, Бьярма, но ло сюсьōн. Ингридыс, дерт, мича, викинг оласа, сōмын сы пытшкын пемыд царство, кōнi ыджыдалō кōдзыд ловшыа Хег. А гашкō, и вежсяс на коркō.

...Агнар дорō Ингридлōн зарни пелькытшōн Бьярма ветліс эз дыр. Сетіс пелькытшсō, висьталіс кыв-мōд да чōла копыртчыліс. Петкōдліс тадзи, мый та ылын уджыс сылōн, Бьярмалōн, помасис, и колō мунны бōр. Сійōс виччысьōны. Агнар, кузь ту-

шаа, шөйөвошом югыдлөз синъяса, арлыдаджык, дерт, вөзийс корасян уджсө вөчны Бьярмалы. Сетас отсөг вылө ассъыс мор-төс. Ачыс, Агнар, мөдөдчас татчөс фюлькөн* веськөдлысь дорө колана шыөдчөмөн. Төдчис, Агнар полө Бельверкысь.

— Ме бура мынтыся,— шуис сийө Бьярмалы.

Дерт, вөзийомыс вөзиймөн и коли.

— Тi кызкө асьныд нин,— шеныштчис Бьярма.

Некымын лун мысти Хеймдалль скальд юөртис, мый Бельверк пельясөдз воөма ноксьомыс Ингрид да Агнар костын, и мый танi гудрасьома тшөтш и Бьярма. Мудер да наян Бельверк эз тэрмась стөчмөдны, код вылө веськөдны ассъыс став скөрлунсө, но тайөс колө виччысьны. Кодлыкө Ингрид калегасьома. Нөшта на и содталөмөн. Скөрйивсьыс...

— Вөвлөм кесйөг сувтис менам туй вылө!..

Бельверк скөрмөмлы пом ни дор эз тыдав. Сюрис и Агнарлы:

— Менам озырлун вылө синсө арыштөма!..

Бельверк шыөдчөма нин Бергнаар Ньөжмыд Ки конунг дорө, медем кыкнанныслысь перйисны ыджыд сьом, гусьон ай-мамысь нывлысь син пөртмалөмысь. Либө пөртисны верө да вузалисны кыт-чөкө бокө, ыджыд донысь. Сидз, кызди и вынсьөдөма норманнь-яслөн оланпасын.

Хеймдалль скальдлөн велөдөм

— Аски Фрейя дi дорти кывтас драккар, сэни миян Хельгеланнса викингъяс. Миянлань кежасны, и тэ сөлан сэтчө. Кол-льодам Гримсон Көрт Ныркөд,— кывкөрталис Хеймдалль скальд.

— Аски?— шөйөвошис Бьярма.

— Талун миян тэкөд бөръя рыт. Колө дасьтысьны туйө. Гримсон Көрт Ныр дасьтис киад босьтанторъяс, ме дасьта, мый юрад босьтны.

— Мунны колө быть?

— Быть. Ме төда Бельверкөс.

— Кытчө мунөны викингъяс?

— Сэтчө жө, кытчө мунис Бельверклөн пиыс — Эдвин Ён Ки. Бритгъяс му вылө. Джын муныс викингъяс кийн нин.

— А тадз колө, Хеймдалль бурай?

— Ставыс мунө сидз, кыздз көсийоны енъяс. И ми нинөм огө вермөй вежны.

— ...Нинөм огө вермө? вежны,— сы бөрся шуис Бьярма.

— Гримсон Көрт Ныр бура дасьтис тэнө викингө пыртөм кежлө?— юалис Хеймдалль скальд.

— Чайта, дась.

— Сета тэныд кад: лөсьөд дженъидик руна. Тайөс вермасны юавны. Кажитчас кө меным, висътав, көн юаласны, мый Хеймдалль скальд ошкис. Тайө лоө тырмымөн. А өни уджав. Висъталан, кор лоан дась.

Хеймдалль скальд чукөстис Гримсон Көрт Нырөс, и найө лэччисны саридз дорө. Пөльтис кокныдик ыркыд төвру. Немын, гыяс вылын, гөвквидзис налөн пыжныс.

* Ф ю л ь к — миян ног кө, район, өтувтө некымын овмөс.

Бьярма заводитіс ветлөддыны өтнасөн вадор пөлөн. Сійө төдіс комияслысь вынвабердса йөзкостса некымын сыланкыв, бөр-дөдчан шыалөмъяс, уджалігөн лыддьөдлөмъяс, но медым аслыд мыйкө лөсьөдны?.. Кокныдджык көчөс либө сьөлаөс кыйны, весиг дозмөр-тарөс. Көйнысь оз повзбы. Ошкысь... Ошкысь повзяс, но оз бөрынтьчы. Сэки син на син. Бөрынтьчыны оз позь — ошкыд сійөс и виччысьө. Кыдз лоө, мед сідзи и лоө. Тышкасьны кө — тышкасьны, янсөдчыны кө — янсөдчыны... Но Хеймдалль скальд корөмнас нө кыdzi?.. Дыр юрсө жуғліс. Коми енъяслысь корис отсөг...

Рыгъядорыс нин Гримсон Көрт Ныр чукөстіс Бьярмаөс: скальд виччысьө сійөс ас ордас.

Скальд пукаліс Гримсон Көрт Нырөн лөсьөдөм югдөдан би водзын. Петель помсө вөйтөма векныд вома гырничө, нюусись* гос пытшкө.

Скальд дыр чөв оліс. Бьярма сувтіс сы водзө, эз лысыт торкны чөвлунсө. Биыс раминика югзьөдіс керка пытшкөссө, сывдөм нюусись эз тшынась.

— Быд енлөн аслас төжд, — шуис скальд. — Тиянланын олоны эстыяс, налөн енмыс — Юммаль, саамъяслөн — Йиммель, Биармиаын — Юмала. Но быд енлөн син водзаныс став муыс. И тайө гөгөрвоана. Шонді югзьө быдөнлы, и быдлаын сійөс лыддьөны асласөн.

— Миян Зарань ен — шондісянь, — шыасис Бьярма. — Тадзи мамө на шуліс.

— Юмаласө ті онө пыдди пуктөй?

— Сійө важ ен. Нималө ёнджыкасө Вынва ю шуйгаладорас. Ме сылы абу паныд. Но Зарань — миян том ен. И сійө век лоө том. Зарань дорйө пармаын олысьясөс, видзө миянөс. Тадз айө шуліс.

— Ай-мамыд стрөгөсь? Оз вөтлыны быдмөм челядьсө йөз муясө озырлун корсьны?

— Мамө рам, лөнь оласа. Век зілис овны сідз, мед йөзыс эз дивитны. Айө збойджык. Бокө некутшөм ай-мам челядьсө оз вөтлы. Миян асланым ставыс эм.

— Тадз айыд шуис?

— Тадз быдөн миян шуоны, Хеймдалль бурай.

Скальд ышловзис.

— Эг весьшөрө ме чуйдөд, мед тэ лоин викингөн. Мөд туй бөр воны Биармиаад тэныд абу.

— Но тайө сувтас мортөс виөм дон, Хеймдалль бурай. Оз кө ачымөс катшвартны.

— Вежөра морт кийн шыпурт оз дөзмөд енъясөс. Мортлөн кыв овлө лэчыдджык шыпуртсьыс. И, код төдас, мыйысь артмис унджык Му вылас лөкыс. А катшвартны... Уна өд и тэ сайын. Гримсон Көрт Ныр висьталө, тэ пө дась тышө пырны. Оз ков повны нинөмысь. Скандинавъяс сьөлөмын оло эскөм: тышын усьөм викингъяслы Один енлөн эм Валгалла — майбыр олом, помтөм гажөдчөмъясөн да тышъясөн. Ай мортөс мичмөдө повтөм-лун. А тэ збылысь дась тышө пырны?

— Ме зіли вөчны ставсө, мый тшөктіс Гримсон Көрт Ныр.

* Нюусись — тюлень.

— Ньоввужйись ылөдз-ö лыян?

— Сё воськов сайысь веськала ичөт пасö.

— Колö кыксё воськов сайысь веськавны. Сувтöд ас водзад татшöм мог.

— Верма лыйны и ылөджык, Хеймдалль бурай.

— Эска. Гримсон Көрт Ныр эз ошйись, мый вермö лыйны квайтсё воськов сайö?

— Эз.

— Унаторйö на колö велöдчыны, Бьярма. Миян викингъяс, Скандинавияын ордайысигъясö, комынöдз лыддигкості, удитöны лэдзны пасъясö комын ньöв. И зильöны медводдзаöн воодчыны конунг дорöдз, медым сы кийсь босътны зарни козин, тырмымöн порысьö нэмöдз.

— Зарни, эзысь да мукöд пөлөс озырлуныс, Хеймдалль бурай,— тайö и шөр могыс быд викинглөн? Менö оз кыскы лоны озырөн...

— И бур. Викингъяс асьнысö оз видзны и оз дыр овны. Озырлунныс налөн, кианыс воём бöрын, öдйö исковтö бокö. Но викинг нимыс кутас овны нэмъяс чöж и лоö пыдди пуктана.

— Викинг нимыс мыйö велөдö?

— Велөдö лоны повтöм мортөн, дасьөн дорйыны ассьыд йöз котыртö, ассьыд мутö, көні олан. Став сагаыс велөдö таö, көн көть ов — скандинавияса фьордъяс пөлөн, Исландияын, Гренландияын, весиг Англияын, көні Лондиний кар мöдысь нин лои викингъяс кийн.

— Буретш Англияö муніс Эдвин Ён Ки?

— Да. Англияö... Сійöс коді кызди шуö. Но тадз дісö кутісны шуны неважөнсянь. Сэні кузь нэмъяс чöж олісны бриттъяс, но на ылө вуззыысисны германияса тышка йöз — англъяс да саксъяс, содтöд — Данияысь ютъяс. Бриттъясöс найö дзескөдісны рытывылö, Ирландия саридз бердö. И Британия лои Англия-өн. Чужисны королевство бöрся королевство: Эссекс, Мерсия, Нортумбрия — сэні англъясöс пуркөшитöны миян викингъяс. И тиян олöмныд абу лөнъ: Бьярмаланднытö лунвывсянь ньöжйөнник зырö Гардарика-Русь. Викинг Оттар волöма Новгородöдз, тайö войвыв Гардарикаын медся вышшитчысь карыс, и сы улö, юөртö Оттар, сюрöма нин бьярмаландса вель уна котыр — ливъяс, весь, водь, ижора, муром. Аспөрлун воштöмаяслөн олан нэмыс оз ло кузь. Олөмас унатор на вежсяс, Бьярма, и быд көленалы колö лоны сюсьөн, мед не вошны му вывсьыс.

— Оз-ö мый сэсся йöзыс усыпаньвыв пуксьыны, Хеймдалль бурай?

— Енъюгыдас оз овлы, медым ставсö помöдз лои вöчöма — век мыйкö вежсьö, дугдывтөг пуö-олö. И тадз лоö сэтчöдз, кытчöдз кадыс оз помассы, и оз бырны ентяс. Рунаяс тöдчöдöны: быд здук ньылыштö олөмсьыным ассьыс юкөн...

Бьярма быттö суніс мöд олөмö, коді оз тыдав, гөгөрвотөм и синмөн ни вежөрөн судзтөм ылаын. Сійö вом восьтөмөн кывзис олөма скальдöс.

— Кыдзи вермас кадыс помассыны, Хеймдалль бурай?

— Быдторлөн эм пом, но и быд помлөн эм кутшөмкö заводитчөм, Бьярма. Но весиг и нинөм абуыс ас сертиыс лоөмтор нин.

Дорччысь Вёлунд йылысь сага

Скальд дыр чöv оліс. Сэссия ньöжйöндзи, быттьöкö аслыс, мöдіс висьтасьны:

— Öти сагаысь неыджыд юкөн... Кадъяс сувтöмсьыс на водзджык мыччысис Му вылас туналысь, тшыкöдчысь Сьöдань Хег. Эськö и еджыд чужöма нывбаба, но лолыс сьöд, со и нимтісны тадз. Уна ног та йылысь висьтавлöны. Томдырйи на, Тронхеймын, скандинавияса юркарын, көні велöдчылі, кывлі:

Ёна водзджык пö, кадъяс вотöдзыс на, олісны енъяс. Найö лöсялісны ас костаныс. Та вöсна и йöз костас Му вылын лöсялöмыс эз дзугсьыв. Но Сьöдань Хег кутіс асьсö пуктыны енъясысь вылынджык, заводитіс ноксьыны, мед эськö став енмыс аддзис, мый сійö медся сюсь да вынйöра аслас тыдавтöм вынөн. Сійö казяліс: ставпöлöс озырлунсьыс медъяна синъяссö йöзлысь пöртмöдö зарни. Но зарни вöснаыс некутшöм зык-шум эз на кыптив. И оластöм Сьöдань Хег кутіс разöдны зарнисö, но — öтилы унджык, мöдлы — этшаджык, коймöдлы — ньöти. Сöмын зарниыс и мöдіс петкöдлыны йöзлысь тöдчанлунсö. Та вöсна Му вылын кыптіс вöвлытöм зыксöм. Корольяс да конунгыяс мöдісны воны öта-мöд выланыс, ылöдчыны, тышö пырисны. И торксис Му вылын лöсялöмыс. А, збыль вылас, мый пö и лоö, сійö зарниыс! Дерт, оз тшык, оз сім, да и абу уна Му вылас. Но олöмыс вежсис. Енъяс дöзмисны да вöтлісны Сьöдань Хегöс ас син водзсьыныс. Сьöдань Хег кутіс овны дзевсясьмөн. Но эз эновтчы йöзлы пакöститчöмысь. Этша на кажитчис йöзыслы пакöститчöмыс. Аддзис Гуннъяс му вылын Вёлунд нима дорччысьöс, Нибелунгъяс рöдысь. Зарниыс сійöс эз тшыкöд. Вёлунд, мыйö кутчыяс, быдтор сылөн артмö, но медся ёна радейтліс вöчны мичмöданторъяс дона изъясысь, зарниысь да эзысысь. Корольяс да конунгыяс шыöдчывлісны сы дорö корöмөн — вöчны мичмöданторъяс аняыслы, кодъясöс радейтісны да пыдди пуктісны. И, дерт, мынтысьлісны лышкыда. Но Вёлунд некор эз вышшитчыв. Сылөн аслас вöлі радейтана ань — Бёдвиль, Нидуд конунглөн нылыс. Сьöдань Хег заводитліс пондыны дорччысь дорö, но Вёлунд сійöс матö эз сибöд. Зарнинас көсйис тыртны, но — весьшöрö. И лөгөн тыри лолыс Сьöдань Хеглөн, вöчис выль пакöсьт: Нидуд конунглы тувъяліс юрас, мый Вёлунд матыстö ас бердас асья кыа кодь мича да шань нывсö сылысь, медым мырддыны Нидудлысь конунг нимсö. Чери кыйысьяс, вöралысьяс, му вöдитысьяс радейтлісны дорччысьöс — эз ыждав, быдтор вöчліс налы, мый корасны. Нидуд конунг та йылысь тöдіс. Сійö тшöктіс кватитны нималысь дорччысьöс, домалöмөн нуны сійöс гусьөн йöзсьыс Севарстөд ді вылö и сэні вундавны кок сөнъяссö, мед некутчö эз пышйы-мун. И некодлы мед сэссия эз ков. А нывсö асьыс йöртіс дзескыдінö, медым регыд мысти сетны верöс сайö Гельголанд дівывса сэкся конунглы — көсйысьлöма. Тайö конунгыс нималöма зэв лөк мортөн — некодкөд эз лөсяв, и гөтырыс уна нин вөлöма. Сы ки помысь кулалöмаöсь. Но конунгыс зэв озыр, тайөн и небзöдöма Нидуд конунглысь сьölöмсö. Öтка нывсö со дась сетны юр вундысь сайö. Быдсяма айыд овлö.

Кодкө висьталёма, а, гашкө и, тшыкөдчысь Съодань Хеглы сюрлёма лёкыс гельголандса конунгсянь, но Ваде, дорччысь Вёлундлөн айыс, тёдмалёма пиыс йылысь да петёма туйё, медем мездыны писё. Кузь туйын мудзёма да водёма шойччыны, туйыскөд орчча из кырта бердө. Унмовсьёма Веде айка, а из кыртайсы кадө мөдёма киссьыны, и буретш узысь морт весьтө. Гылалысь изъяс тыртисны морттө. Дерт, гуалом кодь артмис. Но Веде быттё сьёлөмнас кылёма лоан нелючкисö: шыпуртсö водзвыв сатшкөма матын сулалысь пуö.

Бöрынджык Вёлунд да сийöс мырдөн нуöдысьяс матысмисны Вадеöс тыртысь из чукөр дорö. Вёлунд ылісянь казяліс пуö сатшкөм шыпуртсö, уськөдчис пуыслань, нетшыштіс да пыржö и казяліс — шыпуртыс айыслөн. Öні сийö венны позьтöм — шыпуртыс Один енлөн паса: ыджыд кутш кватитёма чукля нырнас ассъыс кок лапасö...

Вёлунд пырис тышö сийöс нуöдысьяскөд. Морт-мөдöс уськөдіс паса шыпуртнас, кольөмаясыс öдйö разалісны. Повзисны: шыпуртыс быттё ачыс лэбалö...

А помыс татшöм,— водзö висьтасис Хеймдалль скальд,— шыпуртыс отсаліс аддзыны мича Бөдвильöс, и дорччысь Вёлунд сыкөд муніс сы ылнаö, кытчөдз Нидуд конунглөн кийс оз судз.

Но уна на лёксö вöчис Му выланым туналысь-тшыкөдчысь Съодань Хег. Му пасьталаыс зыксöм кыптіс зарни вöсна, лючки олöмыс помассис, и тайö лои этша на Съодань Хеглы. Чукөртіс став лёк вынъяссö да шуис пуктыны пом Му вылын олöмыслы. Мед сöмын лёк вынъяс и колины енэжа-муа костас. Лёк вынъяслы сёйны-юны оз ков — пакөститчы пөттөдзыд да ов аскөд-дбөмъяскөд.

Съодань Хег öддзöдіс зарни вöсна зыксöмсö йöз котыръяс костын. Тайö тышас йöзыс öйдөдісны мусö и васö ас вирнаныс. Таысь весиг Шондіыс ярмис, веськөдіс пöсь югөръяссö, ставсö, мый сылөн вöлі, му вылö. Ыджыд би ыпнитіс Му пасьтала и резыштіс Енъягудас. Енэжыс кутіс потласьны доналöмсьыс. Йияс сылісны, и муыс кутіс вöйны öйдөм саридзьясас. Сэсся Шондіыс кусі. Эз ло. И лои пемыд. Көдздөдіс гегдан выйöдз.

Один ен помсянь помөдз кылана ышловзис: тайö воис кад, кор ставыс дугдö лоны...

Сэки сы дорö воис ыджыд кутш, олөмсö панысьыс, пуксис ен водзö, чукля нырнас кок лапаас судзөдчö. Шуö, корсь пö, Один ен, Вёлунд дорччысьöс, сийö и вермас отсавны олөм ловзөдөм вöсна тайö медбөръя тышас. Один ен сöмын тайöс нин и вермис вöчны. Корсис Вёлундöс, муса Бөдвильыс орччөн кулан выйын. Один ен чукөстіс сийöс, шуис, тэ пö век вöлін менам син водзын, и тшөктіс ыджыд кутшкөд ловзөдны бөр ставсö, и мед кадъяслөн помыс лоö виль кадъяслөн заводитчөмөн. Вёлунд босьтчис дорны зарниысь виль Шонді. Пемыд Му вылас тайöс вöчны эз вöv кокни.

Один ен чукөстіс ыджыд кутшöс, öвтыштіс кинас, и кутш лои нöшта на ыджыдсьыс-ыджыдөн. Тшөктіс Один ен чукөртны Му вывсьыс став зарнисö да вайны Вёлунд дорччысьлы. Кутш гөгөртіс став Мусö да быдлаысь чукөрталіс зарнисö. Неуна пö нин оз тырмы,— кутіс норасьны Вёлунд,— неуна. Кутш бара гөгөртіс Мусö — эз аддзы. Но казяліс аслас кок лапаясь Один

енсянь козин — зарни чунькытш. Кадъяс заводитчөмсянь зарни чунькытшыс кок лапаас. Кутш кватитіс чукля нырнас зарни чунькытшсө, нетшыштіс кок лапанас тшөтш да мыччис Вёлунд дорччысылы. Дырөн Шондіыс артмис. Один ен тшөктіс Вёлунд дорччысылы пуксыны ыджыд кутшлы мышкас да былъ Шондіна лэбны сэтчө, кысянь югвидзис важыс. Вёлунд медбөръяыс оқыштіс мича Бёдвильёс. Ань аттьоалана нюммулис, а Вёлунд да ыджыд кутш кыпөдчисны былъ Шондінас и регыд вошины син водзысь.

Коркө-некоркө воисны важ шонді югзянінө. Былъ Шонді Вёлундлөн өти здукөн югзьөдіс Еньюгыдсө. Еджыд кутш чепөс-йис өдйөджык лэбыштны бокө, корис Вёлундөс пуксыны мышкас, но дорччыс сольнитчис нин былъ Шонді югөръясыскөд. А йөз лоины шудаось и дугдісны тышкасыны ас костаныс.

...Енэж пасытала лыдтөм-тшөттөм кодзув талун поэьо аддзыны, но кык кодзув — медся матынөсь өта-мөд дінаныс, дзик орччөнөсь. Тайө — югыд ловъясыс Вёлунд дорччысылөн да мича Бёдвильлөн.

Туналыс-тшыкөдчыс Сьөдань Хег воши Му вывсыс — лёкыс личкөма. Тадзи вөлі пасйөма енъяслөн оланпасын.

А ыджыд кутшөс йөз эз вунөдны.

Асывнас...

Чеччисны водз. Нуръясисны. Быдлунъя сёян дорө Гримсон Көрт Ныр вайис көзөдысь гөгөра колькъяс — изъя кыртайсы, пырмунігмоз, поэьо уна өктыны. Фрейя ді вылын гөгөра лэбачыс тыр.

Лэчисны саридз дорө. Пуксисны куимнанныс асланыс неыджыд пыж-драккарө. Кадысь кадө чөвтлісны видзөдласнысө енэж-таслань, оз-ө нин мыччысь викингъяслөн гөрда-еджыда визьяса төвдөраа, Гундыр ныра драккарныс. Татшөм драккарсө аддзиг, шемөсмылісны полөмысла йөз муясын том и пөрысь. Өти здукөн эновтлісны керка-картанысө и уськөдчылісны пышйыны матыса вөръясө гортса пемөсъяснаныс да медся коланасө кианыс кватитөмөн. Воысьяслы син водзаныс веськавны — шыпуртө зурасыны. Пышйылісны ылөджык весиг короляс, асланыс гежмөдөм тышка вынныскөд. Көть көн, викингъяс пасьвартлісны быдөнөс, коді паныд сувтас. Викингөс сувтөдас сөмын сьөлөмыс, дугдас кө сійө тіпкыны паныда шыпуртөн косялөм көрт дөрөм саяс. А юраныс бөръя мөвп: сідзкө, кад воис сувтны Один ен водзө.

Саридзсянь пөльтысь төвру гөвкйөддіс кокни пыжнысө.

Скальд шыасис Гримсон Көрт Ныр дорө:

— Тырвыйө-ө дась миян Бьярма лоны викингөн?

Олөма викинг петкөдліс сөмын нюммуны дасълунсө, а нюмсө аддзывлан сылысь шоча.

— Дась. Тырвыйө дась, Хеймдалль скальд. Ме эськө эг көс-йы сувтны сылы паныд шыпуртъясөн кианым. Торъя нин, менам арлыдө.

Скальд ошкана довкнитіс юрнас.

— Тадз кө и бур. А тэд паныд оз на и быдөн сувт. Ошкана кыв том мортлы отсалас шедөдны гырысьджык вермөмъяс. Сө-

мын не вывтiасьны. А подулавтѳм кедзовтана кыв мырддяс мортлысь медбѳрѳя вынѳяссѳ.

Гримсон Кѳрт Ныр сѳгласа вочавидзис:

— Сiдз, бурѳ пуктана Хеймдалль скальд.

— Но, дона Гримсон и Бярма, быд вывтiасѳм ошкѳмын ва-йѳдѳ лѳкѳ: збойлун пѳрас дивитана йѳйталѳмѳ, лышкыдлун — эмбур нем думайттѳг сѳвкйѳмѳ, весиг радейтчѳм — тышѳдз ва-йѳдан вежѳктѳмѳ. Олѳмад ѳткодя колѳны и збойлун и мывкыд-лун. Тайѳс ме висьтала тѳд, Бярма. Кут тѳд вылад пѳрысь скальдлысь велѳдѳмсѳ. Гашкѳ, мыйсюрѳ и ковмас миян гылан олѳманым.

— Ме сюся зiля кывзыны ставсѳ, мый тѳ шуан, Хеймдалль бурай. Ыджыд аттѳ тiян бурлунысь и тѳд, Гримсон Кѳрт Ныр. Тi унаѳ менѳ велѳдiнныд.

— Олѳмыс петкѳдлас, кутшѳма мѳрччис тѳд миян велѳдѳм-ным, — тѳдчѳдiс скальд, и кыпѳдiс кисѳ. — А со и викингѳяслѳн виччысяна драккар...

Сулалiс гѳжѳмпомса шондiа лун. Ворсiсны уна сѳ дзирдѳн саридзвывса гыяс, но нѳѳти эз повзѳддыны. Туйыс чуксалiс. Тайѳс казѳлис да аслыс пасйис Бярма. Драккар ѳдйѳ матысмис, тѳвдѳраыс зѳлалѳма, и уна лыда кузь пелыс ѳтпырйѳ ветлiсны улѳ-вылѳ. Драккар нырас Гундыр кыпѳдѳма юрсѳ. Жергѳдѳма вомсѳ паськыда. Наян, быттѳ тышѳ пырысь викинг.

— Неыджыд драккар, — тѳдчѳдiс Гримсон Кѳрт Ныр, — не-лямын морт сынѳны, нѳшта сы мында жѳ шойчѳны, мед вежны ѳртѳяссѳ.

Скальд мѳдiс шенасьны тѳвдѳра кодъ серпасалѳм гѳрда-еджыда дѳрапасѳн. Драккар матысмис Фрейя дiлань. Бярма, дерт, эз тѳд, мый драккар йылысь юѳрыс воис скальдлѳн юѳрник пыр. Пырся олѳмас скальд эз вѳв уна кывѳя и шулiс сѳмын сйѳс, мый лыддис коланаѳн шуны. Юѳрникѳс, пельк том мортѳс, век вѳлi кытчѳкѳ ыстѳма, Бярма сйѳс шѳча и аддзывлiс. Став юѳрѳяссѳ ылысь и матысь вайлiс сйѳѳ.

Кыпыд горзѳм шыяс торкисны чѳвлунсѳ. Драккар небыд шы-ѳн ляскысис вадор лыаѳ. Чѳвтiсны юргез*. Гримсон Кѳрт Ныр гартлiс сйѳс муас суйѳм кер помѳ, эз тѳрмась, но и вѳчис удж-сѳ сiдз, кыз быттѳ быд лун ковмылiс ноксыны тайѳ уджнас.

Скальдкѳд викингѳяс гораа чолѳмасисны. Тыдалiс, мый сйѳс тѳдѳны да пыдди пуктѳны. Скальдѳяс — и Скандинавияын да и ылi муясын — нималана йѳз. Сы вѳсна мый вынаѳсь кывна-ныс. А скальдѳн шуѳм кывѳяссѳ викингѳяс донѳялѳны вылѳджык весиг тышѳясын шедѳдѳм вермѳмѳясысь. Быд аддзылѳм юрас кутѳны, оз вунѳдны. Тадзи велѳдѳ Один ен, кодлѳн Вальхаллаын, оланiнас, кытчѳ некод оз сибав ас кѳсйѳмѳн, эм Олдрѳрир — ыджыд пѳрт. Сыын асѳяс, отсасьысь енѳяс, дасьтѳны поэзиялысь ма. Сйѳс урчитѳма сетны сѳмын скальдѳяслы. Та йылысь ви-кингѳяс тѳдѳны челядьдырсянныс нин.

Викинг — сйѳѳ тышка морт, воин. Но Скандинавияын олысь норманнѳяс — абу ставныс викингѳяс: чери кыйѳны, вѳралѳны, ассьыныс гѳлиник муяснысѳ вѳдитѳны — зѳр да ид кѳдзѳны, шобдiыд танi оз во, пода видзѳны, и виччысьѳны, кор викингѳяс

* Юргез — канат.

(айясныс, вокъясныс, пьянныс) воасны ылі муясысь чорыд тышгъ-ясын мырддѡм озыр козинъясѡн...

Но, со найѡ!..

Викингъяс, ѡти бѡрся мѡд, чеччалісны драккарсыс, личѡдісны мудзѡм сойяссѡ. Кок уланыс му — Фрейя ді!

Бьярма унаысь зільліс ѡткодьявны норманнгъяслысь анъ-енсѡ пармаса Заранькѡд. И артмыліс и эз артмыв ѡткодьялѡмыс. И скальд, и Гримсон Кѡрт Ныр тѡдчѡдлісны, мый Фрейя ен пыдди пуктана Один енмѡн. Фрейя кылѡ быд мортѡс и век дась отсавны, гараласны кѡ. Сійѡ вайѡ шоныд гоҗся зѣр, видзѡ уджалысь мортѡс, отсалѡ радейтчысьяслы гѡгѡрвоны ѡта-мѡднысѡ да чуйдѡдѡ ѡтлаын дыр олѡм вылѡ, мичлун сетѡ анъяслы. Скандинавияын быд мѣсаньѡс, кодлѡн овмѡсыс гѡгѡр лючки-ладнѡ, ыдждѡдлѡны Фрейя нимѡн. Айыс Фрейялѡн — Ньѣрд, саридзьясын ыджыдыс. Ен жѡ. Гыяс валъялігѡн, кор кыптѡ ыджыд тѡв, да енѣжыс пом ни дор пемдѡ, гаралѡны Ньѣрдѡс, корѡны отсѡг да мылыштѡм. Та дырйи оз вунѡдны ошкыны и Фрейя ен-нывсѡ.

А Зарань миян,— мѡвпаліс Бьярма,— Фрейя кодъ жѡ бур да мелі. Но Зарань — Шонді-ныв. Миян некутшѡм Один абу. Юмала нималѡ Вынва ю сайын. Ми сійѡс пыдди жѡ пуктам — код тѡдас: и миянлы, гашкѡ, отсалас, корам кѡ. Висьталѡны, воѡ лунвывсянь выль ен, коді кутас ыджыдавны став Му пасьталаыс. Бьярма кывліс та йылысь сѣрнияссѡ, но выль ен оз веҗ Зарань-ѡс. Мед лоѡны выль енъяс, оз кѡ дзескѡдны ѡнъяяссѡ, кодъяслы пармаса войтыр кевмысьѡны нѣмысь нѣмѡ. Тѡрасны. Оз жѡ ѡд мѡдны йѡзыс моз тышкасьны ѣрта-ѣртныскѡд...

Хеймдалль скальд варовитіс воысьяслѡн тшѡктысьыскѡд, хѣвдинг* Даго Крийккѡд.

— Крийк — бѡрйѡм конунг,— велѡдіс Бьярмаѡс Гримсон Кѡрт Ныр. Висьталіс тыр нимсѡ да тшѡктіс сылысь кывзысьны.— Таысь лѣк оз ло,— тѡдчѡдіс олѡма викинг.

Даго Крийк, дженъыд сьѡд тошка, зумыд лысьѡма том морт, юрсѡ пѡлынътыштѡмѡн кывзіс нималана скальдѡс.

Гѡгѡр гѡлчитіс ас вѡля войтыр — чорыд синма, унджыкыс лѣзь юрсиа, жеръялѡны-сералѡны, тапйѡдлѡны ѡта-мѡднысѡ сьѡкыд ки пыдѡснаныс... (Менам кык ки пыдѡс пасьта, но — видзѡдлам,— мѡвпыштіс Бьярма).

Скальд кинас корис Бьярмаѡс ас дорас.

— Вѡзъя викингѡ, Хѣвдинг Даго Крийк. Нимыс Бьярма. Дась-тіс сійѡс Гримсон Кѡр Ныр, коді петкѡдліс асьсѡ Ирландия вѡсна тышын да и Франкъяс му вылын, миян ногѡн кѡ, Валландын.

Даго Крийк довкнитіс юрнас.

— Кывлі...

— А мый сійѡ куҗѡ?!— кодкѡ горѡдіс викинг чукѡрысь.

— Асьсѡ ачыс петкѡдлас...

Тайѡ шыасис Гримсон Кѡрт Ныр.

— Тышын?

— И тышын.

— Видзѡдлам. А мывкыдлуныс тырмымѡн?

Скальд чѡвтіс юалана видзѡдлас Бьярмалань.

Бьярма шѡйѡвошліс здук кеҗлѡ:

* *Хѣвдинг* — викингъясѡс тышѡ нубдысь.

— Ме, ме... Хеймдалль бурай, мыйкӧ лӧсьӧді, но ог тӧд, туяс оз...

Скальдӧн чужӧмыс югдіс.

— Висьтась, мый артмис. Гораа. А ті кывзӧй! Ме эг на жӧ кывлы, но эска Бьярма сӧлӧмлы. Сійӧ восьтас сӧлӧмкылӧмсӧ, медводдзаысь и ставнымлы.

Бьярма заводитіс висьтавны лӧсьӧдӧмасӧ ньӧжйӧ, но вочасӧн гӧлӧсыс ёнмис. Гашкӧ, Зараньыс отсаліс...

Чужан му дінӧ муслунӧй — пӧльӧй,
Енъясным дорӧ муслунӧй — пӧчӧй,
Ышӧдысь збойлунӧй — вежӧра айӧй,
Сюсьлун менам — тӧждысьысь мамӧй,
Югъялысь шыпуртӧй — медся бур ёртӧй,
Ен аддзӧ — некор ме тышын ог повзъы.
Сюра кӧ лӅк киӧ — милӧсьт ог кор ме.
Вӧля да мездлун — сынӧдыс менам,
Накӧд збыльысь ме быдторсӧ вена!..

Медводдзаӧн шыасис хёвдинг Даго Крийк.

— Тайӧ бур. Позьӧ шуны, зэв бур, Хеймдалль скальд. Сӧлӧмкылӧмыс серти, вермас лоны викингӧн. А мукӧдторйыс тыдовтчас бӧрынджык...

Кодкӧ бара заводитліс шыасьны, но Даго видзӧдлӧмысь тшӧк ланьтіс.

И скальд ошкис Бьярмаӧс, но аддзис тырмытӧмтор:

— «Быдторсӧ вена...» Мыйла быдторсӧ венны? Быдторсӧ венны, гашкӧ, оз и ков. Татчӧ мыйкӧ мӧдтор колӧ.

— Гашкӧ, «став сӧкыдсӧ вена», Хеймдалль бурай?

— А ӧд бурджык! «Накӧд збыльысь став сӧкыдсӧ вена!» Эн вунӧд. Тадзи и висьтав, кор нӧшта на кӧнкӧ лыддьыны ковмас... Сэсся шыасис Даго Крийк дорӧ:

— Тіян эм кад пукыштны ме ордын? Сёян-юан тырмас ставныдлы.

— Аттьӧ, но кадыс абу, Хеймдалль скальд. Менам драккаръяс водзынӧсь нин.

— Ме тшӧкті лӧсьӧдны пызан — ставныдлы. Но гӧгӧрвоа.

— Туйыс чуксалӧ.

— Сідзкӧ, тшӧкта сёянсӧ тэчны тіян драккарӧ. Хёвдинг, висьталӧй асланыд йӧзлы, мед отсаласны...

Водзӧ лоӧ на.





Вокуева Надежда Васильевна
чужис 1957 вося май 18 лунö Кёртке-
рöс районса Шойнаты сиктын. Шко-
лаас велöдчигöн ветлöдлис «Би кинь»
кружокö, кодöс уна во чöж нин нуöдö
Зоя Васильевна Шиликова. Гижö
ичöтсяньыс. Медводдза кывбургяс
йöзöдлöма «Войвыв кодзув» журналын
1975—76 воясö.

1979 воын помалис СГУ, филология
факультет. Сийö кадсяньыс олö Изъя
районса Мошгюга сиктын, велöдö
школаын коми кыв да литература. Нуö-
дö драмкружок, челядькöд пуктöны
спектакльяс.

«Чужлöмныд Эжва вожын, а сёрнитанногныд изъватаслön
кодъ...» — юалöм вылö Надежда Васильевна зэв востера воча-
видзис: «Кутшöм ва пö тай юан, сэтчö и кыскас!..»

Надежда Васильевна гижöдгясын тöдчö аслас шылад и ви-
дзöдлас, стöч, сöстöм коми кыв. Сиам и водзö сөвмöдны кипод-
туйсö да радлыны олöмыслы.

Надежда ВОКУЕВА

Менам радлунöй

* * *

Суниса ем йылö
Пысалöм думгяс...
Тöлыся вой водзын
Пасьмунöм унгяс...
Лэбачлön борд йылын
Öшалысь шудöй...
Орчöна олысьыс —
Шудыслön мудöд.
Кымöра зэр войтыс —
Кольмöдан пывсян...
Мам йöла лун тöлыс —
Кокньöд, кор висян...
Луныс и войыс
Мортыдлы колö.
Сьöдыс и еджыдыс
Öтлаын — олöм.

* * *

Шуоны, олөмыд артмөма визьясысь —
Сьодысь да еджыдысь...
Еджыдысь... сьодысь.
Шуоны, олөмыд ачыс пö висьтасысь...
Öтчыдысь, мөдысь —
Төдтöгыс төдысь...
Шуоны, вöтьясыд миян жö олөм...
Войын көть асылын
Дойясыс асланым.
Шуоны, курччан кө, өтмоза доймö —
Певйид көть чаллыд,
Көть кутшöм арлыд.
Шуоны, мортыдлөн олөмыс дженньид,
Көть и кузь нэмыс
Абунас-эмнас.
Шуоны, мортыд шудасыс-шуда,
Кор немысь оз удзав,
Кор оз сирась мудзас.
Шулöны унаысь: «Майбырöй, олөм!»
Абу кө полөм,
Оз кө кыв орөм.
Шуоны унатор пöрысьлы, томлы...
Шуасны уна на:
Пом абу вомлы.

* * *

Пыдзырта сьölөмөс —
Лысваён кисся:
Югöра везьясö
Кысясны висьтьяс.
Лунöна паныдөн
Важья моз тшупся.
Вунөдла арлыдөс,
Тэөн кор висьма.
Асывья югыдыс
Вөрзёдö сьölөм.
Ыпнитлö муслуныд
Арын көть төлын.
Ышөдö ловтö
Кодзула енэж.
Кыдзи нö ковтöг
Вунöда тэнö?

* * *

Гижтөм лист бока восьса книга —
Восьса йöзасыны морөс и сыв,
Абу калича музалөн иган,
Сöмын ас ловтö казав да кыв.

Асья кыакөд ме моз жө садьмы,
Югыд кодзув моз эн төд мудз.
Сьёкыд олөмысь он кө падмы,
Шогыс радлунсө некор оз судз.

Гижтөм лист бока восьса небөг —
Төдтөм, туявтөм аския лун...
Джынъя нянь шөрөм нөшта чегө,
Эм кө юксыны бөрьянас дум.

* * *

Дзольгө, тельгө, сёльөдө
Визув ваыс ёльөдыс,
Синваысь на сөстөмджык,
Сылан шыысь мусаджык.

Воргаөдыс писькөдчө,
Мортыд моз оз висьөдчы.
Котөртө да котөртө...
Код нө ордыас збодертө?

Сибөдчө да сибөдчө,
Изъяс вомөн лэбалө —
Корсьө ассьыс шудлунсө,
Гажнас вештө руд лунсө.

Тайө менам чужанін,
Тайө менам оланін,
Тайө менам радлунөй,
Шудөй, шогөй, падмөмөй.

* * *

Кутла — окала,
Да выль пөв дзигөда.
Мед не янсавны,
Синмад видзөда.

Юрөй бергөдчө,
Тіпкө сьөлөмөй.
Өні веськодъ дзик,
Кытчө вөйи ме...

Рытпук пукалам —
Лыддям кодзувъяс.
Кутла — окала
Ассьым дзоридзөс.

Юрөй бергөдчө,
Тіпкө сьөлөмөй.
Өні веськодъ дзик,
Кытчө вөйи ме...

Ме медшудаыс,
Ме меддолыдыс.
Кодкё удзалас
Өткөн олігас...

Юрөй бергөдчө,
Тіпкө сьөлөмөй.
Өні веськодъ дзик,
Кытчө вөйи ме...

* * *

Пөрысь-нәмө нин казялан,
Мыйясысь син дорыд вазьылө.
Шогсө да дойсө жө пыкөмөн...
Мөд кө, эз терпит и кык нәмөн.
Мича да гырысь лөз синъясыд
Эз вөвны лунвывса инъясын.
Кочөга удж уна вичмыліс,
А сьөлөмнад везъясьлін мичлунө.
Жугласьом, сарөгось ки пыдөс
Некор эз шевкнитчыв кыпыдас.
Ёна жө дойдавліс олөмыд!
Пыдө жө вөйтлывліс полөмыд!
Уна жө веськыдлунсьыд сюрлі,
А пыр на эскан бурлы.

❖ ❖ ❖



Горький

В И С Ъ Т

— Мама! Мама! Эн бөрд! Ставыс лоё бур... Кылан? Ог кө вермы сәні овнысө, то, дерт, бөр воа тиян дорө! Гашкө, весиг онө и удитөй гажтөмтчыны меысь!— Таня меліа окыштис мамсө, сывйыштис батысө, коді жугыла видзөдіс сы вылө быдса вежон чөж нин, да тэрыба чеччыштис вагонө. Проводница өдва и эштис пөдлавны вагон өдзөссө, поезд вөрзис. Таня чургөдчис өшиньө-дыс да видзөдіс мам-бать вылас, быд ногыс петкөдліс налы: мунөй пө гортө нин — нем сулавны перрон вылас — паськыда нюмйыштис да меліа мөдөдіс кияснас да паръяснас вөчөм окыштөм. Нывлөн сьөлөмыс, дерт жө, ёна майшасис полөмысла, өд поезд нуис сійөс пөшти төдтөм карө — Нижний Новгородө, Горькийө, важ ногөн кө. Коркө батыскөд найө вөліны тайө карас, Волга ю дорын гожйөдчисны, и Таня эз вермы вунөдны карлысь чуймөдана мичлунсө. Кодкө шуас, медся мича карыс пө Питер, кодлыкө сьөлөм вылас воө Париж, кодкө көсйө овны Нью-Йоркын, а Танялы көсйыссис пышйыны Горькийө... Ме, шуам, көсья голясьыштны европаса каръясті, ветлыны Америкаө, видзөддыны Голливуд. А Таня татшөмтор йывсьыс эз и мөвпавлы, сылы сьөлөм вылас воис сөмын Горький нима кар, да со талун көсйөмыс збыльмис — поезд кутіс мунны өдйөджык и өдйөджык.

Кор мам-батыслөн дона мыгөръясыс лоины сөмын сьөд чутъ-ясөн, Таня ньөжмыда бергөдчис өшиньсыс да синъяснас мөдіс корсыны местасө. Вөлөмкө, суседъясыс сылөн гозъя, абу нин том йөз, да кутшөмкө мудзөм мужичөй ветымын кымын арөса. Шань суседъяс. Нывлөн вольпасыс вөлі мөд судтаас, Таня лөсьөдіс сійөс да кайис шойччыны. Мый нөшта позьө вөчны поездын? Сёйны, узыны, лыддысьыны... да мөвпавны.

Таня нюжөдчис вольпасяс, кунис синъяссө да бара веськаліс сійө кадас, кор тайө ставыс заводитчис.

Таня лосьодчис паныдасьны мусукускөд. Еджгов юрсисö мичаа гартыштіс, синлысьяссö краситыштіс сьоддөн, а вом дорсö эз вөрöд — парьясыс и сідз вöліны öмидз рöмаось. Пасьгаліс медрадейтана платтьöсö да лэбыштіс Паша дорö. Налөн Пашакöд, ныв чайтöм серти, вöлі ставыс бурсьыс-бур. Дерт, корсюрö зыксьылісны, но дыр жежлö лөгасьöмсö эз вермыны кутны пытшкосьясас. А медбөрья вит-ö-кwait тöлысьнас Паша вежсис: некор нин прöста эз малыштлы Танясö, эз ворслы сылөн мича юрсіөн, унджык кад кутіс ёртьясыскöд колявны. Но ныв тайöс быттö эз казаяв, мукоддырийыс, водöм водзын, нюмсорөн мөвпаліс көлысь йылысь, аддзис асьсö еджыд платтьöын, а Пашасö мича лөз костюмын... Ывла вылын Таня вермис дыркодь видзöдны кагаясыскöд гуляйтысь том мамыас вылö. На чужöмъяс серти сійö некор эз гөгөрвопы: шудаось-ö найö...

Таня радпырысь локтіс мусук дорас. Найö окыштчисны.

— Кытчö мунам?— юаліс ныв и видзöдліс Пашалы синмас.

— Таня... Тöдан мый?.. Меным колö тэкöд сёрнитыштын.

— Да? И мый йылысь?

— Сідзкö, висьтала кыззи эм. Эн скöрав сöмын. Ме ог көс-йы и ог вермы тэкöд лоны. Талунсянь ми торйöдчам,— ньöжйöника шуис Паша да видзöдліс ныв вылö.

Но тайö дойдысь кывъяссö Таня быттö эз кыв. Öд унаысь нин татшöм сёрниыс вöлі зыксьылігьясаныс. И ачыс Таня висьтаваліс, мый оз көсйы лоны Пашакöд, и Паша шуліс тадзсö унаысь. Но ставсö тайöс шулывалісны пырмунігмоз, эз збыльысь, а медым сöмын мыйкö шуны... Медым петкөдлыны характернысö, повзöдчыштын: воштан пö öд менö.

Таня видзöдіс Паша вылö да эз лысыт немтор юавны.

— Таня, тадзи колö. Ме дыркодь та йылысь мөвпалі.

Кор ныв гөгөрвоис, мый Паша оз ышнясь сы водзын, а збыльсö висьталö, сылөн петіс синваыс... Меным кажитчö Танялөн синваыс, сійö то кельыдлөз рöма, то неуна вижкодь, но абу рөмтöм, кыззи унджык йöзыслөн... Бөрдігас Таня вöлі мичаөн. Дерт, ті шуанныд, мый мортыс медся мича, кор сійö шуда, кор сійö радлö олöмыслы... Да, сідз и эм... Но видзöдлöй ывла вылын сулалысь и ньöжйöникөн бөрдысь том ныв вылö... Тайö каднас он вермы гөгөрвоны, бөрдö сійö либö сьылö лөнъ гөлөсөн кутшöмкö жугыль сьыланкыв. Видзöдлöй том ныв вылö, коді оз йөрт сьөлөмкылөмъяссö ас пытшкас... И ті восьтаннуд тайö серпассьыс мыйкö чуймөданаös.

Но Паша, тыдалö, эз көсйы нимкодьясьны, некутшöм мичлун Таня бөрдöмын сійö эз аддзы.

— Танюк, эн бөрд, оз ков. Тэныд лоö бурджык метög,— шуис сійö кызкö полөмөн.

Но Таня гораджыка на бөрддзис. А кор нылыд оз нин гусьöник, а ыджыд шыөн бөрдö, сэки меным сійö оз нин кажитчы. Вошö сөстөмлуныс.

— Мый нö лои? Дутды, а то ме муна öні. Тэ пыр сöмын бөрдан! Эн ло ветьökөн!— скöра шуис Паша. Гашкö, сійö чайтіс, нывсö пö бурöдны, тайö медбур кывъясыс. Ог тöд, мый сылы кучкис юрас...

— Да, ме пыр сөмын бөрда!— нерыштіс зонсө Тая. Тайө меным оз жө кажитчы, кор юрсө ыджыд шог дырйи воштөны да вермөны уна лектор и вөчны, и висытавы.

— Муна тэ дорысь.

— Мун нин! Мун!— бөрдигтырйи шуис Тая.— Му-у-ун!!!

— Тая...

— Да мун нин, эн скөрмөд менө!— чилөстіс ныв.

— Тая, тэ дзик йөй. Талун жө, ёртъяскөд гуляитигөн, и ву-нөда тэ йылысь. И некор сэсся ог казтыв.

— Му-у-у-н!!!!!!— мый вермөмсьыс горөдіс Тая. Паша видзөдіс сы вылө да колис өтнассө ывла вылас.

Думыштлінныд-ө ті, кымын гозъя быд минута торъялө мирын? А меным зэв окота төдны... Кымын ныв да зон бергөдчөны өта-мөдсьыс?.. Гашкө, тайө каднас нөшта на 30 либө 50, а вермас лоны, и 500 гозъялөн өтув олөмыс пасьмунө. Меным зэв окота, медым найө видзөдісны тайө вежсьөмтьяс вылө, кызди бурланьө вежсьөмтьяс вылө. Дерт, налы сьөкыд тайө каднас, став лектор-йыс сөмын бергалө юртьясас...

Тая син водзын ставыс жө бергаліс. Кызкө тай локтіс жө гортас, юис пөсь тшай да пыр и водіс. Асывнас, кор садьмис, медводдза мөвпыс вөлі: ставыс тайө вөт. Звөнитіс Пашалы, но мөдыс эз босыт трубкасө. Нөшта на некымынысь звөнитліс, но бара весьшөрө.

«Узбө на, гашкө, звөнитас бөрынджык!» — думыштіс ныв да чеччис. Талун сійө вөлі бур руа. Юрас сөмын неуна клөнгыштіс.

Лунтыр Тая звөнитчис Пашалы, но трубкасө мөдыс сідзи эз и босыт. Абу, буракө, төрытъяыс вөт вөлөма. Но ныв эз на көс-йы гөгөрвоны, мый ставыс помассис, мый радейтана мортыс пышйис сы дорысь, колис сійөс, шыбитіс... Мый муслуныс кусі.

Тая төдіс, Паша радейтө на сійөс... Сійө лунтыр гортас пукаліс, видзөдіс өтилаө да виччысис звөнок. Войнас нывлы эз узьсы, сійө бергаліс да мөвпаліс сөмын Паша йывсьыс, мусук йывсьыс.

Мөд луннас, рытнас, Тая мөдөдчис Паша ордас, медым сёрнитыштны ськөд. «Патераас биыс эм, сідзкө, гортас!»— рад-пырысь думыштіс ныв.

Коньөр Тая! Сылы некод эз восьты. Ныв тотшкөдчис и звө-нитіс, но весьшөрө — Пашалы, тыдалө, и сытөг вөлі зэв лөсьыд. Тая петіс подъездсьыс, эз вермы кутны синвасө да гораа бөрд-дзис. Сійө ёна на Пашасө радейтіс...

Гортас воөм бөрын Тая бара на звөнитіс зонмыслы, но некод эз шыась. Тайө войыс бара лои зэв кузьөн.

Асывнас Таялөн висис юрыс. Коліс мунны университетө. Ныв видзөдіс ас вылас рөмпөштанө да дөзмис — сійө быгтбө пөрысьмөма. Тая өдйө гартыштіс юрсисө, эз и краситчышт, эз сөй ни — немтор вомас эз пыр, пасьтасис и петіс гортсьыс. Мөдөдчис подөн, медым юрыс неуна палялыштас. Университет дорын вөлі неыджыд магазин, көні уджаліс Пашалөн ёртыс, Саша. Сэтчө и кежис.

— Чолөм, Саша. Позьбө тэкөд сёрнитыштны?— гораа шыасис.

— Чолөм, Тая.

— Ме көсья юавны Паша йылысь. Кызди олө?

— Таня! Сійö зэв ёна көсйö тэнö вунöдны! Мекöд дискотека-яс выlö ветлö, нывъяскöд тöдмасьö, олö бура. Эн тöждысь,— Саша висьталіс тайöс сэтшöм радпырысь, мый Танялы окота лои öдйöджык пышйыны.

— Тырмас,— чорыда шуис ныв.— Эн висьтав сылы, мый ме волі.

Таня бергöдчис, медым Саша эз аддзы доршасьöм синвасö.

— Ог висьтав, ог,— вочавидзис зон.

«Со кутшöма сійö менö и радейтіс... Оз гортас пукав, оз шогсы, а ёртъясыскöд гуляйтö...»— дугдывтöг майшасис Таня.

Гортас мунігөн бара звöнитіс Пашалы. Думайтіс, мый трубкасö сійö оз босыт, но...

— Да, Таня, мый тэныд колö?— скөркодя юаліс зон.

— Паша?.. Кыдзи олан?

— Бура. А тэ кыдзи?

— Ме бура жö, аттö. Колö паныдасылыны да сёрнитыштны.

— Ме ог көсйы тэкöд сёрнитны. Немтор йылысь.

— Паша! Ме öд тöда, мый тэ менö радейтан!

— Коркö радейтлі, да. Öні ог. Эн лöгав ме выlö. Ов бура. И эн меным некор звöнит!— гораа, быттö равзöмөн шуис Паша.

— Збыльысь он радейт?— нориника юаліс Таня.

— Ог!!! Ог радейт! Менам öні выль олём! Тэтöг!— öдйö шуис зон да шыбитіс трубкасö.

Тайöс кылöм бöрын ныв öдва и аддзис туйсö гортас, син водзас гөвкъяліс кутшöмкö руд тшын.

«Кыдзи öні овнысö? Мый вöчны? Мыйла оз радейт? Мыйысь тайö меным? Гашкö, ме сійöс ог жö радейт? Гашкö, сійö бөр локтас?»— сöмын и жуисны юалёмъяс Таня юрын, а вочакывъясыс эз вöвны.

Гортас мамыс да батыс юалісны, мый пö лоис, найö көсйисны тöдны, мыйысь сэтшöмасö жуглясьö. Таня висьталіс, Пашакöд пö торъялім.

— Аддзан на мөдöс кодöскö! Ставыс лоö бур!— тэрмасигтыр вочавидзисны мам-батыс.

— Да, лоö, дерт.

Таня рытывбыд петавтöг пукаліс аслас жырыын, эз сөй, сöмын куйліс, бөрдіс да мөвпаліс... Немтор эз көсйиссы вöчны.

Коркö мамыс пырис жыръяс:

— Аски спектакль выlö ветлам! Шуöны, зэв интереснöй.

— Ме ог, мама.

— Мыйла нö? Лок ветлам!

— Да ог көсйы!— скöра шуис Таня.

— А мый горзан? Позьö öд и бура шуны! Ме öд абу Пашаыд.

— Мама, ме көсья öтнам олыштны. Сы йылысь некор меным эн гарав. Ог ме некытчö мун, көсья гортын олыштны, öтнам.

— Но инö,— дöзмöмөн вочавидзис мамыс да петіс.

Тадзи коліс вежон. Таня вöлі лёк олан руа, некодкöд эз көсйы сёрнитны, аддзысьны. Пукаліс аслас жырыын да шогсис. То нориника, то гораа бөрдіс да пöшти эз унмовсьлы... Сьölöмыс гораа тіпкис, чеччаліс морöсас. Киясыс нюжöдчисны телепон трубка дорö, но юрас бергалісны Пашалөн кывъясыс: «И эн меным некор звöнит!» И овнысö эз вöв окота.

Кык вежон

Сэккості университетын заводитчисны каникулъяс. Таня пöш-ти став экзаменсö автоматон сдایتіс, семинаръяс вылас бура уджаліс семестр чöжыс да. Тöдсаыс сылön уна вöлі, а бур ёр-тыс — сöмын вит. Быд лун найö ставön чукöртчылісны да öтла-ын коллялісны кадсö. То бассейнö ветлісны, то магазинъясті, то кафеын пукалісны, то дискотека вылын гажöдчисны.

Кор Таня вöлі ёртъясыскöд, сійö радліс и эз казътывлы Паша-сö. Но рытъяснас, кор кольччыліс öтнас, век на думайтліс Паша йылысь. Мый öні сійö вöчö? Кодкöд? Мөвпавлö-ö Таня йылысь?

Тайö кадсö, кор нем вöлі вöчнысö, Таня эз радейт... Сійö кутіс видзöдны америкаса тешкодъ сериал, котраліс стадион вылын. Но Паша йылысь мөвпъясыс эз вошны. Сöмын сійöс аддзыліс вöтъясас. Сы йылысь мөвпъясön унмовсъяліс и садъ-мыліс.

Öтчыдысь Таня садъмöм бöрас скöрысла шуис: «Паша! Ме тэысь ог пов! Лок менам вöтъясö быд вой! Лок! Меным весь-кодъ!» Та бöрын сійö эз вöтавлы зонмöс тöлысь кымын.

Сьöкыдысь-сьöкыд вöлі тайö каднас Танялы. Сійö зілис ид-равны аслас жырыйсь ставсö, мый казътыліс зон йывсъяс. Но кызди на идралан, кор ставыс Таня жырыйн кызкö йитчöма Пашакöд. Шуам, шкапас öдзöс вугсö сійö вöчліс, крöвать вылас сійö куйывліс, тайö мичаник небыд ошписö сійö козынавліс, сумкасö, кодön Таня öні ветлöдлö, сійö жö ньöбліс. Ставсö öд он шыбит...

Тадзи коли нöшта вежон. Таня век на бöрддывліс рытъяснас да жалитіс асьсö. Ме сійöс жалиті жö. И ставнысö жалита, ко-ді та пыр муніс.

Тöлысь

Университетын бара заводитчис велöдчöм. Танялы кызкö-мыйкö коліс усыпанъыв пуксъяны. Сійö кутіс тшöкыдджыка сёрнитны ёртъясыскöд, тöдмасыны выль йöзкöд. Университетын пырджык нюмъяліс, кышдön асьсö петкöдліс. Ставön нин тö-дісны, мый Паша да Таня торъялісны.

Öтчыдысь, кор Таня нывъяскöд ветліс выставка вылö, сійö медводдзаыс казяліс, мый том йöз видзöдöны сы вылö, нюмъя-лöны сылы. Но нывлы вöлі веськодъ.

Таня век мөвпаліс сöмын öти морт йылысь — Паша йылысь. Ёртъясыс шулывлісны, кадыс пö этша на коліс, коляс пö во джын кымын, да ачyd на пö кутан серавны öнія майшасьöмъяс вылад. Таня эскис и виччысис, кор нин мунас во джынйыс, и сійö вер-мас овны мöд ногön нин, оз кут мөвпавны Паша йылысь.

Öтчyd, кор Таня пукаліс автобусын, друг шыасис телепоныс. Видзöдліс, и шай-паймуніс — звöнитіс Пашаыс.

«Шыасыны али оз ков?» — думыштіс Таня, но век жö шуис трубкаас:

— Алло.

— Алло, Таня! Чолöм! — кыліс Таня Пашалысь кыпыда юр-гысь гölöссö. — Мый вöчан?

— Мый тэныд колö?

— Нинөм. Прөста көсья тэкөд сёрнитыштны.

— Ме өні автобусын. Ог вермы тэкөд сёрнитны. Ме тэныд сёрөнджык звөнитла, час мысти.

— Но инө,— вочавидзис Паша.

— Став бурсө.

Таня локтіс гортас, а сьөлөмыс тайкө эз чеччышт морөссьыс. Сійө эз төд, радлыны али бөрдны. Пашаыс ачыс сылы звөнитліс! И прөста пө сёрнитыштны окота! Таня юис тшай, видзөдыштіс телевизор, и кор колис часысь унджык, сійө звөнитіс, но трубка-сө некод эз босьт...

«Тайө бур вылө! Колө вунөдны сійөс»,— вирдыштіс вежөрас.

«Тэ сійөс радейтан... Колө нөшта звөнитлыны»,— вензис вежөрыскөд сьөлөмыс.

Таня пыр сьөкыда бөрийыліс уна пиысь отиторсө — весиг и кык пиысь. Некор эз радейтлы тайөс вөчны. А кор сьөлөмыс да юрыс эз воыны өти кывйө, сійө шөйөвошліс да эз төд, мый вөчны.

Но талун сійө кывзіс вежөрсө. Колө вунөдны Пашаөс!

И ме чайта, Таня вөчис ставсө колана ногөн. Меным нимкодь, мый Таня вермис асьсө кутны.

Кык төлысь

Дерт, Танюклы вөлі сьөкыд на.

Бывлаөдыс мунігөн век корсис Пашалысь мыгөрсө. И көсийс аддзыны, и поліс. Од сымда дой вөчис сылы тайө мортыс!

Таня велөдчис, рытьяснас пөшти некытчө эз петавлы, гортас пукаліс. И көть эз нин петкөдлы йөзыслы шогсө, сераліс, радліс олөмыслы, но корлісны кө сійөс төдса кафеө — эз мун, өд сэні сійө вермис аддзыны Пашасө.

«Бур» йөз висьтавлісны Танялы, мый Паша шогсьө жө, но мөд ногөн — юышталө, гуляйтө, нывъяскөд төдмасьө, дискотека вылын йөктө... Таысь Танялы нөшта лөкджык лоліс.

Таня бөрдіс, да сідзи, мый мамыс повзьяліс: оз-ө веськав нылыс больничаө кутшөмкө нервнөй висьөмөн, тадзи асьсө жу-гөдө да.

Локтіс кад, кор синваыс Танялөн бырис. Эз вермы бөрдны, көть и мукөддырийыс өна көсийссис.

— Сійө өні шоча нин дум вылө усьлө. Колө водзө овны,— шуис өтчыдысь Таня Алөна ёртыслы.

— О! Таня! Ме тэно чолөмала! Ачыд мөвпыштін али кодкө чуйдіс?— юаліс ныв да сывйыштіс Таняөс.

— Ачым. Ставыс бур. Менам ставыс эм — мам-бать, ёртъяс, ме ог тшыгъяв, ки-кок эм... Мыйысь меным шогсьынысө?! Паша вөлі, но сійө муніс... Лоө кодкө мөд!!! Воис нин тулыс!!! А ту-лысыс век вайө мыйкө вьльтор, буртор...

— Да, өти өдзөс пөдлассьө, мөд воссьө. Ставыс лоө бур.

Сөмын на Таня көсийс заводитны мөд нога олөм, паныдасис Пашакөд.

— Чолөм, Таня.

— Чолөм, Паша. Кытчө мунан?— Таня көсийс петкөдлыны, мый сійө зэв шуда, нюмъяліс да видзөдіс Пашалы сингъясас.

— А... Удж кузя... Ставыс бур. А тэнад?— юаліс зон да видзөдіс Таня вылө.

— Менам ставыс жö бур. Кöнi нö гожъялiн?

— А ме Египетö ветлi ёртъяскöд. Отпуск босътлi да. О, шойч-
чим ми сэнi... зэв бура... Класснöя,— тшапа шуис Паша.

— Но ме рад, мый тэ шойччан да он вошты кадтö. Меным
мунны колö, Паша. Бур, мый аддзысьлiм.

— Меным мунны жö колö. Салют.

И найö мöдiсны быдөн аслас туйöд. Таня думыштiс, мый оз
нин радейт Пашасö... Но рыгывбыд сöмын сы йылысь и мöвпалiс.
Кöсйис весиг звöнитлыны, но эз лысьт. Сийö öд заводитiс виль
олöм. Пашатöг. А Пашаыслы и сытöг зэв бур: Египетъясын
шойччö.

Ныв заводитiс петавлыны рыгъяснас гортсьыс, гуляйтны ёртъ-
ясыскöд. Но век полiс аддзыны Пашасö. Öд Таня век на ра-
дейтiс сийöс.

Нель тöлысь

Вöлi май. Таня ветлöдлiс магазинъяскöд, корсис аслыс виль
ковта, но некытысь эз вермы аддзыны коланасö. Мунiс шөр
уличаöд нöшта öти магазинö да паныдасис Пашакöд.

— Чолöм, Паша! Кытчö мöдiн?

— Да некытчö, сiдзи шöйтa. Поводдяыс талун зэв бур.

— Да, зэв лöсьыд.

— Лок кафеö ветлам,— друг вöзйис Паша.

— Ветлам, сёрнитыштам,— шуис Таня.

Кафeyн пукалiгөн Паша висьтасис Египет йылысь, Таня кыв-
зiс сийöс да думайтiс, кутшöм лöсьыд налы вöлi водзынджык.
Сэсся найö мунiсны ворсны бильярдысь. И сэнi окыштчисны...
Кыдзкö тöдлытöг артмис... Таня кок йывсьыс тшук эз усь, а
Паша паськыда нюмъевтiс.

Ывла вылö петöм бöрын зон юалiс:

— Но мый, ми бара öтлаынöсь?

— Ме ог тöд. А тэ кöсьян?— вочавидзис Таня да повзьöмөн
видзöдлiс зон вылö.

— Да. Кöсья. Ме тэысь гажтöмтчи, Таня. Гажтöмтчи...

— Ме тэысь тшöтш!— шöпнитiс Таня да сывйыштiс Пашасö.
Дыр сийö тайöс виччысис... И со найö бара öтлаынöсь...

* * *

— Тэ жö кöсйин виль олöм заводитны,— стрöга шуис Алёна
Танялысь юöрсö кылöм бöрын.

— Кöсйи, да... А тэ абу рад?

— Ме ог тöд. Тэ öд сэтшöма мучитчин, бөрдин. Думайтaн,
öнi мыйкö вежсяс?

— Да!

— Но, сiдзкö, лоöй шудаöсь.

Да, Таня и вöлi шуда, но майшасис, радейтö-ö сийöс Пашаыс.
Кор сийö веськыда та йылысь юалiс, Паша вочавидзис таdzi:
«Эг кö радейт, эг кор эськö тэнö кафеас».

Тайö кывъясыс нывлы эз кажитчыны. Дерт, найö öтлаасисны,
но Паша ёнджыкасö сёрнитiс ёртъяс йывсьыс, эз и юась
Танялөн олöм йылысь. На костын кылiс кутшöмкö кöдзыд.

Вежон мысти Тая локтіс Паша дорё да шуис:

— Тодан, Паша, ставыс миян абу сідз, кызди вёлі водзын...

— Дерт, абу сідзи, ми од вежсим.

— А тэ мовпавлін ме йылысь торъявліганым?

— Кызд тэныд шуны, Тая... Медым ме эг мовпав тэ йылысь, заводиті ёна гулайтны... Но век мовпавсис. Фотографиясынымос видзёдалі.

— А мыйла тэ ме дорысь мунін?

— Сэки ме думайті, мый тадзи колё. Мыйла тэ юасын?

— Висьтав, Паша, тэ менё радейтан?

Зон немтор эз вочавидз... Синъяссё лэдзис...

— Он?

— Ме ог тод, Тая. Ме дыркодь вёлі отнам, и меным кажитчис татшом оломыс. Сет меным кад.

Таялы вёлі зэв сёкыд кывзыны тайё кывъяссё. Сійё öні стёча тёдіс, мый Пашаыс важон нин оз радейт сійёс. И мыйла коліс бара отлаасыны???

«Медым гёгөрвоны тайёс»,— вирдыштіс вежорас.

Тая немтор эз вочавидз зоны, бергёдчис да муніс. А Паша шуис бёрсяныс:

— Тэ кага на!

Нывлөн син водзын руаліс, но сійё эз бёрд, од став синваыс тайё морт пондаыс важон нин бырис.

«Тырмас!»— шуис Тая аслыс.

Во джын

Тайё лоөмтор бёрас Тая сэсся эз звёнитлы Пашалы. Сёломыс топавліс, кор кодкё ёртыяс писыс мыйкё шуліс либё юавліс сы йылысь. Но Тая эз петкёдлы сёлом дойсё. А сэсся висьталісны, Пашалон пё эм выль ныв.

«Но и мед! Зэв тай сійё сюсь!»— сёмын вермис вочавидзны та вылё Тая. Но рытыяснас гортас думайтіс: «А кутшом тайё нылыс? Мыйон сійё бурджык?» Но некодлысь та йылысь эз юась.

Таялөн лоисны выль кавалеръяс. Дзоридзьяс козынавлісны да новлодлісны кафеясё, но сылы тайё эз ков. Ныв бура колляліс накёд кадсё, но век откодяліс найёс Пашакёд. И Пашаыс кажитчис сылы ёнджыкөн, мичаджыкөн, лёсьыдджыкөн... Ок, Тая, Тая, тэ прёста эн на тод, мый кадыс эз на ставнас бурдод сёлом дойястё. Ме коркё торъялі жё радейтана морткёд да гёгөрвоа тэнё.

Кадыс муніс... Коркё ывла вылын Тая паныдаліс Пашасё ёртыскёд, но найё сёмын чолёмасисны, сёрнитнысё вёлі немтор йылысь. Öні Тая эз нин пов ветлодлыны уличаясод... Аддзас кё и аддзас. Мед кётъ и нывкёд...

Колис во джын. Дерт, Таялы лои кокныдджык, но сійё эз вермы мынтёдчыны Паша йылысь мовпъясысь. Ачыс асысё таысь видіс: мортыс пё оз радейт тэнё, а тэ он вермы сы йылысь вунёдны, и выль кавалеръяс пиысь он вермы некодос бөрйыны...

Тшёкыдджыка кутіс вётавны Пашаёс... Öти и сійё жё вёт быд вой аддзыліс: Паша локтё Тая ордё да корё сылысь прёща, найё отлаасыны, и ставыс лоё бур.

Таялы дышдёдіс татшом оломыс. Коліс мыйкё вежны. Со и

университетын велөдчöмыс помассис, ки вылас диплом. Таня думыштис, мый тайö карсьыс колö кытчöкö мунны, и сöмын öтилаö — Нижний Новгородö... Сийö висьталис мам-батыслы, регыд пö мөдöдча сэтчö. Некод эз эскы, но Таня чукöртис пась-көмсö, босьтис сьом (сылөн аслас вöли неуна, да мам-батыслысь корыштис), и со — öни куйлö поездын, мөд судтаын... Да казътылö ассъыс олөмсö...

— Татьяна, кутанныд юны тшай?— мелia юалис Танякөд öти купеын мунысь нывбаба.

— Да, дерт...— вочавидзис ныв да лэччис.

— А тi, Валерий?— юалис нывбаба мудзöм мортлысь.

Найö ставныс кутисны чурскыны пöсь тшай.

— Кытчö тi мунанныд?— юалис Танялысь нывбабалөн верöсыс.

— Горькийöдз.

— О, ми тшöтш! Ми сэни олам. Гөститны волим Сыктывкарö.

— Висьталöй меным Горький йылысь ставсö, мый төданныд... Кутшöм тайö карыс?

— О, тайö карыс зэв мича... Важся... Волга, дерт, няйт нин, но век на паськыд. Кор видзöдан сы вылö...— Таня кывзис гозъялысь Горький йылысь сёрнисö да сьöлөмнас кылис: ставыс сылөн сэни лöб бур... И весиг эз кут майшасьны төдтöминö öтнасөн муномысь...

А Валерий, кор төдмалис, мый Танялы ковмас Горькийын удж корсьны, вöзйис аслас магазинын вузасысьсөн уджавны... Дерт, Таня окотапырысь көсйысис.

Ме восьта тiянлы гусятор, сöмын некодлы энö висьталöй сiйöс: öни Таня пукалö да радпырысь сёрнитö шань йöзкөд поездын, но сийö оз на төд, мый некымын во мысти восьтас Горькийын ассъыс магазин и петас верöс сайö медся радейтана морт сайö. Ставыс сылөн лöб бур... И нöшта: Танялөн верöснас лöб Валерийлөн пиыс. Со кыдзи овлö олөмад.

Меным зэв нимкодъ, мый Таня ловзис да эз повзъы көсйöмсö олөмö пöртöмысь. Кыдзи шуöны, ставыс, мый оз жугöд миянös, вöчö миянös ёнджыкөн. Тайö збыльысь сiдзи.

Выль олөм заводитöм бöрын Таня бöрдлывлis на, но эз шогысла, а шудысла. И тайö каднас сийö вöли медся мича.





Михаил ЛАДАНОВ

Ёля тыын

В И С Ъ Т

Ёля тылөн веськыдладорыс ставнас югзис, коть ывлаыс вöлі ёна на рöмьд. Дзик паныдөн тыдаліс мыйкö ыджыд пыж ли катер сяма. Зэв жö нин аслыспöлöс сійö! Путкыльтöм-бергöдöм блюд кодь... Мыйлакö эзысь, югъялысь рöма. Бокöдыс сьöрсьөн-бöрсьөн котралісны-öзйисны ярьюгыд бияс, лампочкаяс сямаöсь. Синмыд весиг доймö, сэтшöм лэчыд биыс.

— Кыдзи татчö катерыс веськаліс? Тулысын, ыджыд ытва дырйи, водзті пыравлісны, да и то Сöвет власьт кадö на. Но öні öд октябрь... Кыдзи Сыктыв юсяньыс татчö, Ёля тыас, пырис? Мутыгс öмöй вермö кывтнысö? Али, гашкö, вертолёт моз нин сынöдтігс лэбалö?— ышловзис Веньö.— Ёк-маръёк, да тайö жö чери видзысь инспекторъяс! Дзик ботан весьтö сувтöмаöсь. Менö, öкаяннöйясыд, виччысьöны...

Веньö резина пыжнас вöлі нин пöшти ты шöрас. Пышйöм йылысь и сёрни абу. Кöнкö, кыйöдöны, мый водзö кутас вöчны. Часлы, шошаöдыс кватитасны... Бара на, öкаяннöйясыд, штрапуйтасны. Тайö шуштöм мөвпсыс мыштігс йирмöг котöртіс. Сійö весиг пыжас ляпкöдчыштіс.

А катерыс збылыс тешкодь. Быттö доналöм рач, кодлөн югöрсыйс пемыд ывлаыс югзьöма. Друг воссис мыйкö öдзöс сям, пытшкöссьыс воськовтіс морт. Ыджыд тушаа, паськöмыс быттö эзысьысь, юрас — би водзас лöсталысь тешкодь шапка. Веньö нöшта на ляпкöдчис пыжас. Петысьыс воськовтіс ва вылö, кытшовтіс тешкодь катер гөгöрыс. Сэсся кокнас инмöдчыліс аслыспöлöс пыж бокö, кыз тай шопер чужйö-видлö машина кöлесасö...

— Бласлö Кристос,— сöмын артмис Веньöлөн.

Сійö шöйöвоши, тайкö пернапас эз чöвт. Дерт, чуйман, кор мортыс ва веркöстігс, быттö мутыгс, ветлöдлö. А гашкö, сылысь ботансö нин лэптö да... Веньö синсö кунис, кинас тільыштіс да бөр восьтіс. А эсійöгс да веркöсас. Веньö ванас чужöмас ре-

зыштис. Гашкө пө, көдзид ваис пальодас да. Но блюдсыс петыссыд бара на жөдзис ва веркөсын.

— Господь Енмыс! Мезды менө... Каститчө нин тай. Али век жө узя,— Веньө чепольтис чужомбансө.

И сийө здукас шуйга кисыс кыкнан пелысыс жмоткысисны пыж пыдөсө. Асъя лоннын найө зэв жө нин гора усисны. Кузь тушаа дядьбид бергөдчис, тэрмасьомон воськовтис өдзөсө.

— Кранты, ек-марьёк! Пышйыны ог удит,— вирдыштис Веньө юрын.

Но водзө лоөмторйис нөшта на чуймөдис. Шытөг, веськыда енэжө качөдчис тешкодь катерид. Эз, эз качөдчы, а быттьө вывлань чеччыштис-луйыштис. Сийө збыльысь вөли увлань юрөн путкыльтөм блюд кодь. Ошйис му весьтө, дзик Веньө юр вывландорас, сэсся бара на шытөг луйыштис-чеччыштис. Онi сийө вөли нин истөг көрөб ыжда. Сувтовкерис да боклань пöлынтьчыштөмөн визьнитис пемыд енэжө, көни югъялисны лыдтөм-тшөттөм кодзувьяс.

Веньө юрсө чатөртөмөн видзөдис. Сийө эз эскы аслас синлы.

Каститчө, али збыльысь аддзылис? Вежон сайө нин вомө курыд зеля войт эз босытлы. Пөкмелля вывсьыд быдторйис овлө. Но онi, садь юрөн... Мед нин блюд мыгөраыс пуксьылис Ёля ты вылө. Но эсийө мортыс өд ва веркөстыс шлапсьөдис-тапикасис. Мути? А гашкө, американечыд пуксьылис да... Колөкө, шпион да... Миян вөрөгным... А сийө повзис, колөма уськөдчыны да кутны. Колөкө, орден дай уна сьом козьналисны, майшасьомөн мөвпалис. Шудыд усьлис, а сийө — повзис инспекторысь, кутасны да мыждасны, мися. Но и өлукөн вөвсьөма.

Веськөдис пыжсө сийө местаас, көни дзик неважөн вөли блюдыд. Тылөн тайө паськыдинас — медся джуджыд йирыс. Пыдөсас зэв уна вөйөм кер да быдсикас лөптыс. Но йирыслөн өтар-мөдарыс лыа тшупөда. Кыкнан инас Веньө и вөйтлывлис гырысь синма режъя ботанъяс. Арнас гырысь ёдыс вөрзьялис, быттьө пожъясьыштны, йи сувтөдзыс петалис йирсьыс, а гашкө, лысьөмсө веськөдыштны да. А на бөрся вөтчисны и прамөй сирьяс...

— Ме тиян моз лы позтө ог кый. Чаль кузя кельчи-ёкышид дарөм оз ков. Мед нин кыкнан кинад черисө позьө вөли босытны, а шөрсө — курччыны,— шмонитөмсорөн дивитлис ёртъяссө, кодъяс зэв посни синма угодыөн кыйсьылисны.

Мый-мый, а черитө кыйны Веньө сяммө. Асывнас локтө ты берегө, биасьө да чай пузьөдө. Юигмозыс ты вывсьыс синсө оз вешты. Ёртъясыс сы вылын тешитчөны:

— Васаыслы өмөй кевман? Сыкөд өмөй ёртасян? Румка водка нөшта кысьт... Гашкө, черитө и козьналас.

Веньө пукалө да мича ныв моз нюмъялө.

— Төданныд өд, мый йөйяс да рөдвуж вылө ог дөзмы. Көть мый шуалөй...

Сэсся сөлө пыжө да кывтө. Час куим мысти би дорө локтө. Мудзыштөма, но долыд чужөма. Вебра, а гашкө, унджык на чери Веньө бурскөма.

— Но тэ и мастер, Веньө! Ми войкоалим да тэ мындасө эг кыйөй,— завидьтисны дзик на неважөн шмонитысьяс.

— Кывтө песны ыджыд сям оз ков. Зонъяс, вай юква пуам.

Менсьым черисö керöй, а ме талун пуся,— индiс Веньö.— Тiян сямöн и юквас кизьöр лöö.

— Да-а, Веньö быдтор бура вöчö. Сылөн ботанö сир-сыныс ачыс кö-а пырö-гартчö,— бара на ошкыштіс ёртсö Öльöш.

Свежöй юквасö нин панялiгөн Öльöш висьтасис:

— Эскöй кöть эн, а кольöм вежонся середаö асылö Ёля ты вылысь лэбалысь тасьтi аддзылі. Космосысь воöмаыд пуксьöма буретш Веньöлөн кыйсян местаас. Ыджыд мыгöра локтысьыд ва веркöстiыс быттö кос мутi шлапъяліс-ветлöдліс. Ме бадь сайö дзесбьöмөн пыжын пукалі да куритчи. Ас синмөн аддзылі, кыдзи тэнад ботанысь пöдан пасьта ёдіяссö мездаліс... Сэсся тасьтiыс енэжас лöня качис. Весиг и миян му вылö локтысьяс гусясьöны. Гашкö, и менам ботанысь медмича черисö шышка-лöны да...

— Тэнад ботанö весьт кузьта кельчи и öшйö. Öльöш, а тö-дан мыйла? Тюль кодь угодыöыд. Миян пöвстысь тэнад ботаныд медся посни синма,— крапкис Васьö.— А збыльысь аддзылін али сöран?

— Он öмöй эскы,— и Öльöш пернапасасис.

— А рытнас уна-ö водкасö гылкийн,— гигзис нин Васьö.

— Тöлысь нин эг видлы. Быд рыт ас машинаөн таксуйта да,— эскöдiс Öльöш.

Веньö эз радейт вензыны. Мед больгöны. А вот лэбалысь тасьтi йылысь висьталöмыслы эскис. Ачыс öд аддзыліс жö.

— Тэ мый сэнi ёдіяс йывсьыс казътывлiн?— видзчысяна шыасис Веньö.

— Шуа, мися, дас кымын зэвгырьсь ёдi мездiс,— тöдчöдiс Öльöш.

Вежон нин Веньö виччысис, кор Ёля тыын ёдыс кыпöдчас. Вит ботан вöйтiс, лункосмöсөн найöс лэпталіс да на местаö выльясöс вöйталіс. Весиг и кöдзыд ваас угодыöыс дуксьыліс. Талун асыв видласигас шай-паймуніс: ботанас матö дас зэвгырьсь розь.

— Ёк-маръёк, кодi нö тайö пакöститчöма,— чумаліс Веньö.

Друг, видзöдö да, прамöй ёдi öшйöма. Но пыж матыстчöмысь, буракö, повзис да чериыд заводитіс пессьыны-нöйтчыны. И ботанлөн синмыс... потіс. Гырьсь жö синма нельöд кулöмас сывъя сир гаровтчöма. Пыж дорын нин сійö нетшыштчис да мыніс. Веньö весиг ёрччыштіс. Гортас нин ботанъяссö öшлигөн казяліс, мый капрон сунисыс рыжмöма, быттö сисьмöма. Чуньöн инмöд-чöмысь сійö орис. Ладнö, мед нин кöть öти ботан. А танi нель-наныс öттшöтш. Тайö мыйкö гөгөрвотöмтор.

Коли лун нель-ö-вит. Ёля тыысь прамöй чери эз шед, кöть и кыйсян угодыöсö вочасөн вежлаліс. Веньö содтöд вöйтасис Мöвпас тыö. Сэтысь некымын гырьсь сир мачыштіс. Гортас ботанъяссö видліс, капрон сунис вöлі крепыд. Мый Ёля тыысь лэптöмаыс, мый Мöвпасысь. Кыйсьысылөн лов вылас вöлі нин кыпыдджык. Тöв кезлö öд колö черисö заптыштны.

Водiс воддджык. Войвылысь утка вöрзьöма. Аски асыв шуис пищальөн матiгөгöрсa тыяссö кытшовтны дай колö ботанъяссö видлавны. Муртса синсö кунис, кыдзи сійöс кодкö садьмöдiс. Сы водзын сулаліс эсiйö ыджыд тушаа дядьöыд. Бара эзысь пась-

көма, юрас сэтшөм жö рöма шапкаа. Чужöмыс мыйлакö лым-еджыд, но синмыс сюсь.

— Веньö, чеччы... Садымы, Веньö. Но тэ и узыысь Вень! Тöдін-ö? Аддза, тöдін. Ми тэ бöрся важөн нин видзöдам. Зэв жö ёна пакöститчан, Веньö. Эн вензы, а сюся кывзы. Матигöгöрса кызвын ты-вадсö куштöмөн куштін. Ёдыс талун Ёля тыын эм на, этшаника Мöвпасын. Со и ставыс. Сыктыв юлөн Джуджыд йирыс тэнад зильöмөн жö кушмис. Дерт, токнад сын-сирсö он ви-бырöд. Но сы пыдди ботаннад зэв уна кыян. Первойсö аслыд, гöтыр-челяды да рöдвужлы тövбыд кeжлö заптін, а öнi — ву-засян, сьöм нажöвитан. А тайö пакöститчöм нин. Öвсьы, Веньö, öвсьы. Вөр-ваыд öд водзöс босьтас...

Лёкысь горöдöмөн Веньö садмис. Брöд ва, весиг эшкыныс кöтасьöма. Чеччис да кöдзыд ва юис. Бөр водіс.

— Вöтаси али вемсөн аддзылі? Сё сötана, колö жö ташöмыс-лы лоны,— майшасис Веньö.

Гöтырыслы мышкөн бергöдчис да унмовсис. И бара вöтасис. Со ботанас комын кымын ёдi öшйöма. Ваыс весиг пузьöма. Но пыжö ботансö лэптiгөн быд чери мыйлакö дэльöдчö, кодсюрö кывсö петкöдлö, мукöдыс вашъялöны... Сыв ылнаöдз сибöдöны чери кыйысьöс, а сэссия пыж ныр весьтас ваас мынтöдчöны. Ботаныс син водзас резьдö-орö... Веньö лёкысь ымзö, но мыйлакö гөлöсыс абу. Синваыс мортыдлөн шорөн нин визувтö. Öд та мында чериысь ни öти киас эз веськав. А найö, ёдиясыс, йир весьтас ва веркöсас кыпöдчöмаöсь, бузъялöны-ворсöдчöны, быттö радлöны, мый Веньöös сяммöмаöсь бöбйöдлыны.

Нель час асылын Веньö сувтiс нин. Юрыс вöлі сьöкыд, быттö вежон юис-кодаліс. Нопсö пельпом сайö шыбитіс да петіс керкаысь. Ывлаыс пальöдіс. Сöстöм сынöдсьыс лов вылас лоис лöсьыдджык. Көть вöлі пемыд, но кокниа восьлаліс. Туйыс öд ичöтсянныс бура тöдса. Пытшкös ты дорын пищальсö киас босьтiс. Ва вылас, кылö, утка чукөр шлывъялö.

— Оз öмöй шойччыны? Водзджык жö на садмöмаöсь. Али кодкö кöнкö эм,— майшасис морт.

Пашкыр коз пу сайö дзебсьöмөн матыстчис крут кыркötшö. Лыйöм йылысь и сёрни абу. Мушкаыс оз тыдав. Ланьтöдчис. Сійö бура тöдіс, мый тані, тыслөн паськыдінас, пуксьöны уткаяслөн медсягырысь кельöбъясыс. Кадыс быттö нюжаліс, и некыдз эз югды.

— Часлы, терпityшта на,— асьсö лөньöдіс Веньö.

А уткаыс сэккості, быттö повзьöмаöсь, берег дорсьыс кежисны, мöдарас сетчисны. Друг шуйгалавывсьыс шковгис лыйöм, мöд, коймöд...

— Тыпу, сё сötана! Кодкö пановтiс,— дöзмис Веньö.

Веськöдчис Няйт тылань. Көть сэтчö, дерт, карсаяс машинаөн важөн нин локтiсны. Югдöмсö тшöтш кöнкö виччысьöны. Джын туйсö эз мун, кызди Няйт ты дорын заводитісны лыйсьыны. Сі-йö кежис Мöвпас тылань. Мöд помас сöмын подөн поэьö воöдчыны. Веньö тэрыбджыка заводитіс восьлавны. Ылісянь на ка-зяліс зэв ыджыд кельöб.

— Да тайö жö зукъяс! Найö рамöсь, дерт, сибöдасны,— радлыштiс морт.

Вөртіис кытшовтіс, гусьёникён петіс тылань. Пидзёсчаниясьмён сибёдчис, мед нин матёдзык воёдчыны. Но уткаыс ва вылас эз вёвны. Лэбисны?

— Со тэныд талун и утка шыд,— тшөкмуніс Веньё.

А гёгөр шковгисны-луйсисны. Сёмын тайё пельөстіис утка эз лэб. Вёралысь лэччис дзик ты дорёдзыс да пуксис вутш вылө. Виччысис.

— Оз вермы лоны, медем таті кельёб либө өтка пөтка эз лэбны. Виччысьлам, кадыс эм на,— шөпкөдіс Веньё.

Ылысса ты помын тыдовтчис вит-ё-квайт утка. Найё лэччисны да дзик ва весьттіис лэбисны. Веньё весиг эз вөрззы. Дерт, оз кут виччысьны налысь пуксьёмсё. Сы весьтё воасны да кыкнан стволсьыс грымөбтас-лыяс. Но сё метр ылнаын котырыс мыйлакө крута кежис веськыдвылө, кыпөдчис да пуяс вывтіис визьнитіс Сыктыв юлань. Ты вылас некод эз вөв.

— Мыйысь и повзисны,— шензис морт.— Некод быттё абу.

Вит минут мысти бара кык утка зук ты помсянныс сылань веськөдчыны. Тайөяс, дерт, со эстчө, турун сюрас, и лэччасны. Но та пыдди метр сё ылнаын кымын бара веськыдвылас шыбитчисны.

— Тыпу, керисны кө-а,— потіс Веньёлөн терпенньөйс.

Чеччигмозыс видзөдліс ты помланьыс. И вомыс калькмуніс... Метр сё ылнаын пожөмъяс шөрас кымын, дзик берег дорас гөвкьяліс... эзысь блюдыд.

— Екуня-ваня! Космосысь, сюра-бөжаясыд, воөмаось кө-а... Али узя-вөтася,— гора шуис Веньё да мыйлакө бөр жмоткысис вутш вылө.

Синсё сійё некумынысь куньліс, көдзыд ванас чужөмас резыштіс... Збылысь, тылөн чукылас, пожөм шөрас кымын, сынөдас өшйөма мөдарө путкыльтөм блюд. Тайё пөрийө биясыс эз югзыны. И кызди водзджыксё эз казав? Друг да кыськө пуяс костысь чеччыштісны кык горда да стөч Веньёлань веськөдчисны. Вёралысь весиг лалавнысё дугдіс.

— Часлы, кыкнаннысё босьта, со эсійө турун весьтас сёмын колө медводдзаысьсё метитны-луйны,— радліс Веньё.

Лөсьыджыка пуксис, коксё зэвтис, мед другөн ырситны-чеччыштны да пезьдыны. А сэсса лоис виччысьтөмтор. Эзысь блюдлөн бокын өзийсны да заводитісны котравны ярьюгыд бияс. Гордаяс пыр жө веськыдвылас чепөсйисны.

— А-ак, сё сөтанаяс!— ёрчыштіс пузьём-дөзмөм Веньё.

— Мый пинясян? Коді тэнö этатшөмасө дөзмөдіс?— мышсянныс юаліс Володь суседыс.

— Да со эсійөяс!— кинас Веньё шеныштіс ты чукыльлань.

— Некод сэні абу да... Али төрыт даръясин?— чуймис Володь.

— Кыдзи абу,— весиг повзискодь Веньё.

Бергөдчис, а сэні збылысь некод абу. Веньё кинас синсё тільыштіс. Сэсса мыйлакө пернапасасис. Юрсө довкйөдлөмөн кайис Володь дорө. Киасьём бөрын пешисны чигаркаяс.

— Коді нө сэні уткаыстө полошуйтө,— бара шыасис Володь.

— Да сё мокасьт, карса тай пожөмъяс костас сувтөма да кинас заводитө шенасьны, кор уткаыс мелань веськөдчө,— дорйысигмоз рама шуыштіс Веньё.

— Эм өти ййоват дядьö, öчкиа, морöсас бинокль. Кольöм во тадзи жö вöлі дöзмöдчö. Киас на босьтöма еджыд чышгъян. Уткаяссö повзбöдлö. Ме сэсся юрсыйс вылітіджык ді вывсянныс өти стволсьыс лöсышти. Метр сё ылнаысь. Öдйö тай усыйсис,— гораа серöктіс Володь.— Тöдан, сійö менсьым ботанысь на черисö вöлі мездалö да ваас бөр лэдзö.

Да-а, Веньö колис уткатөг, весиг ни öтчыдысь эз лый, көть синнас, гашкö, сёös аддзыліс. Мөвпас тыысь шеді дзик öти сир. Ёляса ботангяс вöліны тыртöмөсь.

Колис лун бöрся лун. Со нин еджыд бобувгяс гөвкъялісны сынöдас. Прамöя кöдздöдіс. Таво Веньöлы некыдз эз везит. Сбöд уткалөн кельöб бöрся кельöб лэбисны, а сійö ни öти пöтка эз чергöд. Татшöмсö мөвпыштыны эз лысылы. И черитөг таво колис. Көть арся ёділысь кыпöдчöмсö ёна виччысис. Сё чудеса дай сöмын!

Талун асыв Ёля тылөн берег дорыс некымын метр пасыта ййөн кенясöма. Пыжнас петігөн первой йисö потшкөн жуғліс.

— Таво вылö, тыдалö, шабаш! Лэптасьны лоö. Аски вой, гашкö да, йиыс сувтас,— ропкöдчис чери кыйысь.

Медводдза куим ботаныс ставнас розьöсь. И кутшöм мутиыс пакöститчöма? Нарошнö кö-а кодкö косявлöма? Берегас эз кут петны, көть пыж пыдöсас ваыс мыйтакö öкмис. Син водзын ваыс йизис. Нельöдсö, режгя угоддьöсö, тöрыт сёр рытнас нин выльлаö вöйтліс. Тадзи кöсйис ылöдлыны черисö. Друг пö да таті кельöбыс мунас. Ботаныслөн помыс йи улас. Та вöсна мöд пом весгтас воис да пелыснас крукыштіс. Бур, мый таладорас тыыс вöлі ляпкыджык. Муртса лэптіс пыжас ботан помсö, пыр жö гөгөрвоис: мыйкö прамöй шедöма. Угоддьöыс со ставнас нетшкысö.

Сбöлöмыс радысла заводитіс чеччыны. Чигарка помсö сбöвзис ваас да кыпыда кыз тай а-акнитіс! И сійö жö здукас юрас бытгö нöшкөн вартісны: сё мокасыт, сійö ас нэмнас на некор тыö ни юö дульвасö эз лэдзлы, а тані со сигарет помсö сбöлыштіс.

— Адöй-адöй!— сöмын и артмис.

Но ботаныс ставнас нетшкысис. Веньö мурчкурччис пиньсö. Лабутнöя да лöня сыныштіс пелыснас. Сбöд ва пыдöссьыс петкöдчис мыйкö паськыд да еджыд.

— Ёді! Эта ыджда!— ышловзис Веньö.

Татшöмсö сійö весиг эз аддзгв. Чериыс вöлөм виж, пöданысь на паськыд. Муртса мездіс, мöд сэтшöм жö ва веркöсас кыпöдчис. А водзын нöшта некымын. Пыж пыдöсас ёдіяс пессисны. Веньö муртса эз усь, кор кодкö на пиысь кыз тай бöжнас сизгдыштіс пидзöсас.

— А-ак, сё сötана! Пыжад лöнны он вермöй,— радпырысь броткöдчис Веньö.— Лов вылас вöлі лöсыгд. Эта мында чери! Некор на ас нэмнас татшöм гырысь ёдісö сійö эз кыйлывлы.

Чери кыйысьыс мыйлакö эз казгв, мый пыжыс сбöктаммис. Шуйгаладорас ёна нин катовтчис, сэсся пыжыс гөгөр йизис. Йи визь дорас вотöдзыс кыптіс матö дас ёді. Вуграсьыслөн ставнас вир-гас заводитіс лбöзгыны. Мездысигас кийс посниа тіраліс.

— Эта мында ёді! Эта мында!— шöпкöдіс Веньö.

А сэсся лоис виччысьтöмтор: медбöргя чери дорас нюжöдчи-

гөн пыжыс катовтчис и Веня увланыюрөн тельскысис тыас. Ва-
ыс сотыштис вир-яйсö. Ва веркöсланьыс сыныштігөн сы син
водзын ёдіясыс, быттö ыджыд кабалаяс, тэрмасытöг отарö-мö-
дарö визьнитісны. Вом тырнас кватитіс сынöдсö, а орччөн пыжас
крукасьом ботанын пессис бөрья ёдіс.

— Тайöс көть колö мездыны,— Веньö гораа шуыштіс.

И колö жö лоны, режйис гаровтчис брезент плащыслөн ки-
зяс. Öні ботаныс да вазьом паськöмыс, сьöкыд из моз кыскисны
ты пьдöсö. Морт кватитчис эськö пыж дорышö. Но йизьом
пöвйис вильснитіс чуньяс увсьыс. Сэки сійö кыкнан кинас дай
пиньнас шашаритчис пыж дорышö. Выныс öдйö бырис.

— Бласлö Кристос, пом, тыдалö, воис. Коді и отсалас,— сьö-
кыда ымöстіс Веньö. Сэсся выныштчöмөн горöдіс:— А-а-а!

Сы син водзас бергалісны кольквиж кытшьяс. Чуньясыс эз
нин кывзысьны.

Ставыс, буракö,..— удитіс думыштны сійö.

...Гөгөр вöлі лым еджыд: и сы весьтын, и шуйгаладорас.

— Кытчö ме веськалі? Али вöтася?— чуймис Веньö да муртса
юрсö бергöдыштіс.

— Видзöд, ас саяс, буракö, воис. Куим вежон мортыд пласьт
куйліс,— кодкö, кылö, шуис.

— Кöні ме?— ышловзис Веньö.

— Кöні-кöні, дерт, больничачын... Висьтав врачыслы ыджыд
аттö, мöдарьяугыдсьыс тэнö öд перйис,— бара кодкö вочави-
дзис.

— А-а-а,— муртса кывмөн шуыштіс Веньö.

Сэсся мöд, тöдтöм гөлөс вöзйис:

— Вай петалам да тшынасям-куритчам...

Дзуркнитіс öдзöс. Вежöсын лоис лөнъ. Веньö вөрзыывтöг куй-
ліс. Вир-яйыс ёнтис-сотіс, гөгөр ставыс мудзöма... И сійö синсö
кунис. Друг сы весьтö кодкö быттö сувтіс. Со тöвруыс пöльыш-
тіс чужöмас. Висьысь восьтіс синсö, да вомыс вежыньтчис. Сы
водзын сулаліс... эсійö лэбалысь блюдсьыд петысьыд: ыджыд
тушаа, эзысь паськöма, би водзас лöсталысь тешкодъ шапкаа,
чужöмыс мыйлакö лым еджыд, но синмыс збыльысь зэв сюсь.

— Тöдін-ö, Веньö? Аддза, тöдін,— негораа сёрнитіс лым
еджыд чужöмаыд.— Помнитан менсьым кывьясöс? Кор тай шу-
лі, öвсьы, мися, Веньö, вөр-ваыд водзöс коркö да босьтас. Эн
кывзы, а жаль. Йиа ваыд пальöдіс-ö? Медбөрьяысь öлöда.

Вежон бöрся вежон колис. Веньö тапикасис нин бурдöдча-
нінса посводзті. Но öшинъ дорö поліс матыстчынысö. Нельöд
судтасянь бура тыдаліс муса вадорыс. Кольöм пекнича дыр ви-
дзöдіс Ёля тылань. Ок, эськö йи улас кö öні вöйтны ботантö...
Сирыд да ёкышыд буретш ва турунас кынöмпöтсö перйöны.
Муртса та йылысь сійö мөвпыштіс, кыдзи стеклö сайын, быттö
кутшöмкö торья гадь пиын, петкöдчис космосысь эсійö локтысь-
лөн мыгöрыс. Лым еджыд чужöм вылас ни öти вир сөн эз вөр-
зыыв. Но сэк жö кузьсыс-кузь чуньнас грöзитіс Веньöлы... А
морт таысь весиг тшöкмуні, сьöлöмыс жö сэтшöма öддзис, тайкö
морөссьыс чеччыштас. И юрыс бергöдчис. Кынан кинас шаша-
ритчис стенмö. Син водзас вöліны кольквиж кытшьяс... Кодкö
казялöма да горöдöма бурдöдысьясöс. Кор Веньö воис ас садьö,
врачыс тшöктіс вежон куйлыны.

Колис некымын во. Ёля тылөн медся чериа пельёсын некод эз ботанась. Веньö мыйлакö чери кыйöмысь öтдортчис. Суседъ-ясыс некыдз талы эскынысö эз вермыны. Лавка дорын сулалігөн ас костаныс бабаяс шöпкöдчылісны, гашкö пö, торксис да... А мый нöшта мöвпыштан? Чери-яйөн вузасьысь весиг став ботансö тöдсаяслы козыналіс. Вуграсьöм пыдди зонпоснийöс велöдіс бадь ньöрйысь кыны көрзина да кыдз йöгысь вöлавны быдсикас ловъя ловсö: уткаöс, юсьöс, урöс...

Прöстмöм местаö карса чери кыйысьяс босьтчылісны эськö кулöмасьны, но сэсся öвсисны. Посёлокын олысьяслы, кодъяслөн йөрö ассъыныс машинаяснысö кольлісны, пернапас чöвтöмөн висътавлісны тешкодъторъяс: то ёді кельöб ва веркöсас кыштöма да пöдан пасъта ёдіясыс берегын пукалысьяссö быд ногыс дэльöдöмаöсь, весиг пö кывсö, мутиясыд, петкöдлісны; то тылөн веркöсті восьлалысь тешкодъ дядьöös адзылöмаöсь...



Алексей ВУРДОВ



Вунлытѡм тшупѡдъяс

В И С Ъ Т

*Сиѡма ай-мамлы
га пѡль-пѡчъяслы.*

Пыгди пуктана лыгдысьысь!

*Тайѡ висьтыслысь подувсѡ артмѡдѡма збыль вѡвлѡмторъясысь
и пѡшти абу вежѡма, лѡсьѡдлѡм согталѡмыс чус чунь гыж мында.*

*Веськыда кѡ шуны, война кадся коми сиктса олѡмсѡ тѡдмав-
ны да гижны зэв сѡкыг. Вунлытѡм гѡльлун, тшыгыялѡм, матысса
рѡдвужѡс ыджыг тышын воштѡм, сѡкыда уджалѡм и вѡрѡгѡс
пасьвартѡмѡ ыджыг эскѡм — тайѡс ставсѡ сэкса олысьяслы
коліс терпливѡя нуны ас вывтійс.*

*Слѡбѡда-Яг грездысь тыш вылѡ мунліс сизимгас кѡкъямыс му-
жичѡй, а гортаныс воис сѡмын гас кѡкъямыс гѡгѡр, дай унджы-
кыс сѡкыг дойясѡн. А ки вылас челядьѡн кымын дѡва коли вер-
дысьтѡг?..*

*2007 воын быри тайѡ грездысь петлѡм войнаса медбѡръя ве-
теран, Вурдов Алексей Андреевич (мена́м гядь).*

*Ѳні бура уна коми грездын олѡмыс кусі, но колісны нѡмѡвѡй-
ся вужъяс да память. Думыштчѡй!*

Ѳльѡш Вурдов.

МЕДВОДДЗА ЮКѲН

Лука котырсяя

Сюрс ѡкмыссѡ комын кѡкъямысѡд вося тулысыс эз лышкыдав
шонѡдѡн. Кутчысис вежласяна поводдя: пѡльтіс войтѡв, а шочи-
ника петавлысь шонді сѡмын ульдѡдліс дзобалѡм лымсѡ. Но
Ыджыд Лун заводитчис мича, югыд асылѡн.

Мить Наста войбыд пѡжасис да месанитіс пач дорас. Пась-
кыд нянь кодлаын чукойѡн тѡчалѡм банійѡм житей да шаньга
ѡвтісны чѡскыд дукѡн, орччѡн век на руалісны сир чери кур-

никъяс. Көзйяка өккуратнөя вевттис вөчөмторъяссө кык сөстөм чышъянөн да гусьөн пернапасалис. Сэсся кык ыджыд тасьтё тэчис пуом пувъя кисель да петкөдіс көдзөдны чуланас. Пытшкөс жырсыс мыччысис көзйин, Павыл Гриш. Сулалыс көлыса кык кизя кузь сера дөрөмсө вөнялөма, малюстин материяыс выльөн вурөм сьод гачыс мичаа төдчөдіс олома мортлыс статя тушасө. Сійө малыштис кимөдзнас дзормөм тошсө, сувтис паныд ен пельөс водзас да куимыс пернапасасис берба-баля росъясөн мичмөдөм образ вылө видзөдөмөн.

— А любөйө Настө, Кристос воскреси!— шыөдчис гөтыр ді-нас.

— Во истину воскреси!— воча пернапасасис нывбаба.

Мужичөй куимыс инмөдчыліс вом доръяснас Насталы бан бокъясас, мыйыс мөдыс яндысян нюмөн шөпнитис:

— Вердысьо менам, көть и кольөма томлунным, а Енмыс видзө на миянөс да челядьнымөс. Бласлө Кристос!

Пырис пась морөса ной курткаа, кузь пеля шапкаа, лымйөсь ной көтіа бурлак молодец кодь Вань пиыс да пыр жө пошиктөмөн юөртис:

— Вөрысь воисны! Вөр лэдзысьяс воисны. Васьным вуж дод-дөн двор дорө керъяссө катис. Регыд гортө локтас, вөвсө картаө пыртөдас да... Медлым гөтырыслы на висьтала.

— Но слава богу! Воөдчис ас кадө, асы он төд, мый и ду-майтны вөлі,— воча шыөдчис мамыс да юалис.— А бур пиө, куйөдтө петкөдалін?

— Да, да, мамө! И вольөс вольсалышти. А этайө,.. сьод ыжыс, дзик йөймөма, гартчө кок улын да баляяссө повзьөдлө. Небось Серукным тай рам, эз и вөрзьев куйлігөныс. Мөда нөшта ва катла, сэсся вөлисти пөрччыся да мысся,— том морт бөр вошис өдзөс саяс.

— Дөдө, видлы суртө. Воөма али абу?— вөзйис гөтырыс пач бердас сулалыс лагун вылө индөмөн.— Видлан?

— Пөжалуй, ог өткажитчы,— нюмдыштис көзйин да пуксис юр пызан саяс.— Ак! Вөсьөйө, бур! Лючки воөма!— ышловзис Павыл Гриш неумыныс гулькнитөм бөрын.— Вот Клавдейным, Клавдейным волас али оз мужикыскөд? Медөс лунсянь эз шыөд-чыв, кыдзи-сык олоны Макарыбаныс, нинөм ог төдө. Кодкө тай висьтавліс, Гриш Микөлыс коксө пө дойдлөма. Но сійө төлка мортис, бур верөс, ладнөй, нинөм и шуны.

Обед кежлө Лука котыр ставныс чукөртчисны ай-мам керка-ас. Көть мый, а Павыл Гриш радліс сьөлөмсяныс. Ыджыд семья кутыс вөлі стрөг, но веськыд. Быдөн төдіс тайөс и өбида эз кут. Весиг кор нельнан пияныс, верстьө мужичөйяс, серам пыр казътылісны айыслөн кымөсаныс паньөн лотшкөмъяссө, көзйин сөмын нюмъяліс. Ыджыд мывкыда, олома морт кужис кутны асьсө и челядь дырйиыс, и мукөд йөз костын. Небось уна эз большы, а нарадитис стөча шуөмөн. Колхозын Лука Павыл Гришөс донъялісны кыдзи сюсь кыйсысьсөс да вөв додьяс бур вө-чысьсөс.

Мый-мый, а быдсяма колана уджалан көлуй кипомыс вөчө-мын йирваса мужичөйлөн сямыс да зільуныс тырмыліс. Төвнас вежджык вөраліс, тувсовъя гөра-көдза бөрти чери кыйис, гөжө-мын тшөктөм серти төв кежлас водзвыв додьяс дасьтис да удит-

ліс на и турун каригӧн ассъыс пай пуктыны, а арнас урожай идраліс. Дерт, татшӧм удж-могъяссӧ вӧчисны и Слӧбӧда-Ягса мукӧд олысьяс, но быдӧн ас нога... Со и ӧні, кык юкӧна ыджыд олан керкагӧгӧрса йӧр пыткас керъя подув вылын радӧн-радӧн куйлісны додь сьув вӧчасъяс, тувъясӧ ӧшлӧмӧн шупалісны том кыз пуысь мегыр модаӧн зэвтӧм тшытшъяс. Неылын, сайник вевт улас тыдалісны ӧта-мӧдныс вылӧ кымыньтӧм куим кора додь. Сэні жӧ, стенбердса джодж вылас вӧлі тэчалӧма колян воын на дасьтӧм веськыд да шыльӧдӧм вожъяс.

Кор кузьмӧдӧм пызан сайӧ пуксялісны ставӧн, ыджыд семья кутысь сувтіс шуйга киас бербарос кутӧмӧн. Сӧмын сэки кыпӧдчисны мукӧдъяс да ен пельӧслань видзӧдӧмӧн пондісны шуавны ай-батюшко бӧрсьыс. Павыл Гриш ньӧжмыда лыддис буркыв, славитіс Енмӧс вердӧм-удӧмысь, сэсса чӧвтіс пернапас да пуксис. Здук мысти босьтіс ассъыс серпас сера кӧрт паньсӧ да паньыштіс руалысь на яя шыдсӧ. Тошсӧ малыштӧмӧн Павыл Гриш нюмдыштіс гӧтырыс вылӧ видзӧдігмоз:

— Ак! Чӧскыд!

И пызан сайын пукалысьяс пондісны ӧтвылысь паньясны пу паньясӧн.

Шуны кӧ веськыда, кынӧмпӧт веськӧдігӧн эз позь ни сӧрнитны, ни бергавны. Но тайӧ гажа лунӧ кыпыд руа кӧзяин вежыштіс оласногсӧ:

— Менам донукъяс! Абу грек талун гажмыны. Вайӧ жӧ кыпӧдлӧ сур кружкаяснытӧ да бласлӧвитӧ быдӧн ай-мамнытӧ да челядьнытӧ. Мед Енмыс водзӧ вылӧ сетас миянлы шуд да дзоньвидзалун. Да мед нянь-сов век вӧлі пызан вылын. Бласлӧ Кристос!— шуис Павыл Гриш да кружкасӧ тшук кыпӧдлӧмӧн юис джынсӧ.

Та бӧрын надзӧникӧн воссис сӧрни и войтыр костын. Моньясыс — Кӧсьта Парась, Гриш Педьлӧн гӧтырыс, да Степ Васса, Гриш Васьлӧн гӧтырыс — лӧня варовитісны пызан дорын пукалысьяссӧ могмӧдӧмӧнмоз, матушканысӧ шойччӧдісны.

Сэсса челядьыс бур кывъясӧн аттьӧалісны ай-мамнысӧ, да вӧлисти медічӧтыс, Вань, босьтіс киас гудӧксӧ. Мича шылад паськаліс уличаӧдз, а Мить Наста нылыскӧд заводитісны нюрк-йӧдлыны радейтана мыла сьыланкывнысӧ:

**Джуджыд керӧсын,
Гажа нӧрысын
Ӧтнас важ керка
Сулалӧ дыр...**

**Керка бердӧдыс,
Дзоля эрдӧдыс
Дзольгӧ-визувтӧ
Ичӧтик шор.**

**Вӧрлӧн шувгӧмыс,
Тӧвлӧн увгӧмыс
Ӧтка керкаын кылӧ
Кӧть кор...**

Регыд и мукӧдыс горӧдчисны на бӧрся. Васьлӧн Саш нима квайт арӧса нывкаыс матыстчис дедыс дорӧ да нюжӧдіс вӧснны-

дик кияссö. Мöдыс босьтис нучкасö, пуксьöдiс водзвылас да окыштiс юрдибас. Кор сьылöм помассис, небзьöм сьölöма кö-зьяин виччысьтöг синваасис.

— Дедö, вердысьö! Эн бөрä, ме тэныä ассьым дöра аканьöс козынала!— кыдзи кужис пондiс ланьтöдны нывка дедыслысь тошсö малалöмөн.

— Ог, ог, любöйö! Дона дзöлюкö менам!— шöпкöдiс воча дедыс, сэсся Вань вылö видзöдöмөн шуис.— Но-лы, пиук! «Кутш ёльнад» гажöдышты!

Гудöкасьысь сувтiс да гораа сьылöмөн вазöбтiс йöктан шылад. Павыл Гриш нучкасö мездорас кутöмөн медводзöн петiс джодж шöрас да öти кинас öвтигмоз кутiс зымöдны кокнас. Найöс первöй кытшовтiсны нывбабаяс, а бөртиджык кыз вермисны тöрöдчисны и мужичöйяс.

— У-у-ф! Лолö тырис! Тырмас!— пошиктiс мудзöм дед нывкасö лабич вылас пуксьöдöм бöрын.— Кажитчис-ö лайкъясь-нытö, Сашö-ö-ö?

— Дедö, нöшта, нöшта!— сералысь нывка тапкöдiс кокнас да дөрöм бөжöдыс кыскис пöрысь мортöс йöктыны.

Бур, мамыс казялiс да кежöдiс дзöлюксö батюшко дорсьыс:

— Сашö, оз позь таdzi! Дедад мудзис, эн дöзмöдчы. Лок мекöд йöктыштам.

Буретш сэки керкаас пырис Павыл Вась, видзаасис да рам-лун вöснаыс кöсийс нин бөр петны, но вокыс пöрчкöдiс сылысь вылыс паськөмсö да сойбордöдыс вайöдiс пызан саяс.

— Зо, Гришö, тян и сiдз унаөн. Вай аски пырала,— яндзим-пырысь шуалiс Павыл Вась.

— Дугды, вай жö панясь да чепась, мый Ен сетiс. Татшöм югыд празьникö öтлаын и колö празьничайтны,— сёрнитiс Па-выл Гриш.— Асы, челядь гажöдчöны, ачым йöктыштi. Вай босьт сур кружкасö, да шуд вöсна и юам. Челядьö, вöсьöйö, шойччыш-тö, ньылöмнытö чышкыштö да пуксьылö пызан саяс, дядьныдкöд точнитчылö...

Нывбабаяс бара пондiсны сьывны, а кык вок сёрнитiсны ас костаныс Пони Субач бердö чукчи койт вылö кайлöм йылысь. Павыл Вась висьтасис, мый Сандыр пиыскöд кöсийöны пуктыны Ыджыд Субач йылö вөр керка да вöзийс панны öтлаын.

— Позяс, позяс, вокöйö. Но юнөдзыс овны на колö. А сэки катлам, Ваньöс босьтла отсасьны, дай Мить кöсийс карысь во-ны май помын. Видзöдлам, выйим на кадыс,— шуис Павыл Гриш.

Гажöдчöмыс нюжалiс сёр рытöдз. Макарыбысь гозья кольч-чисны узьны да сöмын водз асывнас мунiсны гортаныс.

Быд вьылунö грездса олысьяс чукöртчылисны колхозса прав-ление дорö, мед босьтны вежон кежлö нарад-задание. Öнi, гöра-кöдза водзвылын, дасьтiсны колана уджалан кöлуй, дзоньталисны вöв сийöс-завод, кырссисны заптöм майöгьяс потшöс вылö, зыр-тiсны туйяссö лымйысь... Но медся пöсь пöраыс вöли грездса дорччысьяслөн — Йöгөр Кöсьталөн да Сöпрөн Васьлөн — найö пöшти лун и вой зилисны дорччанiнас. «Амысь дорны, абу пу тув волавны!»— радейтлис воча шуны Кöсьта, кор сийöс тэрмöдiсны мыйкö вöчны. Көть и олöма морт нин вöли, а мөлөтъяснас чача-ясөн моз ворсiс. Отсасьысьяс, Вась, ёна зилис ыдждöдны ассьыс кужан-сямсö, мыйысь Кöсьта некымынысь пасйылис том мужи-

чѳйѳс ошкана кывѳясѳн. Но дзик неважѳн артмис ѳти лѳсьыд-тѳмтор, мыйысь Йѳгѳр Кѳсьта ѳна и скѳрмыліс ѳртыс вылѳ. Асьвнас Вась петіс удж вылас мудзѳмѳн да узьтѳмѳн: войбыд кѳчѳ-ясѳс керѳс гѳгѳрын кыйѳдіс-луйис, а югдігас и тарѳясѳс кыйѳд-чис. Эськѳ и прѳмыс шедѳдіс тырмымѳн, и ас кадѳ дорччанінас воис. А Йѳгѳр Кѳсьта нем думайттѳг тшѳктіс Васьлы клепайтны таса тѳчасѳ агас пиньяс, тырмытѳмсѳ ѳтмоза дорны. Ачыс кайис скѳтнѳй дворѳ. Ѳбед водзын бѳр лѳччигас Кѳсьта ылісянь на казяліс: дорччанінсьыс тшын ни ру оз пет.

— Сѳ сизим дѳрѳмѳ! Тѳ нѳ мый, Васьѳ? Усьтѳмаыс кусѳма! Но-лы, сувт!— горѳдіс узьысь ѳртыслы.— Сѳ судит богѳ! И агасыс абу дась!

— Константин Егорович! А бур мортѳ, прѳстит менѳ! Тѳдлы-тѳг унмовси, войбыд кѳчѳясѳс кыйѳді. Саня нылѳлѳн аски чужан лун, а гортын яй весиг абу,— повзѳм Вась пыр и кутчысис пуш-канѳн ѳвтны.— Ѳй-йѳ-йѳ! Мый-а вѳчи? Ме ставсѳ бура лѳсьѳда да агассѳ дасьта помѳдз...

— Но сѳ сизим дѳрѳмѳ! Оз позь тадзи водзѳ вылѳ! А тѳдма-лас кѳ колхозса веськѳдлысь — ѳд юртѳ орѳдас! Ак! Пакѳсьт-ник!— скѳраліс Йѳгѳр Кѳсьта.

Сѳр рытѳдз сѳсся шойччитѳг мырсисны, мед помавны став уджсѳ. Да весиг вояс мысти унаысь на казьтывлісны тайѳ вѳв-лѳмторсѳ, а Йѳгѳр Кѳсьта шмоньпырысь юавліс Васьлысь: «Но, мый, кѳчѳвик, унмыд талун оз личкы?»

Гѳра-кѳдза водзвылын грездсаяс чукѳртчылісны колхозса правлениеын. Райкомса морт висьталіс видз-му овмѳсса шѳр могѳяс йылысь, а колхозса веськѳдлысь, Пепыл Вань, нарадитіс йѳзсѳ кывкутѳмѳн да зільѳмѳн ас кадѳ вѳчны став колана уджсѳ и вѳзйис челядѳлы да пѳль-пѳчѳяслы пуктыны ассъыныс пай.

Сѳрнитѳм бѳрын быд колхозниклы юкисны нур да сов. А сѳс-ся контора кильчѳ водзын гудѳкасьысьяс бура дыр гажаа сѳв-кѳдісны сьылан шылад. Ыззьѳм ныв-зон ассъыныс йирваса кад-риль гартісны, дай мукѳдыс мыйкѳ йѳктісны.

— Но вот, Ѳльѳшѳ, бура уджалѳмсьыд тѳныд почѳт грамота сетасны, а гѳтырыдлы гѳрд сатин материя тшытш! Хм! Мый-а тадзи не овны?— нимкодясис Сандыр кинас воксѳ тувкѳдѳ-мѳн.— Ме кѳсья жѳ почѳт грамота босьтны. Пѳнда лун и вой гѳрны!..

Кодкѳ горѳдіс серам пыр:

— А меным кѳ начальство сур лагун пуктас, ѳтнам гѳра-кѳдзатѳ эштѳда!

— А сѳ лешакѳ!— эз вунѳд шыѳдчыны и ѳсь кыла, мыкта-лысь, пѳрысь Прок Микѳл.— Вѳйтырѳ! Кутшѳм ті ѳдѳбѳсь! Улыс гачныд мед оз усь мырсѳмсьыныд, а то пакѳсьт вермас лоны, да кѳйдыссѳ дуксьѳданныд, гѳрд ударникѳяс!

Йѳз вакѳбѳн серѳктісны. Регыд шмонитѳм помасис, и грездса-яс разѳдчалісны.

Медводз кѳдзисны ид тусь, сѳсся пуктісны картофель, бѳр-ти — зѳр анькытшкѳд сорѳн да мукѳдсѳ.

Колис кѳкѳямыс лун. Уджыс муніс график серти. Кѳть и эз шыльыда быдтор артмыв, но колхозникѳяс зілісны, кыдзи вер-мисны. Мудзисны и вѳвѳяс, и йѳз. Эбѳс быртѳдз сир ньылѳм кисьтісны и том, и пѳрысь. Но некутшѳм шум-зык эз пансьыв.

Өтчүд лун шөр кадө грезд весътас енэжсяньыс кыліс гулыд шы. Муяс вылын мөссёркни кодзсыяс юрнысө чатөртөмөн чуй-мөмпырысь видзөдісны вывлань. Дугөдчисны уджавны и вөла агсасысьяс. Другысь, кывтыд помсянь лөк нога горзөмъяс повзөдісны уджалысьяссө. Вөлисти войтыр аддзисны скөра увгысь ыджыд көрт лэбачсө. Сійө шуркнитіс муяс весътті катыд керөс сайөдз да бергөдчис бөр. Пөрысьджыкъясыс усисны пидзөсьяс выланыс да дугдывтөг пернапасасисны, томджыкыс — коді котөртіс дзебсьыны, а коді повтөма грөзитіс кулакнас. Нывбабаяс пласъткысисны небыд му вылас синнысө куньмөмөн. И сөмын челядь пась вомөн видзөдісны гөгөрвотөм лэбалантор былө. А Марк Анөй, көть и арлыда морт, удитіс тай, майбырө, пышйыны гортөдзыс, пырны сараяс да дзебсьыны ыджыд пельса пытш-кас. Сэні жө, потшөсас кутчысьмөмөн, бура дыр лөк пон моз омляліс Пекла пөч:

— Сюраыс, сюраыс воис му былө! Сюраыс! Свят, свят, свят! Господи помилуй!

Зато Гриш Педь, коді Гражданскөй вөйна вылын вөйюитігөн аддзыліс нин татшөмкодь көрт лэбачсө, зіліс ланьтөдны йөзсө:

— Мый нө йөйталанныд? Дугдө дурны! Тайө ероплан! Нинөм тіян лөксө оз кар! Дугдө!

Юнь шөрын районса военкоматсянь воис юөр армияө босьтөм йылысь. А недыр мысти Слөбөда-Ягө воис и армияө нуөдысь, военнөй офицер. Көкъямыс новобранеч лыдын вөліс и Павыл Гриш Вань. Том войтырөс колльөдісны Пөлит грездса берегөдз, сэні прөщайтчисны и гажөн, и сьөлөмсянь бур сиөмъясөн, и гудөкөн ворсөмөн, и йөктөмөн, и сьылөмөн, и бөрдөмөн, и ас каран вина нылыштөмөн... Йирваса новобранечьяс петкөдлісны ассьыныс удалуннысө, да чуймөм офицер весиг фуражкасө пөрччис. Куим збой зон өта-мөднысө вежөмөн сувтсөн скачитлісны вөв вылын, а Гриш Вань гудөкасьмөмөн йөктөдіс велөдөм көбыласө. Сэсся мунысьяс куим пыжөн катісны Йирва ю кузя Пегыш вөлөкөдз, медем сэті вуджны Емва ю былө да воөдчыны Княжпогостөдз.

Во да джын мысти Ваньсянь воліс медбөръя письмө. Некод эз куж думыштны, мый красноармееч Вурдов Иван Григорьевич грездаяс пиысь медводдзаөн усьө Финскөй война вылын. Сійө кадсянь сэсся некор эз кывсьыв гудөкасьмөм Павыл Гриш керкаын.

А Слөбөда-Ягын олөмыс муніс водзө: ыдждісны кодза муяс, кыпөдісны выль скөтнөй двор, да буретш сэки колхозса правление корөмөн корис Гриш Педьлысь заптөм стрөйтчан керъяссө. Крестьянинлы быть ковмис сөгласитчыны, көть важмөм нин керкаас вит челядьнас збылысь дзескыд вөлі овны. Колхоз эськө көйыліс бөрти сетны сы мында жө, но эз тай артмы кывсө кутны.

Сійө жө воас өти гожся лунө артмис неминуча. Обед бөрас сэтшөма заводитіс гымавны-чардавны, весиг пон-кань дзебсялісны кытчөсюрө. И колө жө лоны, Йөгөр Анөй, лысьтысьысь, тайө кадө өтнас зыртөма куйөд мөс карта потшөминысь, и гымнөлыс пырөма өшиньөдыс да стөча инмөма нывбабалы.

Гриш Педьлы тшөкыда тшөктылісны дзоньтавны да тэчны выль пачьяс. Сійө ачыс телегаөн ваяліс сөй ляті гумла дорө, мукөдъяс лөдісны сійөс кирпич вөчан луясө, сэсся уль кирпичсө

тэчисны джаджъяс вьлӧ косътыны.

Медводз вьль пач пуктіс ясли-садын, а медбӧрын — колхозса правление керкаын. Уджъяссӧ помалӧм бӧрас Гриш Педь юӧртіс бригадирлы кирпич рӧскӧд йылысь. Мӧдыс пасйис карандашӧн нарадӧ колана лыдпасъяс да думыштчӧмӧн шуис:

— Тадзи и гижам! Та-а-к! Семь печей, а половина — пони пачов!

— Андрей Педӧрӧвич!— серӧктіс орччӧн сулалысь Гриш Педь.— Бура жӧ рочасьнытӧ кужан. Тадзи кӧ гижан, пыр и райкомӧ босътасны главнӧй бухгалтерӧн!

— А кызди нӧ пасйыны?— юалис бригадир.— Сизим печей али мый?

— Но, кызкӧ гиж дай, кыз кужан. Ме гортӧ муна сӧсся,— ӧвтыштіс кинас пач тэчысь да нюмпырысь содтіс.— Андрей Педӧрӧвич, бурджык лоӧ, гортад кӧ нылыдысь юалан, сійӧ школаын велӧдчӧ да арифметикатӧ бурджыка тӧдӧ.

Тадзи грездса олӧмыс и кыссис чукля визъясӧн, кӧні дзугласисны и шог, и серам.

— Сьӧд сира паньӧ! Асы, кутшӧмкӧ лӧк визь мӧдӧдчис, быттӧ туналӧма кодкӧ!— шенасис майшасъысь Гриш Педь айыскӧд сӧрнитігӧн.— Ваньлы керка пуктӧм эз ло, мӧснымӧс ош джагӧдіс, амбарнымӧс пышъялысьяс петкӧдісны! Ӧ-йӧ-йӧ! Ак! Сьӧд сира паньӧ!

— Да, бур пиӧ! Тэ прав... А керкатӧ, чайта, вьль онас кызкӧ, Ен могысь, стрӧйтам ӧтув,— воча шыӧдчис Павыл Гриш.— Бур, Емен Ӧнь гозъя юксисны, куксӧ тӧянлы сетісны, а сӧсся ӧд кӧзаныд пока йӧлӧн вердас. Нинӧм, кызкӧ тӧвъям, тшыгла ӧгӧ на кулӧ, кытчӧдз ки-кокаӧсь.— сійӧ малыштіс тошсӧ да синваасис, а сӧсся сибдӧм гӧлӧсӧн ньӧжмыда шуис:— Кытчӧ сӧ коньӧр Вань пиӧс гуалисны? Сідз, тыдалӧ, ӧгӧ и тӧдмалӧ. Юрсӧ пуктіс, гудӧкыс сӧмын и коли...

Но мӧд во пансис ыджыд да яр тыш фашистскӧй Германиякӧд — вунлытӧм Великӧй Отечественнӧй Война.

* * *

Лука котырысь гортаныс эз воны:

Павыл Гришлӧн — Вань пиыс;

Павыл Васълӧн — Сандыр пиыс;

Павыл Степлӧн — Мить да Ӧнь пияныс;

Павыл Йӧгӧрлӧн — Ӧнь да Микӧл пияныс;

Павыл Педълӧн — Ӧнь пиыс.

Векӧвӧйся паметь!

Мӧд юкӧн

Трудармеечъяс

«Красный пахарь» колхозса веськӧдлысь Мить Вань чукӧртчӧм йӧз водзын сӧрни помалігас нин содтіс:

— Войтырӧ, кодӧс шуи, аски асыв вуджанныд Слӧбӧда сикт-сӧветӧ, сӧні сетасны колана документъяс, да вӧлисти мунанныд

Косланё исполкомса секретар дорё. Он өтнаныд лоё: и Пысса-ысь, и Вашкаысь мёдысьяс чукёртчасны. Но, всё! Асы, кадсё мыйта коллялім сёрниён.

— А дыр-ё кежлө мунам?— юалис на кодкө.

— А ог тёд, бур йёз, Косланын, юрсиктын висьталасны,— вочавидзис Мить Вань.

Правление керкаысь петігөн колхозникъяс, унджыкыс нывбабаяс, ызьёмён нюжөдісны ас костаныс сёрни: «А сё лебедьё, некоді оз вермы висьтавны, кор войнаыс помасяс. Асы нин и вермытём, олёма мужикъяссё мөдісны трудоўой армияё босьтны. Сё благөслови, Кростос! Степ Анёйлөн медводз мужикыс уси, өні кыкнан пиыс пөгибнитөмаось! А лыддьыны кө, кымынөн нин юрнысё пуктісны! Төрыт бара юөр воис — Мить Насталён Вась пиыс усьёма...»

— Бабаяс! Дворё кайны пөра! Разөдчө, разөдчө! Уджыс оз виччысь!— тэрмөдліс кильчөсянь веськөдлысь да пырис бөр.

Мить Вань пуксис пызан саяс да чөв видзөдіс веськыда стелас өшалысь плакат вылө, көні гөрд рёма гижөдыс «Всё для фронта, всё для Победы!» чусыда төдчөдіс кыскө артмём ичөтик турунвиж печать. Кажитчис, розьодас бумагасө ёсь видзөдласнас. Но морт сьёкыда лолыштіс да юрсө копыртөмөн клапнитіс кабырнас пызанас.

Войся усьём лымыйс югзьөдіс южмём вөла туйсө, и Слобөдалань мунысьяс кокниа шлопкисны бедьяс вылө лэдзчысьөмөн. Ыркыд сынөдсьыс гөрдөдөм ныр-пельяс олёма войтыр синьяссё куньтыралөмөн кутчысисны орччөн да өткодь өдөбөн вочасөн ылыстчисны гортсянныс. Ас думъясө вөйтчөмөн куим ёрт — Гриш Педь, Гриш Степ да Йөгөр Олёш — чөв вуджисны сизим верста туйкост. Отчыд сөмын Гриш Педь юалис Гриш Степысь, эз-ө пөртсө вунөд. Мөдыс сувтіс да пөрччөм ташкасө видлөм бөрын вөлисти кватитчис кольөмторсө.

— А зо бара!.. Тыпу! Сё сюраө! Лёк юрнам, асы, джын олөмөс вунөді, зато паньсө кыкөс босьтсьёма,— дөзмөмпырысь шушкыяліс Степ.

Вөнялөм волялысь купайкаа, дөмаса кузь пеля шапкаа, чукая ныра бакилёяса сійө кутшөмкө здук на гыжъялыштіс гач пырыс ситан дорсө да бөр ташкаасис.

Сиктсөветын быдөнлы сетісны справка, кырымпасөдісны амбарной книгаын да вөр лэдзысьяскөд вөла тарантасөн пөпуттьө нуөдісны Рыныша веськыдөдз, көні кык пу баракын олісны вөр лэдзысьяс. Сэтысянь Косланөдз колис верст кызь гөгөр. Петөм водзвылас ас йөз юктөдісны найөс пакулаа тшайөн да вердісны пөсь рудзөг няньөн. Буретш вөлі восьтөмаось нянь пөжаланін да пывсян. А кыдзи мөд ногыс, кор пөч-пөльяс, нывбабаяс да челядь вөр лэдзёны и увъясьёны, керъяс вөлөн кыскалөны и штабельясө тэчөны, пуръясьёны и асьныс тулыс помын кылөдлөны Мозын кузя Лешуконскөйөдз.

Гриш Педь медводз ветліс делянка вылө, корсис ассьыс ыджыд нывсө, дас нель арөса Анёйсө, мед көть висьтасьны да ланьтөдны сывъялөмөн. Но прөщайтчигдырйиыс бать сьөлөмыс небзис сэтчөдз, мый ачыс синваасис. Тадзи батя-ныла сывъясьөмөн и бөрдісны. Да и мукөд, орччөн уджалысьясыс, эз жө вермыны кутчысьны лов курдөдөмысь.

Участокӧн веськӧдлысь, Мось Йӧгӧр, жутыля видзаасис тӧдса Слӧбӧда-Ягсаяскӧд да пуксис орчӧн скамья вылас.

— Вот ӧд, сё егена-гачӧ, олӧм-вылӧмыс! Челядькӧд да бабаяс-кӧд вӧюйта, а ог Гитлеркӧд! А мый вӧчны? План ыджыд, вылі-сянныс быд лун юасьӧны норма вӧчӧм йылысь, а менам вит морт висьӧны, кыкӧн доймисны, вӧвъяс оз тырмыны, да и сов, сакар да пызь регыд бырӧ. Дерт, картофель да кыд выйим на, тшыгла, чайта, огӧ на кулӧ. Да ӧд челядьыслы велӧдчыны колӧ, а найӧ сы пыддясь вӧр лӧдзӧны! Позьӧ мӧй тадзи? Терпенньӧӧ бырис нин районса власьткӧд вензыны, йӧй мортӧн нин кутісны менӧ лыддыны, сё егена гачӧ! Мый сӧсся каран?— скӧрпы-рысь сьавкӧдіс этшсьыс петӧм мужичӧй.— Мед ыджыд чинаясыс асьныс прӧбуйтласны!

Гриш Степ шпуктис каллянсӧ да некымынысь кызыштіс. Грек вылас ымралась пӧймыс тӧдлытӧг усис стӧча шоныд гач вылас.

— Ак! Сё сюраӧ! Сотіс, сотіс!— другысь чеччыштӧмӧн горӧдіс Степ да сьӧласьӧмӧн пондіс тапкӧдны сотчӧминсӧ.— Сё сюраӧ! Мый карі! Пакӧсть да и сӧмын лои! Тыпу!

Мужичӧйяс гитшкӧмӧн сералісны, а Гриш Педь шыӧдчис:

— Но вай жӧ, ёртъясӧ, пӧра и кокъяснымӧс мудзтыштыны. Степан Григорьевич! Тэнад и сідз гачыд куш дӧмаса, вӧвлӧм серыс оз тыдав — ог мӧдӧ нин дӧмсыны, воам Косланӧ да сәні дзоньталан.

Пемдіс нин, кор вӧлӧк вуджысьяс воӧдчисны Ыджыд Йиридз ю поскӧдз, кӧні пуксьылісны шойччыны. Юрсиکتӧдз сәтысянь — ӧтчыдысь несйыны!

— У-у-ф! Но и ньылӧді! Лолавны сьӧкыд, да и кокъяс дзикӧдз слабмисны. Майбыр, Ӧльӧш бура аддзӧ да водзын мунӧ, эськӧ кымынысь нин крукасьлі,— норасис Гриш Степ да перйис ташкасьыс бадькор чериа весът кузьта курник.

А Ӧльӧш содтіс:

— Степан Григорьевич! Тыдалӧ, век крукасьлӧмсьыд кӧмкотыд и чукуль ныра?

— Зо, вӧсьӧйӧ, Ӧльӧшӧ, тэ томджык, дугӧдчы серавны. Синъясыд кӧ торксясны, небось он понды шпыннявны пышкай моз. Асы, ачим кок увсьым ог аддзы немтор... Ӧ-йӧ-йӧ! И гос ни пӧльза абу некытысь. А-а! Мый нин элясьны? Да и коды? Асы, война вылын йӧз кулӧны ми вӧсна...— шыӧдчис Гриш Педь туиссьыс рысь ва юыштӧм бӧрын.

Арлыднаныс войтыр ӧна эз торъявны. Степ да Ӧльӧш ичӧтдырсянныс бур кыйсысьясӧн вӧліны. Зато Педӧрӧс мозынсаяс да йирвасаяс тӧдісны медся шоныд кӧмкот гындысьӧн да пельса вӧчысьӧн. Томдырйиыс сійӧ служитлӧма сарлӧн армияын, нӧшта и Будӧнӧйлӧн армияын Гражданскӧй война дырйи вӧв видзысьӧн вӧлӧма. Сӧсся висьмылӧма тифӧн, да демобилизуйтӧмаӧсь.

Тӧлысь мысти Слӧбӧда-Ягӧ гортсаясыслы письмӧӧн воис медводдза юӧр, мый трудармеечыас зильӧны Зӧвсьӧртын, сәні панӧмаӧсь ыджыд стрӧйба — фанера завод.

Йӧгӧр Ӧльӧш кӧ ас семъятӧг на оліс, то Гриш Педьлӧн нельныв быдмисны, а Гриш Степлӧн — кык пи да ныв. И став челядсӧ, коді петіс дас куим арӧсысь уджӧдісны колхозын, и эз сӧмын гӧра-кӧдза да турун пуктігӧн али урожай идралігӧн, но и вӧр лӧдзигӧн, сир перйигӧн, пуръяс кылӧдігӧн...

Тулысын май өкмысод лунö рытланьыс Слөбөда-Ягö сиктсө-ветысь воис медся виччысяна юөр фашистскöй Германия вермөм йылысь. Тайö вöлі Победа Лун! Гриш Педьлөн нывъясыс — Саш, Марöй да Раис — ичиньясыскöд öтлаын буретш пес карисны керös дорын да водзджык лэччисны, мед удитны пывсьыны.

Павыл Гриш дед пукаліс керка кильчö вылас да виччысис уджалысьяссö. Кор мудзöм нывбабаяс матыстчисны оланін дорас, дзормөм ус-тошка пöль паськөдіс кияссö да найös сывъялөмөн шуис:

— А любöйясö, вердысьö детяясö, öд войнаыс помассьöма!

Ставөн öта-мöдныскöд кутчысьöмөн ырскөмөн бөрдісны. Парма кузя паськалөм юөр öдйö чукөртіс уджалысь войтырсö колхозса правление дорö. Панісны митинг. Кодкö радлігтыр йөктіс да сьыліс, но унджыкөн гораа бөрдісны...

Вежон куим мысти гортаныс воисны трудармеечьяс, лэдзöмась тöлысь кежлö кыйдös заптыны — яй да чери, мед мөдöдны бөрти Зөвсьөртö. Укшалътчөм мужичöйяс висътасисны, мый тшыгъялөм вöснаыс уджалысьяс сэнi збыльысь пикö воөмаось, отсög колö. Дыр нюжмасьтөг куим ёрт сөвтисны пыжö кыйсян көлуй, рөскөднöй накладнöй пыр колхоз юкис налы нур, сов да сакар. Кыйсьыны катісны Йирва ю кузя Тшупта ты дорö, Йөгөр Ольошлөн сэнi угоддьöйс кытшовтіс.

Тшөкыд козъяиньясын рөчөн-рөчөн вöлі на лымъя, ты вылас шондi водзас көнсюрö сьöдвидзисны йи пластьяс. Тувсов ва көзйиничайтіс кыдзи көсийс — ойдөдіс берегдорса вöраиньяссö сьöртъясöдз да петкөдіс шөрланьыс быдсяма лөпсö. Но сюсь кыйсьысьяс бура төдісны, кутшөм лөнътасінö кулөмъяс вöйтавны, а кутшөм бадь нöрыс сайö ветель суйны. Таөдз Ольош кайліс аслас пас туй кузяыс матысса кыръясöдз да сиаліс йөра ветланінъясö кык пекля. Вой бöрын войтыр перйисны кулөмъясысь медводдза шедас: вöтага кебös, сир да ёкыш.

Свежöй пуөм чериөн чöсмасигөн Ольош медводз вильөдіс сир юрсö, сэсся ёкыш лыөн тайкö эз джагав. Көджводзö ветлөмөн дыркодь на гораа карксіс да бöрыннас мездысис жö сибдөмлы торсьыс.

— Ак! Сё лебедьö! И колö жö тадзи сатшкыны лыс ем кодълы торлы! Да-а! А öд сё дивö, ньöти сын эз дзугсьы, көть та пöраö уна шедлö!— сёрнитіс Ольош юквасö панаяліг.

— Нинөм эськö дивöыс абу да,— вочавидзис Гриш Степ.— Шондöдас — сэки и мөдас ас туйясті. Ме тай сідз думайта-а.

— А зо, войтырö, мед көть кутшөм эськö чери шедас да, сөмын унджык мед,— пырис сёрниö Гриш Педь да сир вылө индөмөн содтіс.— Асы, татшөмыс кө унджык сюрö — вот йöзлы и кынөмпöt! А мый? Сов тырмымөн, пöшти дас пуд чери вылө. Аслыным сёйны нöшта горда да зидач аски кежлö Ен сетіс. Майбырö, маета помассис!

Шойчыштөм бöрын ёртъяс рытивбыд сэсся вöчисны пес. Пöшти кык сыв мында тэчисны чипасö коз-войпу пукыльяссö, кызджыкъяссö — кык-куим пөв поткөддөмөн.

— А дыр-ö сэсся сартас биөн кутам овны, сё сираö? Öд менам гортысь воддза вося на сывдөм ош тшög босьтöма. Дерт, абу уна, чунь судта пыдös, но да тырмас мыйкö мында,— быттö паляліс Степ да перйис ташка зепсьыс ичөтик кучик тупляс.—

А вунӧдлі нин. Но-лы, Ӧльӧшӧ, тэ синмаджык, шӧрт помысь петель вӧч да биасьлы.

Сэсся куйлӧмӧн дыр на больгисны олӧм-вылӧм йывсьыс.

Войнас Йӧгӧр Ӧльӧш садьмис кутшӧмкӧ гора шыысь.

— Ӧ-ӧ! Мый нӧ лои? У-у-ф! Бласлӧ Кристос! Но, Степан Григорьевич, эн ӧбижайтчы, а тэныд ме чудита! Сё егена-гачӧ, узыны он сет!

Гриш Степ вомсӧ паськӧдӧмӧн гораа, ымзӧмпырысь, шкоргис.

Дӧзмӧм Ӧльӧш саӧсьтіс горъя пачас чуныяссӧ да надзӧник, мед не садьмӧдны, мавтіс узысьлысь чужӧмсӧ, а ачыс петіс бикур пестыны да пузьӧдны тшай.

Надзӧник югдіс. Гриш Педь велалӧм сертиыс садьмис водз да пырсӧ эз и казаяв, мый узысь Степлӧн чужӧмыс сьӧд визьяса. А Ӧльӧш, вӧлӧмкӧ, пуӧм чери нин лэпталӧма тасьтіӧ да виччысьӧ ёртъяссӧ завтракайтны. Ӗдзӧснас крапнитӧмысь садьмис и Степ да лэччыліс ва дорас мыссьыны.

Ӧльӧш да Педӧр кызди адззисны Степлӧн чужӧмбан вывсьыс мазитӧм «серпасъяссӧ», юрнаныс довкйӧдлӧмӧн гораа серӧктісны. Чуймӧм Степ медводз видзӧдліс увлань мешӧк моз ӧшалысь вӧнялӧм гач вылас, но нинӧм мисьтӧмсӧ сэтысь эз казаяв.

— Мый-а гӧрдланыд? Быттӧ посни челядь йӧй сямнытӧ петкӧдланыд!— ӧвтыштіс кинас да дӧрӧм бӧжнас чышкіс чужӧмсӧ.— А сё сираӧ, кытысь нӧ тайӧ саыс? Али стenas кутчысьлі, да мыссигӧн мавтчис?— артыштіс Степ.— Зо, дугдӧ сэсся! Абу лӧсьыд ті вылӧ видзӧдны.

— Ог, ог сэсся сералӧ. Лок, пуксьы сёйны!— корис пызан сайӧ дӧзмӧм мортсӧ Педӧр.— Эн ӧбижайтчы, кӧть эськӧ и мыссин да абу на юсь кодъ.

— Ладнӧ, ладнӧ... Быд воськовтігӧн вот гыркам лыйӧ. Эттӧс, тӧрыт тӧлӧдіс ва вылын. Кыдз-сык куснясьны мӧда талун, сійӧ да!— виччысьтӧг норасис Степ.

— Вай жӧ, Степӧ, талун керкаӧ кольччы, чӧжъяссӧ кушты да пусьы. А ми Ӧльӧшкӧд кулӧмъяссӧ видлам да кӧть пыркӧдам-весалам,— вӧзйис Гриш Педь.

Сӧмын рытланыс кыйсьысьяс воисны бӧр. Кыйдӧс вӧчӧм бӧрын лагун тыр чери гуӧ лэдзисны.

— Но талун бара Ен сетіс быдкаю чери да та мында!— Ӧльӧш дӧвӧля ошйысис Степлы.— Видзӧдлы, видзӧдлы! Мыйта шедіс! А сынъясыс кутшӧмӧсь, чер нуд кузяӧсь. Унджыкыс войладорся кулӧмъясас пырӧмаӧсь вӧлі.

— Да-а! Бласлӧ Кристос! Бура шедӧма! Но-о, ті бур кыйдӧсӧн локтіныд, да ме тіянӧс либӧ сыла яй шыдӧн чӧсмӧда. Кывнытӧ кылӧданныд! Ачым эг на панясь, тіянӧс виччыси,— воча шыӧдчис Степ.— Асы, пым изъяс вылын куйлышті, да лӧсьыдджык лоис, кокньӧдіс.

Куим ёрт ыджыд пу тасьтіӧ кос нянь торъяс тэчӧмӧн босьтчисны горша панявны чӧж яя нуръя шыд. Но Ӧльӧш да Педӧр пыр и дугӧдчисны сёйӧмсьыс.

Ӧльӧш нӧштаысь гудыртіс паньнас да кыпӧдіс неыджыд гез кузьята сьов, пӧлыньтіс вомсӧ, ылӧ шыбитіс сійӧс да видзӧдліс пусьысь вылӧ. Мӧдыс, быттӧ нинӧм эз ло, лӧпатитіс шыдсӧ.

— Но, Степан Григорьевич, объявляю Вам благодарность за вкусный шыд!— гораа шуис Ӧльӧш ёртыслы.

Степ сувтіс да воча шушкылялөмөн сявкөдіс:

— Служу Советскому Союзу!

— А уж чич тэныд, пусьысылы!— паныдаліс скөр кывъясөн Йөгөр Өльөш.— Коді нө лэбачсө сювъяснас пуө? Тыпу!

— А вөсьөйө, Алексей Егорович, сэні өд нинөм лёкыс абу,— правдайтчис Степ.

— Кывлі эськө, Степан Григорьевич, мый кыйсигөныд черисө картөг пуан-сёян, но татшөм угошшеннө йылысь думыштны эг куж,— содтіс нюмпырысь Гриш Педь.— Вай жө, ачыд и бырөд шыдтө, он кө, пөртсө юр вылад кыма.

Та бөрын Гриш Степөс пөрт дорас эз нин лэдзлыны. Шуд вылө кыйсысыясы троса лэчкас вежон мысти джагаліс бура ыджыд ай йөра. Сюсь мужичөйяс кужөмөн кулисны-пашкурайтисны вөрса пемөссө. Ты-муссө перйөм бөрын Өльөш Педөркөд бөрийөмөн торйөдліны пытшкөсса тшөг торъяссө.

— Вот и ном петөма, быд розьө пырө. Асы, пель пытшкам дзизгө,— сёрнитіс Өльөш кинас өвтчиг.— А тіянөс нө, войтырө, мый оз курчавны?

— А ми Степкөд, эттөс, абуджык дукаөсь, кыдзи тэ, сыысь номйис, Өльөшө, тэнө и радейтө,— шуис Педөр.

Яй туша торйөдлөм бөрын ёртъяс лэчкөдісны кыйдөссө көдзыд гуө. Мудзөмлаыс куимнанныс пласьтнитчисны керка водз-вылас лов лэдзыштыны. Сэки Гриш Педь и казяліс сісьмөм мыр вылысь лёк гагөс, пырысь-пыр кватитіс сійөс да гусьөн лэдзис орччөн куйлысылы гач пытшкас. Өльөш кутшөмкө здук куйліс вөрзыттөг, а сэссия тай, небось, көч моз чеччыштис кок йылас.

— Сө егена-гачө, сө егена-гачө! Кутшөмъя лешак пырөма пытшкө? Өй-өй-өй! Гильөдө!— пондіс горзыны кияснас тапкөдөмөн да места вылас йөктөмөн.

Повзьөм Степ синсө шаргөдөмөн куимысь пернапасасис да вөлисти серөктіс. А Педөр куйлөмөн гитшкис, эз нин вермы видзөднысө да.

— Вот дивөыд, вот дивөыд! И колө жө пырны гач пытшкө!— скөраліс Өльөш пөрччөм гачсө пыркөдөмөн.

Кор куим-нөль пудаа лагунъяс тырисны, кыйсысыяс вөрзисны гортланьыс. Яй-чериөн сьөктөм пыж пур моз кыпөдіс валъяс, а Йөгөр Өльөш дугдывтөг сьыліс.

Зөвсьөртө пошта пыр юөр мөдөдөм бөрын сэтысь волісны заптөм кыйдөс нуысяс. Кыйсысыясөс аттьөалісны содтөд дас шойччан лунөн. А вит төлысь мысти йирваса трудармеечъяс пыр кежлө нин бөр воисны гортаныс.



Менам бур ёрт да гижысь Виктор Егорович Напалков коркё петкөдліс гижөдтор, сійёс гырысь шыпасъясён вöчышлöма мамыс, пасйыштöма дженьыдика олöм-вылöм йывсьыс.

— Колöма жö тиöктыны, мед унджык гижис, кутшöма эськö аслам гижөгъяслы лöсяліс. Лыдгя да, быттьö воча пукалö, мекöд сёрнитö. Тайö öг öти память и колис,— шогалис ёртöй.

Мамыг пö кулас да, сирöтаөн колян. Менам, сьölöмшөрöй, эськö ловъя на, да вель нин ыджыг арлыга. Тöдг вылö босьті Виктор Егоровичлысь кывъяссö да коркö öти рытпомö пуксьöдi воча, пызан вылö пукті диктофон да шу:

— Мамö, висьтышт вай олöм-вылöмтö, зэв öг этша тэ йылысь тöда... Менö эновтан да, висьталöмтö кута кывзыны, ог сирöтаөн коль.

Мый йылысь висьталіс сійö, менам вигзöдглас серти, колö тöдны абу сöмын меным да рöдвужлы, но и став бур йöзыслы. Ассиян ме нинöм эг согтав, кызди висьталіс, сігзи эм, сöмын «шыльöдышти», кызд шулöны гижысьяс, неуна. Йöзöдны сеттöдз юалі ассьыс, да шу:

— Кодкö и лыдгяс сьöд удж вöчöмтö? Ме кодъыг öг уна вöлі...

Лыдгяс, сьölöмшөрöй, лыдгяс. Да и аттьöалас на. Вöльнöй светас öг, кызди ачыг шулывлан, бур йöзыс унджык, а налы шань сьölöмыс ок кутшöм ёна колö.

Василий Лодыгин.

Евдокия ЛОДЫГИНА

Сьökыд нэм

Ме — Евдокия Виссарионовна Лодыгина. Чужсьылöма Габов сиктын 1924 воын. Мамöй — Öсип Парась. Вöлöма Улыс Вочысь. Батьöй — Микит Виссарион. Вöлöма Габовысь. Батьöй кувсьылöма, да менам кольсьылöма арöсөн-джынийөнөн. Кувсьöма армияс ёна кынмалöм вöсна. Сэки колö, вöлөм, дыр кад чöж служитны, а висьмöма, да сизим во мысти и лэдзöмаöсь. Регыд и олöма армиясьыс локтöм бöрын. Батьö кулöм бöрын менö мамö быдтöма куим арöсöдз да выльысь петöма верöс сайö, босьтöма меным дядьöс — Иван Павелöс. Сы дорын сэсся и быдми ыджыдöдз.

Муртса тырис вит арös, куті видзны дядьлысь да мамлысь медводдза кагасö. Ачым на кага вöлі да кага видзöмсьыд, дерт, ылавлі. Дядь воліс удж вывсьыс да таысь нöйтыштлис. Первойсö сійö видзис менö лöсьыда, а бөръявылыс кутіс мустöмтны.

Ковмис ёна тöдны удж. Сизим арöсөн нин пинёвті колхозлы. Вөлös доддэлігөн ог вöлі вермы зэлöдны сийöссö, да ступенявліс мамö. Войяснас пинёвті, а луннас кага видзи. Велöдчыны эг вермывлы. Дзик öти класс велöдчи, и то дугöдісны: коліс кага видзны.

Дас кык арöса лои да, дядь нуис отведитчыны. Сійö вöлі лесникөн, юкліс пөрөдöм вылö делянкаяс. Кык ли куим во ветлөд-

лі тшөтш. Сійö мунö водзын, кыскö лента, а ме пуяссö сюяла сэтчö. Таысь кындзи туясим-ордымасим. Тадзи ме ветлöддi куим во.

Дас нель арöсөн ыстисны Кушманаö, нефть корсянінö. Орчча Дзоль сиктысь мунісны куимөн, и ми Габовысь куимөн. Дзольсьыс Мартын Вась, Кионь Наста, Салдатов Анна. А мянысь Педöра Михайлö, Рöдь Миш Епим да ме. Менö эськö оз на вöлі босьтны, да ковмис вöйысьны: дядь пöгибö воштiс. Кушманаас коліс мунны сылы, а, тыдалö, дыш вöлі. Менö кö пö ыстасны, иня-нылаос лыя да вöлисти муна. А муна кö пö, ог и лок. Ме и петі правленнöö да вöйыси, мед ыстасны. Мися, мукöдсьыс муртса арöсөн и дзояджык да. Мун пö, сідзкö. Со и муні. Тайö вöлі комын көкъямысöд вося августын.

Улыс Вочöдз дзольсаос и мянöс лэччöдісны вöвъясөн. Туй пöлөнтясын зэв уна öмидзыс быдмис. Ыджыд пöртъясö вотім тырыс. Сэсянь водзö мунім подөн. Öти лун мунім Вöльбөдз, мöд луннас воим Öкөсöдз, кöні сулаліс барак, а орччөн — кудель склад. Сэтчö суйисны, да и узим. Аскинас мунім Кушманаö. Сэні куим барак: мужикъяслы, бабаяслы, семьяяслы. Нöшта вöлі пекарня, лавка, пывсян, складъяс да мукöдтор. Посёлок — посёлок и эм. Кушманаас олі вит во — комын көкъямысöд восянь нелямын кыкöдöдз. Менö первойсö сувтöдісны пес пилитны. Начальникөн вöлі Сергей Владимирович Сейбук (нимсö бöрын-джык тöдмалі), да сійö жалитыштiс: тэнö пö, дзоя на да, ог ыстöй бурөвöй вылö. А мекöд локтысьяс пиысь мукöдсö пыр и мөдöдісны сэтчö. Вежон мында кутшöмкö рочкöд пилитчöм бöрын менö индісны уджавны пекарняö. Сэні уджалі во. Заведующöйөн вöлі Маланья. Сылысь сэкса сьöкыд кадад адзисны кык мешöк сукар, да вöтлісны кыкнаннымöс, кöть эськö ме эг тöд, мый сійö гусявлö няньсö да косьтö.

Сэсса менö пывсян вöдитны пуктисны. Уна йöзыдлы пывсяныс ыджыд вöлі. Васö катлім куимөн. Кырйыс зэв джуджыд, да öдвa-öдвa кайлі йылöдзыс. Кокöй зэв ёна пыктіс, и васö катлыны эг кут вермыны. Менö петкöдісны Улыс Вочса больничаö, сэні и бурдöдчи куйлөмөн.

Больницаысь локтöм бöрын ыстисны ваявны бурөвöй вылö сөй. Ваялім Канава туй вылысь бура ылысь. Öти вöвнад зэв этша доныд воис, да регыд мысти босьтi нöшта öтиöс. Вöвъяссö Канаваысь вайисны, колхозсьыс. Öти вöлыс вöлі Петька нима, мöдыс — Колхозница. Колхозница доддяс сöла, а Петькаыс вöтлысьö. Конюкаліс Канаваысь том на Петыр Вань. Сийöстö эз сетлы медбөръяöдз. Окыштан кö пö, сета. Габовö бөр мунігам шуис: ме пö тэнö корсьла, да эз и корсьлы. Зимстанö ме моз жö воліс уна-уна во кольöм бöрын. Коркö весиг виді: мися, корсьны көсйылін, да эн и волы. Казытыштлам томдырсянымöс да сералам.

Бурөвöйыс вöлі куим. Кушмана гөгöрыс кытшөн моз сулалісны. Дерт, важөн нин заводитлөмаöсь уджавнысö, öд вöлі эновтöм Важ Кушмана посёлок, кытысь ми ваялім пöвъяс. Сійö сулаліс öнiя Кушманасьыс дас кык километрөн вылынджык ёль бокас. Лунөн вöлі ветлам. Пемыднас каям, пемыднас локтам. Öд коліс резбöдны барак вевтъяссö дай сөвтчыны. Гашкö, сэні кер лэдзлөмаöсь. Эз ков да, некодлысь нинöм эг юавлы. И эг гөгөрво,

кыдзи ваявлөмаось аттö гырысь да кузь көрт трубаяссö, öд некутшöм трактор синмөн эг аддзывалы.

Деньга серсö ог бура помнит. Магазин вöлі, да мыйкö öд, көн-кö, ньöблi жö. Столövöй и. Мамö пуктыліс туйö Ленина гөрда деньга, да сійöс сöмын помнита. Бура дыр на сы вылö сөйи. Босьтасылi на дай. Зэв тай уна көлуй гортö вайлі-а, паськыд мешöк тыр. Дзик пасьтöмөсь вöліны дзоля чойяс, да зэв лöсяліс.

Нелямын öтиöд воын пансис война. Нелямын кыкöдын нуисны фронт вылö дядьöс. И мамö, сельсöветö шыöдчөмөн, корис менö гортö, öд сылөн квайт душа семья, да коліс вердны-юктавны, көмөдны-пасьтöдны. Правда, Иван вок куліс. Олыштiм, да сэсся куліс Татьяна чой. Ми колим нель чой: Наста, Марья, Августа да ме. Августа вöлі медся дзоля, нелямын öтиöд воас муртса на чужис.

Кушманасяньыс сквöзь локтi подөн. Öнi кө көлуй тыра мешöкнад пыр и грабитісны, а сэки öд дзик мөд олөм вöлі. Керкатö эг и томнавöй, көть эськö кодсюрö зэв тшыга олісны. Öдзöсö гөлик пöлынтьлім дай. Тадзи жö вöлі и Кушманаын. Öнiя моз эз юлыны да тышкасьлыны. Милиция весиг эз вöv. Унаөн грамотнöйöсь вöліны, он öд кужтөмөс буритнысö сувтöд. Кывссыліс, Москваысь и быдсөн волөмаось.

Гортö локтi да, пыр жö ыстісны кер дорö. Тайö уджсьыс сэсся эг и мынлы. То пөрөдчан, то кылөдчан, то ещö мыйкö вöчан. Мужичöйяс радын век уджалі, дзик быдлаö новлөдлісны.

А Кушманасьыд нефтьыд абу и сюрлөма. Алмазьяс да мый да пö эмось-а. Нелямын кыкöд воас ме гортö локтi, а нелямын нельöдас посёлоксö тупкөмаось. Шуöны вöлі: йöзсö нуөмаось Озъягö ли кытчö. Менам уджалігөн аттö уна том йöз вöлі Кушманаас, да ставнысö война вылад нуисны, гажтөм быдсөн лоис. Менö сэсся мамö и корис.

Кушманаын олан кадысь паметьын ещö сійö, кыдзи Канаваысь Сьöд Öльöш нуліс менö пыжөн видзөдлыны Екатерина Вторая дырйи нюжөдөм канал. Пыртліс бура ылөдз, гашкö, дас километра да. Вөчлөмаось жö! Каналыслөн кыкнанладор бокас ставыс кер. Сюйöмаось сваяяс костö. А вомöныс пуяс пөрласьöмаось. Пу увтіыс мунігөн чышгьянöй кольлас, да бара. Канал помөдзыс көсйис нулыны Öльöшыд, да эг вермöй писькөдчыны пөрөм пуяс понда. Ар вöлі. Кайлім на ягас пув вотны.

Öнi лөкөдöны сійö олөмсö. А мыйөн пö и лөк? Норма кө тыр-тан, нянь сетöны, вердöны. Век вöлі канаваса колхозысь вайөм йöv и яй, вый и нөк. Оз кө тай нормаыд тыр, и öнi нинөм он босьт. Клубыд вöлі жö. Томнад ёна на и гажөдчылiм. Гудөкөн кындзи ворсісны балалайкаөн да гитараөн. Петька Малика зэв бура гитаранас ворсіс. А Коля Никулин — балалайкаөн. Дерт, меным бöрыннас нин гажаджык лои: өтнам öд коли дзольса-габовсаысь, ставныс первой воас жö и пышйылісны. Бөрсö мырдөн некодöс эз вайөдлыны ни эз судитлыны. А ме, йöйыд, век олi.

Канава да Кушманаладорсьыд, буракö, нинөм эз сюр и öнiя кадö. Газетö гижлісны, кыклаті пö буритісны, да некоднанас нефтьыс абу. Абу кө и мед. Сы помысь прөстöй йөзыслы öд-вакö кокньöдыс лоис. Со тай кызвын вöрсö чышкыштісны да, кыдзи коньөрьяс вөлім, сэтшөмось на и эмось.

Кертö ме и ачым бура йири. Кык во вöлі тысячникөн. Вөлөн

кыскасян удж эз сетлыны, век тшöктылісны пöрöдчыны. Öтчyd пöрöдчим Настакöд. Пу йöткигөн зорйыс вильснитіс да сылы мыш вылас усис. Ёна доймымөн эз ло, а казытыліс кувтöдзыс. Ёнджы-касö öтнам сэсся и уджалі, пöрöдчи лучковкаөн. Наста абу нин ловъя, ыджыд семья бергöдöмөн да сьökыд удж тöдöмөн, дыр эз ов, некымын во нин габовса шойна вылын, менö ас дорас виччысьö. Орччөн моз лоам, аслым места ме важөн нин индылі да пиянös велöді сэтчö дзебны.

Война вылад мужикуловтö босьтісны, да миян выlö став уджыс усис. Мельничаыд колис тшуптöм, скöтнöй двoryд тшуптöм. Вермысджык мужичöйыд öти Семö Вась вöлі, Прокö дядьö да. Мельничатö и скöтнöй двортö тшупим. Ме Прокö Степанкöд, коді эз на армия арлыда вöv, дольнöй пилаөн тшöтш пилитчи. Сійö выліас, а ме уліас. Важ скöтнöй дворъяслөн вевтъясыс ставыс миян пилитöм вöліны. Тшöтш и куричасылі. Семö Васькöд сійös и тöдім. Ласей Домна шульвліс: «Мыйла бара мужикөн абу лолöмыд-а, татшöм мастер да, сюсь да?» Мися, абу тай Енмыс сетлöма мужик чинсö, мужик чина кө öд вöлі, война вылад нуисны. Нелямын коймöд воас кутісны нуавны нывбабаястö, да ми Иван Öкулькöд сетлім жö бумага Кулöмдінö, мöдöдлім военкоматö, мед тшöтш босьтасны фронт выlö. Öкулькöд сералам: öти пуятö öд гырдыштам жö. Военкоматсянь воліс воча кыв: ті пö абу комсомолच्याс дай томось на. Вöлінныд кө пö комсомолच्याсөн, гашкö, и босьтім. А ми, велöдчытöгыд, весиг пионерö эг пыравлöй, непöштö комсомолö, партияö да, уджыс сюрліс-а. Некутшöм медаль эз сетлыны ни. Сідзи и ковмис овны. Сельсöветын шуöны: сетам пö кутшöмсюрö кокньöдъяс, ваян кө пö документъяс, да медаль кө пö эм. А көн нö менам медальыс? Менам абу медальыс, уджыс тай эськö сюрліс да.

Война кадас тысячникнад кык во вöлі дай квайт во кылöдчи, век бригадирөн вöлі. Норматö тыртан, да немас нин көкъямыссё грамм нянь сетасны. Сы мында кубометрасö öні тракторөн оз вöчны, мыйта ми вöлі вöчам коньöрöй Петыр Степанкöд. Мый и бурыс? Öні найö, кодъяс омöльджыка мырсисны, бöрынджык кер дорö петісны, унджык пенсиятö босьтöны.

Ёна ковмыліс уджавны дзык кынöмпöt вöсна. Нормаөн-джынийөн кө тыртан, няньтö килограмм нин сетöны. Квайт морта семьяыдлы öд мыйкö колö сёйны. Килограмм няньтö вöлі ваян, да мам юкас челядылы öтчyd сёйöм выlö истög көрöб ыджада, а меным пажын выlö сетас кык көрöб ыджада. Дерт, куш нянь вылын он ов. Мамö вöлі быдторсö на лöдас, мöстö видзам да. Но, кынöмыд сямалö да, няньтö вөрö кайигөн и сёя вöлі. Лунтыр тшыг, а норма тырта. Нормасьыд некор эг лэдзчысьлы, век сеті. Габовсаяс и шензьöны, мыйла пенсияöй дзоля. Меным, мися, тырмö, мый эм, сійös и сёя.

Öти во аслам окотаөн босьтісны уджавны колхозысь кер дорö. Кыскаси вöлөн Слудаын. Зэв ыджыд вöv вöлі, телеганад кыскö вит кубометраöдз. Телега колясьясыс öні на пö эмось.

Коркö да лоис сэсся менам Вась нима пи, öти морткöд олім да. Сійö вöлі бухгалтерөн да прамöя отсаліс меным и миян семьялы, öд дядь эз лок, усис война вылын. Колхозын уджалігмоз во джын и быдтышті пиös, бара ыстісны кер дорö. Сэки öд эз юасьлыны, эз шойччöдлыны. Кага ваян лунö норма на тырті.

Локті гортö, пилаöс пукті да и вайи. Вежон мында колис, да турунла ыстисны. Январ квайтöд лунö чужтöм бöрын төвбыд сэсся турун ваялі. Тулыснас кутисны ыстыны кылöдчыны, да куті пыксыны: мися, ог мун, колö керка стрöитны. Но сійö воас керка лэптыны эг на вермы. Душ-мöд во сэсся уджалі кер дорын, век пöрöдчи. Кутшöмкö воö сöмын кыскаси. Бура уджалöмысь весиг вöвкöд снимайтлісны да сетлісны ишим да кепысь гоз.

Пиöй квайт арöса нин вöлі, верöс сайö петалöм кодь артмыліс, орчча Дзоль сиктö Марика Лимон сайö. Колхозса юралысь Педöр Матвей, Зосим Гриша да мукöд зэв ёна коравны кутисны: керкаясыс пö, майбырöй, шогмöны, зэв ёна кыйсьö да, петан кö, шог он тöдлы. Он жö пö кут керка стрöитны, кай Дзольяс да дась керкаас ов. Ме, йöйыд, и кайи. Бөр жö сэсся локті, во весиг эг ов. Василь вöсна. Патефонön кутіс ворсны, а Лимон, ур кульö вöлі да, локтіс да пластинкатö дугöдіс. Аскинас ми и гортö мунім. Кута тай, шуа, детинаöс мучитны тэ вöсна, пластинкаön ворсны весиг он лэдз да. Чери-яйтö, шуа, ог сёй тэнсьыд, а бурджык тшак ва паняла да пывсянын ола тэнад гажа керкаын дорысь. Лэччи Габовö да сійö воас керка кертö и пöрöді. Ставсö öтнам пöрöді лучовка пилаön, ставсö öтнам кырсси. Зэв дыш Удалко вöв сетісны ваявнысö, да öдва и воис керка керйыс. Первойысь вайöм бöрын пукси кер вылас да бура и бөрді. Мися, уна на и кер ковмас, ёна на и мырсыны ковмас. Сійö керкаыс артмыліс, да ещö на öд мöдöс стрöиті. Овны прамöя эг слöймöй-а, Мёскашорö лэччим да. Сідзи эськö и сулалісны коньöрьяс шытöг-ловтöг, да Василь отпускалігас арыылö, кыйсьö-вотчö, меным на мыйсюрö вичмöдыштлö. Гортын, шуö, и сьöлөмöй бурмылö. Ачыс öд Кулөмдінын олö да уджалö.

Часлы, висьтышта, кызди менö дзик прöстöсьыс судитлісны. Неямын сизимöд воын нулісны, кор Васильы арös джын на и вöлі. Мунім турунла Петыр монькöд. Сылы сөвтім, да меным пыдöсыс и колис — юр мында. Петыр моньыд и шуö: этша пö лоис, да тэ пö торйöдöмön ассьыныд тшöтш сөвт, оз нин ковмöдысь волыны. Ме сідзи и вöчи: первой ассьыным, этшаника жö кольлөмсö, сөвті, выліас исерга пукті, а сэсся колхозлысь тэчи. Кык юр мында и лоис, нырас потшалі да вөрзöдчи. Ю горулысь локті öні эновтöм нин Воч туйöд. Менсьым турун сөвтöмтö аддзылісны вöрдорсаяс, кодьяс уджалісны юдорса улыс складаын, тшöтш и Зосим Иван, бригадирыс. Ме водзвылын на Зосим Иваныс котөрөн мөдöдöма вөлөн кык вокös сиктö висьтавын юралысьлы, мый ме аслым сөвта колхоз турунсö. Сöмын на турун доддьөн локта, а колхозса юралысь да тшöтовод Öсип Öльöш воча нин. Мыйла пö колхозлысь да ассьыд турунсö öтлаын лөдін? Мися, эг жö öтлаын лөд: со асланым уліас, торйöдöма колхозсаысь исергаön. Та мында турунысла, кык юр кындзи абу да, вöвсö кыкысь котрөдлөм дорысь öти доддьөн вайи. Конюкъясыс сувтöмаöсь да сулалöны, эз бара шуны, мый конюшня дорö локті да ректысьны көсья.

Додьнад и сорөн менö вайöдісны колхоз правленньö керка дорö да тшöктісны лэдзасьны. Вөлös нуисны конюшняö, а додь сулалан колис. Аскомысьнас локтіс милиция да допроситіс менö. Висьгалі, кызди вöлі, и эг чайт, мый пуксьöдасны, водзö ваялі турун.

Коркö да и гымыштіс, воис судö повестка. Судыс муніс Га-

бовын. Судитысьясыс локтісны Кулөмдінсянь. Ме эг и пов, лөсьыда пукалі колхоз правленньоын. Думайті: менө дзик нинөмысь судитнысö. Висьталі, мый юалисны. Сэсся шуисны, ме пö вайи колхозлысь куим центнера додь да лэпталі аслам стынö. Эг жö, мися, лэптав, додьсö сувтöдлісны колхоз правленньо дорö да. Кык юр мында и вöлі туруныс, став габовсаыс аддзыліс. Век на эг пов: оз жö, мися, прöстөсьяс судитны.

Пöшти лунтыр муніс судыс. Приговор водзвылын вöчисны кост, да петім ывла вылö. Регыд и виччысим. Бөрдомөн петіс Зина, Гөрд юр Витялөн гөтырыс, коді вöлі пукалысьын. Мися, судитöмабсь али мый нö менö? Нинөм абусьыс? Эг эскы, но лыддисны приго-вор: пуксьöдны сизим во кежлö. Вот тэныд и на!

Енмыс тай аддзö жö лөк вöчысьястö: көть меысь томджыкөсь, ставныс нин кулісны, главнöйясыс и налы служитысьясыс. Тадз налы и колö. Йöз шог вылад эськö оз ков радлыны, но ме найöс ог лыдды йöзөн. Найö вöліны кык кока көинъясөн, морт «сёйысьясөн».

Ог нин помнит, кор локтіс Вочысь милицияса уджалысь Чаланов, мед лэчöдны менö Кулөмдінö да мөдöдны пукöданінö. Мамö пукталіс зэв уна көлуй да сёян. Аскöд босьті Улыс Вочöдз и Васильöс. Сёян-юансьыд сэки вöлі зэв дзескыд, да Вочын Чаланов ставсö менсьым босьтіс. Гортас узытöдіс, а ачымöс бөр лэдзис гортö. Ме пö тэнсьыд став документъястö шыбита. Бөрынджык нин колонияын тöдмалі, мый сэки петлöма индöд лэдзавны дзоля кагаа мамъясöс. Гашкö, Чалановыс и эз тöд та йылысь да сёян вылö лэдзис менö. Кулөмдінас кө мөдöдіс, колөкө, сэки жö и мыні.

Кайим бөр Габовö. Василь сэки ас кокнас бура кузя нин, джодж кык-куим кузя, ветлөдліс, сьылі вылысь лэдзлі да. Лымъякодь нин вöлі арыс. Шонъянöй Дзоля Миколай вуджөдіс юсö. Вылыс Вочын пыралім обöясö, да Васильы, мед оз кынмы, обöй вурис пасьторйысь носки да кепысь. Дзик век подөн кайим матö нелямын верстсö. Вочсянь звөнитöма Сандра ичиньö, да мамö Гусикаын виччысис нин, вөлөн локтöма да, лөк поссö абу вермöма вуджны-а. Биасьöма. Мамөкөд кутчысим и бөрдім да бөрдім. Би дорын шонтысьыштім да вöлисти вөрзёдчим гортö.

Мед сöмын менö некытчö оз нуны, кер дорын уджалі, позьö шуны, лун и вой, тырті кык да куим норма. Васильöс коркö мамö видзис, а коркö и кодкö мөд. Мамöлы öд коліс жö уджавны, норма тыртны. Гожөмъяснас пиöс тшөтш новлөдлі уджаланінö. Кор эз позь, кольлі кутшөмкө шань пöчö ордö.

Тадзи коліс во кык. Коркö локтіс Дзоллысь сельсöветса юра-лысь Сава Öльöксан, да вöчисны собранньö. Вöлі ещö Донысь кутшөмкө начальник Мартюшов. Сёрнитісны уджалөм йылысь. Сава Öльöксаныд и шуис: ті пö, габовсаяс, ошйысянныд, а план-нытö подсудимöй тыртö. А ме öд збыльысь синмысь би петмөн уджалі, мед сöмын некытчö оз вөрзёдны да кага дінысь торйöдны.

Кулөмдінысь вöлі ещö райкомса кутшөмкө морт. Сійö пыр и кутчысис Сава Öльöксанлөн кывъяс дорö. Кутшөм подсуди-мöйöс нö пö ті тані видзанныд, код нö пö сійö? Ме вылö пыр и индіс Сава Öльöксаныд. Аскинас локтісны милициясаыд — кы-көн. Пыр жö менö и босьтісны. Ме эськö Васильöс кытчөдзкө босьтаыны көйи, но мамö эз сет. Кык во ачымöс виөмөн уджалі,

мед сёмын ставыс лёня колис. Паныд кыв эськё эг нин шулы да, кытчö ыстылісны, сэтчö и мунлі. Биö кö быгтьö суйисны, и сэтчö эськё пыри, мед сёмын кагакöд эз торйöдны. Торйöдісны тай.

Куломдінын милицияс шуисны: кагатö пö вай да сизимнан восö миянын идрась. Ме эг кöсйысь. Мися, дзик нинöм абусьыс судитісны, гижася да, лэдзасны. Этапöн кöсьянный нуны да первой нырас и гижöй.

Вежон тырис ли, эз ли — нуисны. Карö воим, да менö босьтісны пусянінö, пусьысьыслы отсасьысьөн. Вежон мысти нуисны водзö. Сизимлаö кымын чеччöдлісны этапнад Воркутаö мөдöд-тöдз. Бур коть сійö, пусянінö век веськавлі да. Гашкö, документам гижöма вöлі, мый ме кужа вöчны тайö уджсö? Весиг яй-сялышті. Сёяныд öд тырмö пусянінад, пöдругасыдлы на вайыштан.

Воркутаын суйисны зэв ыджыд кузь баракö. Наръясыс кык судтаось. Менö мыйöн аддзисны, кутшöмкö бабаяс кизьясöс öти здукөн шарснитісны, пинжакöс пöрччöдісны, чулкиясöс кокысь пöрччöдісны, нопйöс нетшыштісны, став сёянсö перъялісны, босьтісны аслыныс да вур-варкерисны. Уркаяс вөлөмаось. Ме куті бöрдны ыджыд гөлөсөн. Дежурнöй ли, код ли локтіс, нуис начальство дорö, сэсся менö петкөдісны мөдлаö. Көлуйтö уркаяс-лысь бөр мырддисны, а сёянтö эз нин аддзыны. Мөд жырьяс пызан сайын пукалісны картіасьысьяс. Мышсяньыс öти дзик Наста чой кодь кажитчис, сарапаныс сэтшöм и. Быдсөн шайпаймунлі: öдлы, мися, ме ветлөдла, а Настаос мыйыськö татчö вайöмаось. Бергөдчис да, абу сійö вөлөма, а зэв беринöсь чужöма нывбаба.

Сэні, Воркутаас, ме олі тöлысь мында кымын. Бара жö картупель весалі да мый да, пусьысьяслы отсаси. Сэсся кытчөкö водзö нуисны. Аттö көдзыд да тöла вöлі, Господьöй-батюшкой! Ломтысьöм вылö рос чукөртлісны. Та могысь ружье костын дыр кежлö пуксьöдöмаясöс новлөдлісны. Кодсюрöяс меным шулісны, сизим воыд нö пö срок? Миян пö тані дас вит, кызь да весиг кызь вит воён пукалоны. Öти нывбаба висьталіс, менам пö дас вит во, семьяын витөнось. Вöлі пö прокурорөн, да йöзлысь деньга босьталөмөн шуисны, дас вит во сетісны, некутшöм амнистия абу.

Васильöн карточка вöлі, да öтчыд видлавны куті. Прокурор ныбабаыд и юаліс: код нö пö тайö? Мися, мамöй да кагай. Нывбабаыд и шуис: тэнö пö долженось амнистия серти лэдзны, дзоя кагаа мамъяссö важөн нин лэдзавлісны. Сійö воас кö судитісны, тэ пö öд сюрин амнистия улас. Вай пö гижлам Москваö. Прокурор — прокурор и эм. Бумагаыд вежон и ветліс. Öтчыд пырис кодкö лагерса начальствоьыс да шуö: тэнö кö пö öні лэдзам гортад подөн, мунан он? Мися, кыз нö ог мун, сэні öд менам кагай? Кыз нö пö мунан, ми öд ог нуй? Мися, кызкö сёравно муна, юася бур йöзыслысь да. Но Сыктывкарөдз сетісны на мортос дай паёкъяс.

Воркутаöд мунигөн öти нывбаба петöма кильчö вылас да шуö: — Аттö кутшöм мичаник ныв! Вай меным кага видзны кольччы. Шмониті на:

— Верöсыд том? Ачыд том да, дерт, том. Тэ кутан кага видзны, а ме верöсыдкөд ола.

Мөд нывбаба сэні жö шуö:

— Вай кольччы. Пиой локтас армияысь, да монь пыдди ло меным, лэдзёмаось, тыдало, да.

Вочавидзи: мися, дерт нин, пуксьомон тэнсьыд пито кута виччысьны. Менам, мися, гортын аслам пиыд эм.

Мортыд поездон вайис мено кародз. Зэв шаньон сийо меным кажитчис. Коми вөлі. Шуис, нуа по тэно станцияодз, да корсям, мыйон гортланьыд мунны. Мекод тшотш локтис оти ныв. Аттo шаньон вөлі. Сийо и шуис: эн по бара станцияо ну, ме гортo нуo-да. Мися, батыд да мамыд оз видны? Оз по. Батьо да мамo по велоддиси: аддзан ко погибо воом мортос, век отсав. Менам мамo, мися, дзик жо тадзи велоддис. Нылыд шуис: миянын по шойччан, а аски ме тэно самолёт выло пуксьода.

Нывъясад оли кык лун. Оти лун ветлам — самолёт оз лэбзы, мод лун ветлам — бара оз лэбзы. Пывсьодисны и быдтор, вердисны и юкталисны, но эз кут сэсса овсьыны — гортлань окота лоис. Пета, мися, туй выло, да кодко од босьтас жо. Самолёт, гашко, вежон оз лэбав, да кызд верма терпитны?

Нылыд пукталис меным сёян, да петі туйо. Куломдино каян туй вылын кутшомко дзоляник посёлокo вои (они сийо, конко, ыджыд нин), да вөлисти машина босьтис. Мукодыс бокod сомьн шуркниталисны. Босьтoдзыс юалис, кытысь но по лоан? Мися, Габовысь, Куломдино кая. Но по сов, Габовысь ко. Пукси да висьталис: Габовад по тодса эм — Митрей Иван. Ачыс по, дерт, кулис нин, а кодко од ловъяыс эм жо? Нылыс, мися, эм (Иван Огаш ловъя на сэки вөлі). Весляно кыйсьыны ветлигон по ачимос вердас-юкталас и вөлос дөзборитас, промыс тырнад сарай шорөдзыс додьяд катодас, юр выв тырыс сёдас вөлі; быть лунйодас, брагаон юкталас: вöвныто по шойччодой. Ме шуа: сийо, мися, меным рөдня — дядьлон батыс. Меным, батой водз кулис да, бать кодьон жо вөлі.

Шоперыд мено босьтис, катодис да гортас весиг узытодис Куломдинын. Аски по Керчомъялань турунла кутасны кайны, да накод мунан. Менам дыр узьсьома, да петі подон. Эжва кузя Керчомьяо пыдди сквозь кайсьома турун туйод. Вочааси турун додьясон лэччысьяскod нин. Нöбалом туйод мунöмысь дзикодз эбöстöмми, да оти нывбаба жалитис:

— О, матушкаой, тэ ко лэччан туйвежодз да водзo каян Керчомьяодз, дзикодз изоймитан войнад. Ньоти туйыс оз тодчы да, вошан. Лок, менам вöv выло сов. Вöлыс шоныд, кокъясто топод бокъясас да шоналан. Лэччам бөр.

Сийо нывбабаыд лэччодис мено гортас, пывсьодис, вердис-юкталис. Забыль, гын сапог на сетис дай, башмакто шыбитодис. Бур йöзыд тай эмось жо. Аскинас турунла кутис кайны да нуис мено туйвежодзыд. Сийо лунас и вои Керчомьяодз. Оти мужик Воркутасянь ыстис мекod татчос оти семьялы посылка, да сэтчo и муні. Керкасo корсьны ачыс велодис: öшинь улас по льом пу да повъясысь потшос. Сет по мамылы да узь. Сэтчo и пыри. Том нывбаба шуис, миян по некод абу Воркутаас, да петис мос лыстыны. Ме весиг эг удит шуны, кутшом могон пыри. Ковмис висьтавы мамыслы. Сийо шуис:

— Миян Öльоксей Воркутаад. Сэни складовщикон уджалo. Сийo, конко, и мододис. Пырас гöтырыс, да висьтав посылка йывсьыс.

Пырис, да и висьталі, сеті ыстёмсö. Ме, мися, эг видды, мыйкö тай небыд-а. Вöлисти узыны тшöктіс. Узыны тшöктіс, а тшайöн весиг эз юктав, кытчöкö пöдругаясас муніс. Мамыс няньтор сетыштіс, ужинöн эз жö верд. Эмось тай и татшöм йöз.

Аскинас чеччи водз. Муні магазин дорöдз. Сэтчö öти нывбаба вайöма коммунаысь йöв вузавны. Сэки öд катыд помас коммуна вöлі. Нывбабаыд юалис, тэ нö пö кытысь? Ме, мися, Габовысь. Öсип Öльöш пö Иван Иванович дорын вöла, он нин, навернö, су. Лок пö менам доддьö сөв, да ме тэнö гөнитöда. Сійö нывбабаыд менö, сё пасибö, вöвнад гөнитöдіс катыд помöдзыс, да суим öд. Удитіс öд керкасьыс Öсип Öльöшыд, паркаасьöма да, петны. Эз кö удит, ме кöсья вöлі вартны вöвсö да места вылас и кольны — сэтшöма скöрми тайö омöль морт вылас.

Матыстчис да, шуи сылы: мися, удитін петны, эськö вöвтö эн аддзы да, катöді кö. Сэсся пукси доддяс и содті: мися, босьт вöжжитö да кучерав.

А тöла, турöб, некытөн весиг туйыс оз тöдчы! Пруптö воим да пажнайтім. Öльöш кыскаліс нопсьыс пызан выlö туйö пуктöм-сö да шуö, сей пö. Тэнсьыд öд, мися, ог сей, вомö оз пыр. Аслам вöлыштіс на бур йöзлөн сетöмыс, да сійöн и нурьяси.

Öти вöлыд мудзис, да Улыс Вочсянь Öсип Öльöш звөнитліс, мед мöд вöлөс ыстасны. Джын туйын воччасим Настакöд, сійö локтöма. Чой дорö сэсся и сöлі. Öсип Öльöш кайис миян водз-вылын.

Бöрынджык меным висьталісны: мамö пö петöма Василькöд туй выlö, бöрдöмөн йöктö да шуалö:

— Öдя локтö! Öдя локтö!

Гортö вои. Майбырöй и забеднö. Öти-кö, мездми — вöльнöй пöтка, но, мöд-кö, менö «сөйысьяс» танöсь. Но коліс овны, и бара кутчыси помасьлыгöм уджö, кöть кутіс кывны лядьвейö пырöм чöрс тор. Пырліс судитöм водзвылын на. «Бур» чойясöй, Наста да Марья, потанöс шыбитісны ывла выlö, да ковмис мунны Прокö дядьöяслөн мöдарас. Сійö öд вöлі батылөн вокөн да лэдзис. Наста чой лöсялö, вöлөм, дядьöлөн Микит пикöд. Öтчыд найö венö воисны, да сувті дорйысьны. Менö йөткыштісны чöрс чуман выlö, а чöрсыд и чегис. Дзиран лыöдз чöрс торйыд пырис, синва пыр уджалі, а сэсся ньöти эг кут вермыны. Ковмис эновтчыны кер дор уджысь, сэсся колхозын порсь видзöмысь. Но сьöд уджтö уджöдісны век, эз эскыны, мый ог вермы. Дзик пöгибö вои, да трактор доддьын сэсся больничаö мунлі Кулöмдінö.

Врачыс вöлі Тюрнин. Сійö шуö: ог пö эскы, мый öкмыс во чöрс пом новлöдлін, кулін нин эськö. Некутшöм операция пö ог вöч. Куті зэв ёна бöрдны, мися, вундöй, да быть аддзанныд. Он кö перйöй, сэсся збыльысь кула. Тшöктіс гижны бумага, мый ачым тшöкті вöчны операциясö, мед мыж улö не сюрны. Зэв пö уна сöныс да вундысясны кö, кокыд вермас косьмыны. Кок лапайи сэсся збыльысь и косьмис, оз нюглась.

Чöрс помыд бырöма нин вöлі да муртса и кольыштöма, сійöн эз и тыдав кык лы костсьыд. Карö на менö лэччöдлісны, вирös вежисны, ставнас заразитчöма да. Вежисны да, со мыйдыра нин ола. Дерт, чорыда вися ыджыд арлыднад водзті сьöкыда уджалöмсьыд, но ола, и мед эськö дыр на ола (öні *Евдокия Виссарионовна* 85 арös — *Редакция*).

Чөрс торйыд первойсö эз кыв да, Прокö дядьöясын олігөн кык во пошта новлöдлі, кок вылам ён вöлі. Улыс Вочöдз лэччывлі да Дзолльöдз бөр кайлі. Дерт, эг öти, а кык лунөн. Öтарö-мöдa-рöсö öд важ Воч туйöдыд öкмысдас верст. Сэки Зимстан пыр ветлан туйыд эз на вöв, ачыс Зимстаныс ни, сэнi мырдөн вайöм йöзыд ёль пöлöныс на и олыштöмaсь.

Öтчyд Улыс Вочын ме дырйи пошта нопйö кутшöмкö бура ыджыд пачка пуктисны. Ме книгаясөн чайтi, мися, велöдчысьяс-лы мöдöдöны. Сэки эз сöмын Дзолльын, но и Габовын начальнöй школаыд вöлі. Эз öд висьтав пошта вылын уджалысьыс, мый тайö деньга, сöмын кырымöдiс. Мыйла эз висьтав, öнöдз ог гөгөрво. Висьталiс кö, гашкö, ёнджык дзöръялі да бурджыка видзи? Сэки нопъяси да Вылыс Вочöдз на рытнас кайи. Пыри обöясö, нопйöс порог улас и коли. Аскинас кайи Дзолльöдз, пачкатö восьтисны, да деньга вöлöма ставнас. Стракла сьöлöмöй тшук эз пот. Тайö менам век на дум вылын. Мöдысь лэччи Вочад да шуа: мыйла нö, мися, эн висьталöй, деньга пуктöмныд да, порог улас и узис? Вель унаөн пыравлісны да, кодкö кö босьтiс? Нопйыс пö öд печата, шуисны дай. Збылысь, нопсö печатайтлісны, мед ог восьты. Но гусялысь кö быттö петiс, тайö öмöй кутiс? Мукöддырйиыс öд Вылыс Вочöдз эг кайлы, ичиньясö шыбитлі пошта нопйöс да клубö котöртлі. Зэв жö вермисны пыравлысь-ясыд шышнитны. Но водзтi йöзыд эз öнiя кодöн вöвны. Пошта-вывсаясöс сэсся кори, мед водзö вылö висьталасны деньга пуктöмтö, да век висьтавлісны, «Талун деньга» шулісны. Ноптö эг нин кытчö веськалö кольлы. Пошта вылын уджалысьыс Марья нима вöлі да некор эз венлы. Позис öд и босьтыштны деньгасö да ме вылö шуны.

Мыйсö сöмын эг керлы, Господьöй-батюшкоöй! Ёна жö и уджалі. Кымынысь лэччылi грузла пыжөн Улыс Вочöдз да Кулöмдiнöдз! Улыс Вочöдз шöркoдь пыжөн, мед сэсянь вит-квайт пызь мешöк да мый да Габовöдз катöдны, а Кулöмдiнöдзыс сельполөн ыджыд пыжөн лэччылiм да бөр катлім. Улыс Вочсянь Кулöмдiнöдз лöсьöдчылiм куимөн. Кыкөн зiбъясьöны, öти бöжалö. Кык-куим тоннаöдз катöдлім грузтö баржа кодь ыджыд пыжнад. Кытiкö гезйөн кыскан берегöдыс, кытiкö зiбъясян. Дзикöдз эбöс бырліс мешöкъяссö новлігөн да пыжас сöвтiгөн, сэсся воём бöрын ректiгөн да берегö катлігөн. Оз öд некод отсав, ставсö ас-лыд лoö вöчны.

Улыс Вочö воём бöрын сöвтчылi аслам пыжö да öти лунөн катлі Вылыс Воч вевдорöдз. Мöд луннас кайлі Гусикаöдз кымын (эм Воч юö усьысь татшöм нима ёль). Коймöд луннас волі Габо-вöдз да удитлі на ректысьны. Лавкаöдз катлысьны сетлісны вöв.

Корсюрö лэччывлі и Микипер Параськöд. Пызытö вит-квайт мешöк пуктан аслад пыжö и катöдан. Ок и сьöкыд вöлі катны ёна визулінъясöд! Медся ёна мучитліс Вылыс Воч вевдорын мельнича весьтыс. Ректысьлім да кыскылiм пыжнымöс берегöдыс потшъяс вывтi быгыльтöмөн. Сэсся бөр сöвтчылiм. Но медся сьöкыд вöлі кайны ыджыд пыжнас улысвочса Кирö сикт весьтöд. Ок и визув сэнi юыс! Сэсся Слудатi, Вылыс Вочсянь Габовö кайигөн нин, зэв визув. Сыысь и полан вöлі, дыр-ö он путкыльтчы. Ыджыда ковмыліс выныштчывны. Мыйыськö öд сойясыд висьö-

ны, он вермы весиг лэптыштны. Кокъясын сөнъясыс шмакасис-ны, кутшөмкө лыяс петісны.

Коркө лөсьөдчим лэччыны торъя пыжъясөн ме, Прокө Степан да Ыльш Эйке. Найо шуисны: тэ пö лэччы, а ми суодам. Ме кывті Улыс Вочөдз, а найо эз и локны. Сөвтчи да куті катны. Вочаасим вылысвочса мельнича весьтын. Найо отсалісны меным кыскыны пыжөс да кывтісны горув. Ми пö сөвтчам да тэнö суодам. Ката надзөникөн и думысь век виччыся. Зэв нин ёна пемдіс, а век кая. Йой жө ме: мыйла пö и пемыднас кайны? Путкыльтча кө нө? Оз на өд и быдлаө шогмы чеччыны. Видз вылад чеччан, да кытысь пессö корсян? Кутшөмкө зэв крут кыр воис, да вöлисти домаси берегө. Сьод стенмөн сулаліс вөр. Кайи да пес кералі, биаси, ва катөді, чай пузьөді да роктор пуышти. Куті виччысьны Степанъясөс. И быттö локтіс пыжа, пелыссö зэв лөсьыда, кылö, пуктіс пыж бокас, шлюч-шлячкерис, но зэв дыр эз кут кайны берегө. Муні видзөдлыны — некод абу. Каститчис меным.

А Степан да Эйке лэччылөмаось Улыс Вочөдз да кайөмаось Вылыс Воч вевдорөдз. Сэсся Степанлы деливö лоөма, да кутöма кольччыны, а Эйке абу виччысьöма, катöма водзö. Степанөс дзикөдз топөдöма висьöмыс, да сійö сувтöма юшөрса ді вылö, сэтчö и кыскыштöма пыжсö. Кынөн нин аддзöмаось Степанөс Вылыс Вочсянь кыйсьыны катысьяс. Ваас юрсö суюöма да эштöма. Сі-йö меным и каститчис. А Эйке меысь кык верст горулын и узьöма. Сылы эськө эз жö ков кольны ёртсö.

Менö Эйкеыд суөдіс дай колис мужик мортыд. Габовö вои, да кутісны шуны: Прокө Степан пö кулöма. Эн пö аддзыв? Ме, мися, ськөд да Эйкекөд вочааси бөр катігөн нин Вылыс Воч вевдорса мельнича дорын. Отсалісны весиг пыжөс кыскыны. Сэсся Эйке суөдіс дай колис, а Степанөс сы бөрын эг аддзыв.

Вайлісны шойсö. Ен сетіс да, судö көть эз кыскавны.

Вермигам стрөитчи, кутшөмсюрö мужикъясысь на бурджыка, зептö кывъясла эг пыр, и, дерт, менö омоль йөзыс век «йирышта-лісны», кодсюрö синнас эз вермыны аддзыны. Увтыртöмысла мустөммисны меным габоваяс. Медся ёна суд улö скойөмсьыс лөгйö петіс. Мыйта синва өд кисьті, мыйта сійö мамөлөн петіс.

Квайтымын коймөд воын, буракö, мартын, рочьяс сиктö локтісны кер лэдзны. Эски ме колхозын, скөтнөй двoryн, войся стөрöжалі да куйөд петкөді. Нöшта песласи рочьясыслы да пывсян вөдиті. Тышкасясны да, көлуйныс ставнас вир. Рочьяс бөрсяс сэсся Мөскашорö и лэччи, мыні ад габовсаысь.

Габовын на тöдмасьлі вербуйтчөм öти рочкөд. Сійö кутіс шуны: примитан кө пö, дугда юөмысь да челядьтö быдтыны-велөдны отсала (Васильысь кындзи Коля вөлі), висьөдчан пö да. Збыльысь, ёна на и виси сэки операция бөрад. Босьтöмыд лоис, да век на со олам квайтымын нельөд восянь. Öні, кор нинөм нин ог вермы, сійö менö и тöралö.

Мөскашорын патера ни нинөм эз сетны. Олім Петыр Степан Агния гөтырсянныс төдса Веняяслөн дзоляник керкаын. Удж корсьөм могысь ме шыөдчи лесопунктса начальник Матвей Николлаевич Терлецкий дорö. А сійö меным шуö: локтöмыд пö старука да том мортсö ылөдлан. Ог пö босьт удж вылö. Эз и босьт.

А мастерыс шуис: кай пö да уджав, Терлецкийыд оз и тöдлы. Матвей локтис вөрö да шуö:

— Аски жö мед абу вöлі локтöма. Тэ кодь калекаыс миян зэв уна.

А «калекаыд» бура на и уджаліс. Бöрынджык пыдди кутісны пуктыны да душ-мöдысь Зимстанöдз собраннö выlö лэччöдлісны, пызан шөрö пуксьöдлісны.

Ме сідзсö сюсь вöлі да зэв на и лöсьыда ылöді Матвейтö. Мися, вай документ, мый ме тиян лесопунктлы куим во уджалі: песласи, пывсян вöдиті, стөрöжалі, керкаöс кер лэдзсысьяслы овны сетлі. Мися, колхозсянь корöны. Сетіс öд. Мыйöн сетіс, ме пыр и лэччи Зимстанö, леспромхоз контораö, мед оформитчыны удж выlö. Кадръяс отделын пукаліс Чувьюров. Мися, оформитчыны локті, со документ, Матвей сетіс. Мися, тайö куим восö первой и гиж. Оформитіс öд. Мöскашорын муні эг Матвей, а мастер дорö, висьталі контораö ветлöмöс. Оз пö бара вöтлы Матвейыд? Мися, кыз нö вöтлас, удж выlö гижöмөн примитöма да? Вежон мында кымын увйыси, Матвей локтис и шуö:

— Ме тэнö вöтывлі нин, да бара локтін?

— Ме öд, другö, öні оформитчöма нин.

— Код нö тэнö оформитіс? Часлы, лэччыла.

Сідзи сэсся и уджалі. Но Матвейыд менö век видзöдіс увтыртыштны. Öтчыд кори шоперö велöдчыны Коляöс мöдöдны. Сійö вочавидзис:

— Менам сідз тырмö шоперыс.

Коляös сэсся велöді шоперас ас тшöт весьтö. Но Матвейыд и удж выlö эз кöсйы босьтны, шуис: көн пö велöдчис, сэн мед и уджалас. Кызкö тай сэсся примитіс жö МАЗ выlö-а. Но Коля юöm юрнас кайöма вöлі машинанас нывъяслөн патера стен выlö, сюрс лешакыд кисьтöма став кильчöсö. МАЗ вывсьыд сійös чöвтисны, лёкиник самосвал выlö пуксьöдісны. Больницаö вуджліс уджавны и. Бöрынджык бөр леспромхозö петіс. Кызкö-мыйкö ладмöмаöсь Терлецкийкöд, да вель дыр новлöдліс сійös леспромхозса директорлөн чинын. Гашкö, и талун руль сайын, да рак висьöмысь нэм джынйөн и кувліс Колюкöй. Ена жö меным и шог, быд лун бөрда.

Казытывлыны кö, унатор позьö висьтавны, помыс оз воны. Мöскашор бырöдісны, да Зимстанö вуджöм бöрын мыйсö сöмын эг вöчлы. Мöскашорас столовöйын пусьылі, да первой пусьыны жö индісны, сöмын вöрса котлопунктö, кöть эськö дзоньвидзалун воштöм мортлы кöдзыдінын уджавны эз позь, врачьяс эз тшöктыны. Мунан тöвнад, а пусянінад пытшкөсас йи. Дерт, додь выlö тшупöм керкаторъяд, картофелтö весалігөн китö чепöльтö. Больницаö лэччылі, да кокниджык удж сетісны, войся стөрöжö гаражö пуктісны. Сэні нель во кымын уджалі. Öтчыд Омельчук, механикөн ли кодөн вöлі, некутшöм бумагатöг аснаукөн трактор босьтіс. Ме куті сійös да сэсся ставныслы висьталі. Матвей ді-нö муні: мися, Омельчук кöсйö юрös бергöдны, кутан кö пö ёнджыка кавгыны, трактор гусялігөн куті да, йöзыслы висьталі да. Матвейыд вомаліс на, омольджыка пö вомтö паськöдлы дай.

Та бöрын шуисны, войсяын пö меным уджавны оз позь, индісны весавны детсад дорысь лым. Сэні дас кык во уджалі пенсия бöрын на.

Тадзи со и олі. Бурыс и лёкыс вёлі тырмымён дай унджык. Габовса лёк вёчысьяс пиысь некод эз коль, да вермигён корсюрö кайлывлі мамөлөн гу вылö. Сійö кувліс сизимдасöд वोся август 25 лунö. Енмыс сетіс да, ме моз, гашкö, дыр жö оліс, но арся йиа ваö пыжысь путкыльтісны, да вермысьён на муніс миян дорысь мөдарьюгыдас. Господьöй-батюшкоёй, нелямын во нин колис!

Аттö öдйö жö кадыс мунö, омöлыс и бурыс. Öнiя олөмсö лёкөн шуöны, да кыті нö сійö лёк? Воддза моз йöзыд öнi оз тшыгъявны да мучитчыны. Сюрс сё майбырöй, лавкаö пыран да, видзöддан да, быдторйыс эм. Сöмын колö уджавны да олөм вылö коланасö ньöбны, а оз юны. А öд юöны. Босьтасны көпейка да сёян-юанөн пыдди лавкасьыд дозийөн петöны. Тшака-вотöса аръясын мыйта позьö нажөвитны, öнi вель донаысь примитöны да, а бара жö öд уналы вина медся муса. Луннас вотчöны, рытнас юöны. А сы пыдди эськö пызь ли песок мешöк ньöбны. Майбырöй, сетöны, оз талон серти юклыны, ставыс вольнöй. Кодлөн юр вежöрыс уджалö, оз лёка ов. Вотчасны да босьтöны оз сöмын сёян, но и бур паськөм, көмкот, телевизор, холодильник да весиг машина.

Вöрын олам да, пескыд кө абу, сійö мöй олысь? Ачыд эн ю да вайысьыслы душ-мөд доз пукты, со тэныд и тöвйымөн пес. Та ыджда посёлокыд абу вунöдөм Габов. Быдтор эм, сöмын юрөн ов.

Сёянсьыд мед дзиктö он жö ор. Водзті миян суседкалөн дөтинкаыс вöлі петас да шуö: «Бабушка, няньтортö вайышт, кынöмöй сюмалö. Бабушка, няньтортö вайышт!» Ми омöль олөм дырйиыс овлім да челядьысь нянь корөм эг тöддöй. Кыдзкö да мыйкö налы кынөмпөттö век корсьлім.

Ылөсас олысьясыд весиг картофелтьö тулыснас оз пуктыны, көть зэв жö ёна примитöны, тоннаясөн позьö вузавны. Коркö öтчыд Коля суседлы (шонъянöй абу нин ловъя) шуи: «Квайт ведра картофель колис, да сідз сета. Пукты, да арнас картофеля лоан, оз ков йöзлысь дзайгыны». Эз öд пукты, век юис да йöзыслы дөсадитчис. Тадзтö нö, дзик лэдзчысьöмнад, кызд верман овны? Водзын, Господьöй-батюшкоёй, тылатö вöлі пöрöдасны, сотöмасö, уна пöсь кисьтөмөн, ректасны, көдзасны да няньтö бугри босьтасны. Да ещö колхозыд мырддяс на да аслыс нуас. А öнi ставыс вольнöй! Турунтö көть мыйта пукты. Видз оз ков вöчны, сідзи эндö да вöрсялö. А водзті öд, гожөмбыд колхозыдлы пуктысян да, сöмын центнер турун и сетлісны. Та мынданад, дерт, скөттö төвйөдны он вермы. Ёль бокъяс да ольяс ытшкан вöлі да кытчөкö сайöдан, мед колхоз оз асав. Луннас колхозлы уджалан, а войнас аслыд, мед мөстö да ыжъястö төвйөдны, йöлаөн да вурунаөн лоны. Коркö öтчыд котөртлан да ытшкыштан, коркö мөдысь, таdzi жö куртан да меститан. Ме Öньдровка ёль бокась пуктысьлі. Дубраваясыс зэв ыджыдöсь вöліны да, гашкö, эз и тырны на? Гөгöрсыйс став вöрсö пöрөдісны, да öдвакö нин аддзан. Ёль пöлөныс мунөмөн сöмын позяс корсьны, но мыйла? Öнi туруныд, майбырöй, сикт гөгöрысь и сюрö, оз ков олясöд келавны. Ылі видзьяс вылын важөн нин пес шедмөн вөр. Дай оз нин миян моз гөрбуш косаөн копрасьны, а мыйөнкö да кокньөдчöны.

Габовысь Зимстанö лэччөм бöрын скöтсьыд, ыжъясьсьыд да порсьясьсьыд эг жö эновтчыв. Посёлок саяс небылын вöли ыджыд-кодъ нюр, да сэтысь и пуктыси. Көть дас тонна вöли пукты, но мен сы мындаыс эз ков, да и петкöдлынысö ылынджык. Эг кут вермыны да, сійö нюрас некод нин оз пуктысьлы. Да и Сухая речкаысь главнöй виддзöс, кытысь дас кык зэвгырысь юр шедывліс, ог тöд, кодкö пуктö ли оз. Ёна и вöчи ме сійöс, да бөр, көнкö, баддыс тыртіс. Том кө вöлі, эськö и öні скöтөн олі, да он тай босыт.

Тырöмаöсь нин и габовса муяс. Сэні ми колхоз дырйиыд нянь быдтылім. Куйöдалöмнад бур нянь воліс. А öні Керöсö каян муяс вылын ставыс рос.

Буракö, йöзыс öні асьныс россялöмаöсь, дышöдчöны. Водзті, колхоз дырйи, асывнас удж вылö мунтöдз тшакыдла котöртлісны, а öні лун шöрнас мунöны. Ельдöгла, матіас оз быдмы да, Грязнушкаöдз ветлісны, вöлөн быдсөн ваявлісны. Скöтыд сы гөгöрын жö оліс, да зэв бур туй вöлі. А öні пö, вöрсö пөрöдісны да, ельдöгыд оз быдмы, туйыс тупкысис. Сöмын Öндрей Öльöксан Вась батыслөн чöс туй вылöдзыс ветлö.

Ёна жö и зіль йöз вöліны. Иван Еле, Прокö дядьлөн гöтырыс, Грязнушкаö мöскысла ветлігмоз кыö вöлөм носки гоз. Мунігмозыс и кыö. А сёйö, вöлөм, куртігмозыс. Асьтö татшöматö оз жö ков жугöдны: водз и куліс. Сэтчö жö коньөрöс Прокö дядьö ой-ёй ёна нöйтліс. Сэтшöм тай мода сэки вöлі — бабаос нöйтны, көть нинöмысь абу мыжа.

Ен сетіс, ачым верми кутчысьны да овны, көть корсюрö юртö петляö жö суй вöлі. Челядь быдмисны, асланыс челядь да челядьныслөн нин челядь. Ола да нимкодяся, көть висьöмыд сідзи чабыртлö, мый көть кулыштöма да абу нин мучитчöма.

Ачымöс вида челядьöс, торйөн нин Васильöс, вывтіджык уджöдöмысь. Код сюра лешакыс тшöктіс сэки колхоз му шöрысь, борсьыс, зэв кузь да кыз пожöмсö пес вылö пөрöдны, дзоля мортсö мучитны? Матын вöлі да, көнкö, сійөн. Зэв лолöд пожöмыс вöлöма, öдва и оръясис. Мукöд кө, вөрö кайны тшöктісны да вöсньыдджыкъяссö пөрöдны-чинтавны. Мамö видіс да видіс, видіс да видіс: йöй Öдя пö, йöй Öдя. Он жö пö тадзи кагатö мучит. Збыльысь, гашкö, йöй вöлі, али олöмыс тадзи тшöктіс? Вывті биа сьölöмаөн, буракö, вöлі, мөд ногыс эг куж овнысö. Ачымöс эг жалит и челядьöс корсюрö вывтіджык кесйöді. А чöрс йыв перйöм бöрын кор вирöс вежисны, зэв небыдөн лои. Ставыс меным жальöсь, быдөнлы нбылыд кыв шуа, көть оз корны, мыйкö да сета сёянсьыд да көлуйсьыд.

Мöдар боксянь кө видзöдлыны, уджыс öд и мортнас вöчö. Эг кө челядьöс нинöмö кесйöдлы да нинöмö велöдлы, эськö нинöм эз и кужны, пыдди пуктана йöзнас эз и лоны. Эз эськö, гашкö, и прамöй гöтыр шедлы, да шань челядь лолыны. Торйөн нин бурмөдö сьölöмöс Васильöй, коді тай гижысьөн лоис да öні главнöй редактор районса газетын. Сійö зэв ыджыд сьölöмөн олö, да, гашкö, сійөн и ме дыр нин ола? Зэв шань гöтырöс пылы Енмыс сетіс. Лида — сійö сё матушка. Васильлөн Сыктывка-рысь Кулөмдінö локтөм бöрын лэччылі видлыны, кыдзи сійö артмөдчис редакциян. Яндысигмоз висьтаіс: көсья пö гөтрасьны. Мися, петкöдлы невестатö. Сійö пö, бара, оз лок. Эз и

удайтчы тѳдмасыны. Сэсся свадьба вылѳ корисны. Кутшѳм бара, мися, и гѳтырпуыс? Аэропортѳ меным воча вѳлі локтѳны да, мыйѳн матушкаѳс аддзи, сьѳлѳмѳс пѳсьѳ шыбитіс: мися, татшѳм мичаыс да статяыс эз жѳ мун Василь сайѳ, поводнѳй жѳ де-тинаыс да? Сьѳлѳмѳ первой здуксяньыс и пырис. Зэв мича да лѳсьыд баба. Василь первойсѳ юышталіс, да век чайті: мися, коляс, эновтас ѳвсьытѳмѳс. Век та йылысь и думайті, сійѳс и кывзѳ вѳлі пельѳй, оз-ѳ шуны: Лодыгин дорысь пѳ гѳтырыс пышійѳма. Тысяча матушкаѳй эз пышійы, век терпитіс. Ен сетіс, зэв лѳсьыда олѳны, кык пиѳс кок йылѳ сувтѳдісны. Мед ставыс налѳн бур лоѳ и водзѳ.

Енмыс меным отсалѳ, да мамѳй. Мамѳй меным кулігас шуис: дитяѳй пѳ дай нылѳй, тэ меным медся жалъ, зэв ѳна уджалѳмнад мучитчин да, йѳзыс пѳ зэв уна лѳксѳ тэныд вѳчисны да. Кор пѳ сьѳкыд лоѳ, казгышт, да век отсала. Збыль и отсалѳ. Сизимдас арѳснад картупель градъястѳ берта вѳлі, да ог и мудзлы. Ѳтнам ставсѳ пукта, ѳтнам ставсѳ мудъя. Мекѳд олысь сэки омѳля отсасис, ѳні, нинѳм нин ог вермы да, ставыс сы вылѳ усис. Бур морт вѳлѳма, оз эновт, тѳрасьѳ, пусьѳ-пѳжасьѳ, пывсянѳ даддѳн нулѳ.

А Енсѳ ме гортын узьтѳдлі. Сэки Наста да Марья дзоляѳсь на вѳліны, и ачым челядь жѳ. Кутшѳм воѳ, стѳча ог помнит, но вѳлі тѳвся рыт, пемыд нин. Мамѳ лэччис Вѳчѳ, челядь чукѳр колим ѳтнаным. Таркѳдчис миянѳ, кильчѳ ѳдзѳсѳ, морт. Мам шулывліс: кѳть пѳ сѳйны нинѳм абу, а вѳзйысьысь морттѳ шоныд керкаад век лэдзѳй. Ме и лэдзи. Видзѳда да, метра судта весиг абу. Лилипутъяс коркѳ Зимстанѳ волісны, на судта кымын и эм. Зэв лѳсьыд гѳгрѳс сьѳд тошка, нинкѳма, омѳлик шапкаа, киссьѳм купайкаа, пѳрысь нин. Комиѳн гѳгѳрвоыштѳ, а сідзсѳ, тыдалѳ, рѳч. Рѳчнас ме омѳля на мый гѳгѳрвои. Кыткѳ киѳн да кыткѳ вомѳн висьтасьѳмѳн тѳдмалі, мый локтѳ подѳн Вѳчсянь. Габовын уналаѳ нин вѳзйысьѳма, но некод абу лэдзѳма. Мунѳ водзѳ Дзоль сайѳ, Лупъяланъ. Вердышті сійѳс да паччѳрѳ лэдзи, мед шойччыштас.

Кильчѳтѳ вунѳма каличавны, да керка тыр йѳз локтісны. Тыдалѳ, тѳдтѳм мортыдлысь пырѳмтѳ аддзылѳмаѳсь. Ставныслы окота тѳдмавны, мыйсяма морт. Юасьѳны: «Бѳра кока ли абу?» Ме бара, мися, ог тѳд, бѳра кока ли абу, эг видзѳдлы; сѳйыштіс да тай паччѳрѳ кайис. А кадыс сэки вѳлі тшыг, дзик нинѳм аслыным сѳйны. Олісны бура дыр, интересуйтчисны, ваксисны-сералісны. Паччѳрѳдз весиг видзѳдлыны кайлісны, истѳгѳн дзиж-нитлісны.

Муналѳм бѳраныс дзоля мортыд и шуѳ: тіянѳ пѳ быд лун та мындаѳн волѳны, али меѳн интересуйтчѳны? Тэнѳ, мися, видзѳдлыны волісны, кильчѳсѳ вунѳді каличавны, да ыльѳбтісны. Мед пѳ интересуйтчасны да серавласны, сэтшѳм кѳ нин телепит.

Паччѳрын шонтысьыштѳм бѳрас ме вольсалі сылы гѳбѳч вылѳ. Сэки куш идзас перина вѳлі. Став бур кѳлуйсѳ тшыг воясад «сѳйим». Кутшѳм бурѳсь эськѳ дядлѳн, кыйсьысь мортлѳн, гѳн перинаясыс вѳліны да. Сьѳла-дозмѳртѳ куштѳмысь чуныясыд вѳлі дубавласны. Вѳчѳ лэччѳдлі кѳлуйсѳ вѳлѳн — сетлісны куим ли нѳль ведра картупель да кык ведра сѳю. Та мындыштатѳ

вайи, да мамө весиг бөрдис. Сэтшөм бур кык юрлөс да перина вөлі. А мөд перинасө мамө кодлыкө Дзолльö катөдліс.

Аскинас пывсян ломті, туй выв морттө пывсьөді да лунйыны тшөкті. Кильчө өдзөснымөс эг и восьтлы. Мися, бара тырыс локтасны да морттө дөсадитасны, некутшөм шойччөм оз артмы. Но пос помө вель унаөн жө чукөртчылісны да бергалісны.

Мөд луннас дзоля мортыд кайис Дзолльö. Ме сылы сеті купайка, көмкот, дзоляник гын сапөг, дядьöлысь шапкасө. Менө сійö эштис и пернапасавны, шуаліс став бур кывсө, шыльөдіс юрөс да окаліс плешкөс и ныр-вомөс. Но өд со мый интереснө. Дзолльö кайөма, пырөма Евсейö да бөр лоөма нинкөма. Евсейыд, ачыс висьтавліс, бара сылы ставсө сеталөма.

Думайта да, дзоля мортө ачыс Енмыс пөртчыліс, мед төдмавны, кутшөм йөзыслөн сьөлөмыс да лолыс. Сы серти и дон сетіс. Кодъяс серавлісны сы вылын, важөн нин ставныс лёк ногөн кулісны. Öтиөс гымньов лыйис, мөд караванка вылысь усис, коймөд джагөдчис. Эз лөсьыда и мукөдыс олөмсьыс мунны.

Öтчыд миян сиктын зөв өна гымаліс. Сэки гымньöлыс вөлі пыралөма скөтнөй дворө, сэсянь бергөдчөма да мунөма орчча керка пөлөныс дзоля конюшняö, кытысь виөма кык чаньөс. Сэсся пырөма ыджыд конюшняö, но вөвъясыс абу вөлөмаөсь. Конюшнясянь вирдыштөмөн швачнитөма Варламулө (эм татшөм ты — **авт.**) лэччанінын сулалысь зөв кыз да кузь ниа пуө. Вөжөдөма йывсянныс вужйөдзыс шөрипөв да пырөма муас.

Ок өна повзьөдліс менө гым-чардыд Мөскашорын олігөн! Картопель мудйигөн Вочладорсянь кыпөдчис зөв сьөд кымөр. Душ-мөд котыр нин и колис, да шуи помавны. А өна нин гымаліс да сявкйис. Көтөртны эськө, а йөйыд водзө кокася. Кыдз тай менсьым кокантө кисьым кватитіс! Быттö эз вөвлы! Сійөс и помнита, а сэсся нинөм ог. Палялі да, ачымөс шыбитөма вель ылө, а бура ыджыд мыр вөлі, да сквөзь вөжөдөма. Зэрөма и кобөма нин. Абу тай виөма гымньöлыс менө. Енмыс и видзис. Код нө сэсся? Василь шуалө, Енмыс пө абу, да өд вежөртас жө, гашкө, мый сійö эм да дорйö йөзлы бур вөчысьясөс. Көть тэныд лёк вөчөны, колө бур вөчны, да бурөн жө и бергөдчас.





Александр ЩАНОВ,
ленинград да волхов фронтъяс
вылын пехота ротаса вöвлöм командир

Салдатлы письмö

Пехота рота недыр шойчö öта-мöдсö вежысь, дугдывтöм ата-каяс костын. Салдатъяс кымынöдысь нин выль пöв лыддьöны сьölöмъяснысö шонтысь, гортсяныс воöм юөръяссö, гижöны асьныс, босьтöны ёрта-ёртныслысь адресъяссö, юксьöны медся гусяторнас. Мойвиас-ö налы аддзысьлыны тайö сьöкыд тыш бöрас? Кодлön нопъясаныс эм песлалöм көлуйыс, тэрыба пась-талöны сійöс: сöстöмнад и кувнытö лöсьыдджык.

Гашкö, и тайö салдат-сибирякыс лöньыштöм здукас корсис гимнастёрка зепсьыс карандаш пом да гижыштис асьыс мед-бöръя письмөсö. Сійö пуктис сэтчö став сьölөмсö, быттьö тöдис, мөд татшöм позянлуныс оз нин ло. Мичаа гижис тетрадь лист бок кыкнанладорас, зилис быд шыпас вылын. Салдат юөртис рöдвужыслы, мый ловъя и дзоньвидза, воуйтö, мый ставныс сылön ротаас геройяс, шань йöз, командирныс — зэв на том лейтенант, но повтöм и бур сьölöма морт — некодöс öбидаö оз сет.

«Талун,— гижö салдат,— ачыс полкса командир ошкис ротанымöс повтöмлунысь. Наградаяс, кызди и мукöд ёртъяслön, абуйöсь на. Но вот орёдам блокада кытшсö, мездам ленинградса пикö воöм олысьяссö, а сәні, гашкö, и войнаыс регыд помассяс, и ме локта гортö».

Сійö юасьö ставсö: кызди мунö уджыс колхозас, вермисны-ö идравны урожайсö, эштöдисны-ö выль мöс картасö, колисны-ö грездас мужичöйяс, а эз кө — кызди нывбабаяс, пöрысьыс да челядь вермисны гөрны-көдзны, пуктыны турун; көдзисны-ö шобдисö рас саяс, мыйджык да уна-ö сеталисны трудодень вы-лö... Салдат меліа шыöдчö гöтыр, Евдокия Семёновна, дінас, челядь, бать-мам, пöль дінас. Юасьö, ёна-ö нин быдмис Володя пиыс, ветлö оз велöдчыны. Казьтыштö, мый Вера нылыслы тырис нин дас кык да корö гöтырсö, медым сетас сылы нов-лыны асьыс гын сапöгсö. А кодöс ачыс война вылас мунтöдз новліс — сійöс гöтырыслы. Да... Ёна гажтöмтчис гортсьыс. Письмö помас, кызди овлö, ыстö копыр став рöдвужыслы,

быдөнös пасйö ним-вичнас, унаысь сывъялö ставнысö. Улиас кырымасьö: «Пыр кежлö тiян, Егор Тимофеевич».

Ыстö гöтырыслы сибирса ыли грездö. Но артмис сiдзи, мый письмöйс гортöдзис эз во. Гашкö, вопис войналөн сьöкыд туйяс вылын, а гашкö, пошта новлысь зонкаыс кöдзидсьыс турдö-мысь уськöдiс додъ вывсьыс письмö чукöрсö райцентрсьыс грездöдзис мунiгөн... Öнi тайös сьöкыд нин тöдмавын. Сöмын уна во мысти сийös аддзисны том следопытъяс да сетiсны военкоматö. Комын кык во (!) мысти... буретш Победа лун водзвылын военком ачыс вайис письмösö салдатлөн семьялы.

И со, салдатлөн дöваыс да ныв-пиыс (асьныс нин арлыдаös, семьяaös) лыддисны куим пельöса важиник письмösö. Найö тöдмалiсны сылысь дзеванiнсö да шуисны ветлыны геройлөн гу вылас. Локтiсны... локтiсны синва сорөн гижöм воча кывйөн.

Ми, сыктывкарса 36 школаса велöдчысьяскöд, суим найös братскöй воинскöй шойна вылын, ладогабердса Кобона сиктын. Вöли 1977 вося юнь, шондiа мича лун.

Мрамор плита вылын, багатыр кодъ сöветскöй воинлөн памятник водзын, видзвывса дзоридзьяскöд öтлаын куйлис целлофан пакетö бура гартыштöм конверт — салдатлы воча кыв, кодös сийö сэтшöм ёна виччысис нелямын коймöд вося январнас.

...Колö вöли аддзывны сийö здукас миян велöдчысьяслысь чужöмъяснысö. Быттö здукөн верстыаммисны: кодкö бöрдiс, кодкö аслысмоз мыйкö шöпкöдiс. Меным лои зэв сьöкыд, да кежи бокöджык: эг кöсйы, мед челядь аддзисны сийö сьöкыд лөөмторъяссö ас вывтiыс нуöm бöрдысь дзормöм ветеранös.

Водзын миянös виччысис «Дорога жизни». Ми мунiм, а найö — гөрбыльтчöм, кельдöдöм, но чужöм вылас томдырся мичлун сера дöваыс салдатлөн да ныв-пиыс — кольччисны. Кольччисны пукавны плита дорас... Найö малалiсны излысь шыльыд, кöдзид веркösсö, быттö кöсйисны инмöдчыны медся матыс, медся дона морт дiнас, кодi сетiс ассьыс олöмсö миян Ленинград, миян Победа вöсна.



Удмуртияса гижысь **Ульфат Шайхутдинович Бадретдинов** чужліс 1957 вося январь 21 лунö башкирияса Алтаево грездын. Кокъямыс класс помалом бöрын пырис велöдчыны Можгаса педучилищө. Сэні радейтіс волины литература кружокö, нуöдісны кружоксö проза гижысь Григорий Данилов да кывбуралысь Николай Байтеряков. Тайö жö воясас гижис медводдза висьтъяс, йöзöдісны удмуртияса газет-журналъясын.

Педучилище бöрын уджаліс школаын велöдысьöн. Армия бöрын бара локтіс школаö. Уджысь ородчытöг велöдчис Удмуртияса университетлön филология факультет вылын. 1982 воын пырис уджавны «Сöветскöй Удмуртия» газетö, а 1990 воын лoис том йöзлön «Инвожо» журналса главнöй редакторöс вежысьöн, сэсся вуджис «Кизили» челядьлы журналö. 1995 восянь — главнöй редактор. 2000 воын примитісны Россияса гижысь Котырö. Лэдзис некымын небöг, медясö челядьлы лыддьом вылö. Сылысь гижöдъяссö вуджöдöма татар, башкир, карел, мари, эстония кывъяс вылö. «Войвыв кодзулын» петавліс жö сылön висьт. А öні со вöзъям лыддьыны коми кыв вылын сылысь выль удж.



Ульфат БАДРЕТДИНОВ

Сюзь

ВИСЬТ

Сизим арöса писö Байтуган садъмöдіс водз асывнас. Сійö некыдз эз көсйы палявны, босьтчис няргыны:

— Вөрö талун ветлам, тэ вöv бöрсяыс видзöдны кутан. Меным век нин отсöг,— небыдика шуаліс батыс.

Пиыс вит арöсын нин медводдзаысь пуксьыліс вöv вылö. Сэксянь сійö зэв радейтіс верзьöмön рöдтыны еджыд бурыся Серко вылад. Кор детинка кыліс, мый вөрла мунöны вöлыскöд, пыр жö и нимкодълун шымыртіс. Но Ванюрка вольпасьсö эновтны эз тэрмась. Тайö нимсö зонкалы сетіс пöчыс. Байтуганлы сійö эськö эз во сьölöм вылас, но мамыслы паныд нинöм жö эз шу. Кор муніс пасйыны пи чужöм йывсьыс загсö, сэні нимсö гусьöн вежис. Гижисны Валерийön. Пасйöда кабаласö некодлы эз петкöдлы. Гöтырыслы та йылысь юöртис сöмын тöлысь мысти. Найö öтвылысь мöвпыштісны, мый писö кутасны век жö чуксавны Ванюркаön. Медым мамныс эз лөгась.

Ванюрка ассьыс збыль нимсö тöдмаліс сöмын школаö пырöм бöрас. Но ёртъясыс, олöмаджык йöз сійöс воддза моз шуисны Ванюркаön.

— Тэ тай век на абу пасьтасьöмыд?— недыр кeжлö саймовтчылöм бöрын бара пи дорас матыстчис батыс.

Зонка гөгөрвоис, мый батыс вочасөн кутас дöзмыны сылön нюжмасьöм вылö. Кор сійö кытчöкö тэрмасьö, век педзö. Оз

вермы видзёдны ньожмыда вёрысьяс вылад. Татшөм кадад бурджык тэрмасьыштны, медем батыс дзикөдз эз пузы. Паныд нинөм вөчны оз позь. Шуан кө мыйкө воча — ачыл мыжаөн колян. И Ванюрка босьтчис тэрмасигтыр пасьтасьны.

— Сөйтөгыд эн мун,— шуис мамыс, коді сөмын на вөлі лысьтөма мөссө.

— Кынөмөй оз сюмав да...

— Вөрө мунны сөйтөг ог лэдз,— Сяськабей, таdzi шуисны мамсө, матыстчис пи дорас да малыштіс юрөдыс.— Тшыгъялан, да эбөсыд сылө... На, мөс вөра йөвсө юышт. Ванюрка көсийс мыйкө паныд шуны, но кутчысис. Төд вылас уськөдіс батыслысь кывъяссө: «Мамыдлы өні оз ков нинөм воча шуны, сійө нөбасьө. Регыл тэнад чой либө вок лоө. Кывзысь мамыдлысь». И детинка юис быдса стөкан йөв да видзөдліс мамыс вылө.

— Тэ тай, пиук, зэв нин ыджыд,— вашмуніс Сяськабей.

* * *

Вөрсө, кытчө лөсьөдчисны мунны ая-пия, нимтісны Сарсазөн. Сэні быдмисны медсясө коръя пуяс. Коз да пожөм эськө тыдалісны жө да, но зэв гежөд. Тайө вөрас вөлі джуджыд да паськыл увтасін. Нимтісны сійөс Эгени увтасінөн. Висьталөны, мый коркө ьна важөн татчө вошлөма Эгени нима мужичөй. Увтасін пьдөсас быдмисны медсясө нинпуяс. Найө эз сетны чепөсийны мукөд пуяслы, тшөкыда вөлі быдмөны да. Татчө сиктсаяс эз радейтны воыны. Шуисны, тані пө век на шөйтө Эгениыслөн лолыс да повзөдлө йөзсө.

Нинпулөн өти горсий юнь төлысьын овмөдчис сюзь. Позсьыс сійө петавліс сөмын войнас. Регыдик вөрасьліс да бөр бергөдчыліс гортас. Тайө лэбачыс эськө мөдлаын пөжис колькъяссө, кытысь петісны сюзьяпьян. Отчыл войнас сійө лэбис сөян корсьны. Недыр мысти воис, а горслысь пыранінсө вөлі тупкөмаөсь нин. Кодкө кавшасьөма пу вылас. Гөна да руд. Сюзь гөгөрвоис, мый лектор суөма. Горзігтыр босьтчис лэбавны пу гөгөрыс. Отсөг вылө воис мөд сюзь. И кыкөннад повтөг нин уськөдчисны звер вылө. А сійө оз и пов. Вөркань кылө пөсь сөянлысь көрсө. Юрсө сүйөмөн аддзис сюзьяпьянтө да сөйис.

Шөгтө гөгөрвоөны оз сөмын йөз, но и лэбачьяс. Татөг эськө олөмыс эз мун водзө. Куим лун чөж сюзь лэбаліс, но сөмын сутш кежлө пуксьыліс шойччыштны. Сійө эз төд, кытчө асьсө воштыны. Пыралас горсьяс, а сэні некод абу. И бара лэбзяс водзө. Кытчө лэбө, ачыс оз гөгөрво. Сійө төдө нин, көні вөрканьыс олө, коді тай сылысь пиянсө бырөдіс. Кык пи сылөн быдмө. Найө весиг оз повзыштны на весьтөд лэбалысь сюзьясь.

Сюзь сөмын коймөд луннас казяліс, мый тшыг. Пуксис ув вылө, медем виччысьны войсө, да и унмовсис мудзвывьсыд. Вермас-ө сійө бурпөт узыны, сьөкыл висьтавыны...

* * *

Телегалөн өтмоза дугдывтөг дзуртөмыс быттө помасьлытөм сыланкыв. Ванюрка гоз-мөдысь нин вугыртліс тайө шы улас. Сөмын, кор айыс нем виччысьтөг горөдывліс вөв вылас, пов-

зьомысла садьмывліс. Байтуганлы дзикөдз дышөдіс кывзыны телегалысь дзуртөмсө. Пельыс съөдмис, пиньясыс весиг ныжмисны. «Неважөн на өд гөгыльяссө дьөгөдьөн мавтлі,— мөвпаліс сійөс вомгорулас.— Төрыт на эз дзуртны. Талун быттьө дөзмөдчыны босьтчисны. Тыдалө, көсйөны юөр сетны лесник Гарифуллалы, мый найө вөрө мөдөдчөмаось... Сё лешак, быдсямаыс жө юрад волө...»

Матыстчисны Эгени увтасінө. Гөгыльясыс, кылө, нөшта ёнджыка босьтчисны дзуртны. Байтуганлөн ставыс нин пытшкөссьыс орны кутіс. Эз сэсса вермы кутчысьны да сувтөдіс вөвсө. Быд гөгыль сюся видзөдліс. Босьтіс бедьтор, чуньыштіс өти гөгыль вылысь дьөгөдьсө да мавтышіс мөдөс. Тыдалө, артмис — эз тай кут телегаыс сэтшөма дзуртны-а.

Вөрлань мунысь туйыс быттьө орис. Водзө телегаа вөлөн он пысьт. Дзик восьсаинас вөвсө эз жө кут кольны. Пыртіс пуяс сайө. Дерг, вөрад унджык номыд да быдсяма мукөдпөлөс вир юысьясыд. Ньылөдөм вөв вылад пыр жө и самасисны.

— Вөвсө ме ог кут лэдзавны. Кос пестө өдйө чукөрта. Тэ, Ванюрка, вай вөтлав вир юысьяссө вөв вывсьыс.— Байтуган мыччис пиыслы нинпу лап. Босьтіс черсө да веськөдчис пес заптыны. Муныштөм бөрын бергөдчыліс да содтіс.— Эн пов, Ванюрка, ме ог ылө мун. Тэ пыр кутан чер шысө кывны.

Но өд номьясыд эз сөмын вөв дорө сибавны. Уськөдчисны и детинка вылө. Дөрөм пырыс весиг курччалөны. Вөв жө оз вермы өти местаын сулавны. Вөрө, бөжнас чуйдалө гут-гагсө, кокъяссө на лэпталө и. Но веж турунтө йирөмысь эз дугдыв.

Кор ланьтлас чер шыыс, Ванюрка пыр жө босьтчө отарөмөдарө гоньявны. Оз-ө кодарсянь кө айыс мыччысь?

Чатөртчөмөн видзөдывлө и пу туганъяссө. И нем виччысьтөг казяліс, кызд нинпу горсысь мыччысис лэбач. Тайө вөлі сюзь. Ванюрка весиг повзис. Сійө өд некор на эз аддзыв татшөм ыджыд лэбачсө. А синьясыс сылөн кутшөм гөгрөсөсь. Дзик кольча кодьөсь! Лэбзис, бордьяснас өвтчө, но шы оз кыв. «Та ыджада лэбачыс нө кызди пу вылас кавшасис?— мөвпалө детинка.— Медым розь писькөдны уна жө вын колө и! Со съөд ракаяс, кодъяс олөны миян град йөр сайын, быд тулыс позъяс лөсьөдлөны. Налөн эбөсыс оз тырмы пуад розьтө писькөдны...»

Айыс со мыччысис, ас вылас вайө пессө. Сувтыштіс да вашъялігтыр видзөдө пи вылас. Казяліс, мый быдтасыс повзьөм чужөма, да тэрыба воськовтіс телегалань:

— Мый нө, пиук, лоис?

— Ни-и-нөм..

— Мыйысь нө сэтшөма повзин?

Ванюрка оз видзөд ай вылас, чөв олө.

— Кодөс нө аддзылін?

— Зэв ыджыд лэбач дзик менам юр весьтөд лэбзис...

Байтуган вашмуніс да тапкөдыштіс писө мыш кузяыс.

— Вөрад лэбачыд уна. Найө йөзсьыд зэв ёна полөны. Эн пов, некод тэнө тані оз вөрзьөд.

Регыд мысти Байтуган бөр мөдөдчис пес чукөртны. Ванюрка кольчис важ местаас. А син водзас век кутіс лэбачсө, коді кывтіс енэжөдыс сы весьтөд: «Кытчө бара сійө лэбис-а? Мыйла өтнасөн? Айө кө эськө аддзыліс, висьталіс, коді сійө».

Байтуган кадысь кадö матыстліс телега дорөдз заптөм пессö. Сылөн дөрөмыс пөссыйс дзикөдз көтасьöма. А шондіыс пыр вы-
лөджык кайö да ёнджыка пөжö.

— Миянлы нөшта пахталка выlö кер колö. Пөчыд корис вай-
ны,— чөвтис пиыслы пөсьсö кымөс вывсьыс чышкалігтыр айыс.

Ванюрка төдіс нин, мый сійö пахталкаыс. Нинпуыс вөчöны
сійöс. Шөрсö ёсьторйөн гудйöны. Небыд пö нинпуыс, да абу сьöкыд
тайöс вөчнысö. Сэсся артмö гыр кодз дозмук. Сэтчö пөчыс кисьтö
нөк да гудралö. Сэсся вый ёкмыль артмö. Зэв чөскыд!

Айыс öні сюся видзöдаліс пуяссö, корсис пахталка выlö лө-
сяланаöс. Воськов кызь сайын татшөм нинпуыс быдмис. Босьт-
чис сійöс пилитны, но сувтөдіс пиыслөн ёсь горөдöмыс.

— Айö-ö! Тайö пусö эн вөрөд! Сэтысь лэбач петіс!

Байтуган эновтчис да матыстчис быдтас дорас.

— Мый нö тэ, Ванюрка, горзан? Ме жö тэкöд дзик орччөн...

— Айö... Эсійö ыджыд лэбачыс сэтысь петіс да лэбзис.

— Вөрөд горсья пуясыд уна. Лэбачьяс радейтöны пыравны
сэтчö,— зильö такöдны писö Байтуган.— Тайö кадö лэбачпияныс
быдмөмаöсь нин.

Сэсся водзö босьтчис пилитны бөрийөм пусö. Сійö абу сэтшөм
кыз. А пилаыс мыйлакö омöля босьтö. «Неважөн на быттö
лэчтылі да. Сэтшөм öдйö öмöй ныжмис?»— мөвпалö мужичöй.
Тайö каднас зэв уліті лэбыштіс лэбач. Байтуганлөн сьölöмыс
весиг ыркмунліс: «Но морöйд, мыйла нö сюзьыс таті лэбалö?»

— Со сійö! Со!— казяліс сюзьöс и Ванюрка. Сійö бара на
Байтуган весьтöд лэбис. Весиг лөкысь горөдіс. Йölöгаыс көнкö
ылын выль пөв на гөлөссö сетіс и. Кытчөдз нинпуыс эз пөр,
сэтчөдз сюзь лэбыштіс то ай дорөдзыс, то Ванюрка весьтöд.
«Мый нö сылы колö?— шензьö Байтуган.— Юнь помнас мöй
нö мөвпыштöма пиян лөсьöдны?»

Вөвöм горөдöмыс шай-паймунөдіс мужичöйöс. Видзөдліс те-
легалань — Ванюркаыс абу. Юрас вирдыштісны повзөдчана
мөвпъяс. Видзөдліс гөгөрбок да уськөдчис вөв дінас. «Кытчö нö
сійö воши?»— зэв ёна повзис Байтуган. Весиг эз тöд, кодарлань
корсьнысö уськөдчыны.

— Ва-нюр-ка!— лёкгоршөн горөдіс мужичöй. Телегаö тэчөм
керъяс костысь мыччысис детинкалөн юрыс:

— Ме öд тані, айö...

— Мыйла нö дзебсин?

— Эсійö лэбачыс дзик вöлі мелань лэбö. Көсйö кокыштны...

— Пиук жö эськö тэ да,— пыдісянь ышловзис Байтуган.—
Нинөм, быдсямаыс овлö. Сюзьыд эськö зэв полысь лэбач да.
Тэнö кокыштны оз лысьт.

— Сійö дзик ме выlö лэбис... Со и дзебси...

— Збыльысь мöй тадзи вöлі?— вашмуніс айыс.— Ме час
пессö тэча, да гортлань веськөдчам.

Сійö пукталіс телегаö вайөм пессö. Кадыс, тыдалö, öдйö лэ-
бис. Быттö весиг рөмдыштны нин босьтчис. Видзөдліс вывлань:
ни öти кымөртор абу. Шондіыс ылын. Лун шөр бөр на сöмын.
Другысьөн казяліс, мыйкö шондіыскöд лоöма. Быттö дзольмыны
син водзас кутіс. Пыр жö и юрас воис пöрысь йöзлөн вись-
талöмыс: «Коркö тайö югыдыслы пом локтас». Сэки Байтуган
эз эскыв талы. А öні со буретш тайö кывъясыс юрас воисны.

«Му вылас олöмыс кусас»— тайö мөвпсыс йирмөг босьтис, быттö вылас йиа ва койыштисны.

— Айö, мунам нин гортö. Пемдö со,— майшасьны жö кутис Ванюрка.

— Мунам, пиук, мөдöдчам.

Вөр вылас рöмыдыс усис нем виччысьтөг. Он гөгөрво, кытисьянь воис. Шондйслөн джынйис кольöма. Быттö съд рөм сёйö сйöс. Мый нö сыкөд лун шөра луннас лоöма?

Байтуган да Ванюрка веськөдчисны гортланыс. Кор петисны вöрысь, на весьтöд лэбзис сюзь. Синъясыс сылөн лёкысь öз-йисны. Повзёмысла Ванюрка весиг синъяссö тупкис. Дыр-ö тадзисö мунис, ачыс оз тöд. Восьтис синъяссö да гөгөр пемыдсыс-пемыд. Тöвру мыччысьöма. Вöлыс сувтöма. А енэжса шондйис дзик съд...

* * *

— Мыйла нö найö та дыра оз локны? Вошины али мый нö вöрас? И луныс кутшөмкө аслыспөлөс. Пажын бöрын пемдыны нин кутис. Олöмыслы пом лоö али мый нö?— Сяськабей ветлөддис öтарö-өмөдарö, эз тöд, кытчö кутчысьнысö.

— Эн сэтшöма, Сяськабей, майшась, воасны öд. Оз позь тэныд öнi... Асьтö видзны колö,— зильö съөлөм сетны моньыслы верöсылөн мамыс.

— Видзöд, ывла вылыс дзик нин пемдiс. Мый нö тайö татшöмыс?

Марпа оз тöд, мый Сяськабейлы и шунысö. Ачыс та вылö шензё. Мыйта нин олö, а татшөмторсö эз на аддзыв. «Збыльысь мöй нö шондйис чусмас? Мыйла нö сйö шом кодъ съд?»— тайö юалöмъясыс оз пышйыны олöма нывбабалөн юрысь. Но та йылысь Сяськабейлы оз висьтав.

Керка пытшкын дзикöдз пемдiс. Весиг сёр арнас öнiя серти югыдджык овлö. Марпа босьтчис вомгорулас молитва лыддьыны. А Сяськабей öдзөссö восьтис да шытөг воськовтис кильчö вылö. Недыр мысти кылис лёкгоршөн горөдөм:

— Ма-мö!

Марпа усьö да чеччö уськөдчис сы дорö. Синъясыс нинөм оз аддзыны. Сяськабей оз тыдав ни.

— Сяськабей, көнi нö тэ?

— Мамö...— моньыслөн гөлөсыс муртса кылыштö.

— Мый нö лоис?— Марпа аддзис му вылын куйлысь моньсö.

— Вильдi, ме... уси. Ой, морөс улöй доймö... Ой...

* * *

Шондйис босьтчис мыччысьны съд гөгыль сайсянь. Сйö посни челядь моз первойсö сутш кезлö петкөдчылис, быттö тöдмавны мыччысьлис, корсысьöны оз сйöс. Сэсся дзевассыс босьтчис повтөг нин петны. Байтуган неуна успаньыв пуксис, видзөдлис пи вылас.

— Тэ, Ванюрка, шондi вылас дыр эн дзоргы, синтö сёяс,— олöма йöзлысь шуөмторсö öнi висьталис сйö пиыслы.

Грезд дорö матыстчигөн найö кутисны нин кывны шондйлысь пöсылунсö. Вöлыс чорыд туй вылö веськалөм бöрын öддзөдiс

воськовъяссö. Со и налön керкаыс тыдовтчис. Сöмын тай забор öддзöсьяссö некод оз восьтав-а. «Оз мöй найö миянös виччысьны?»— шензö Байтуган. А Ванюрка лэччис телега вылысь да тэрыба котöртис öддзöссö восьтны. Тайö каднас батыс видзöдліс öшиньясö, вöв гидö, некод оз тыдав. Вöвсö лэдзавтöг и пырис керкаас. Бара жö некодös эз аддзы да петіс ывла вылö. «Көнös нö ставныс?»— ассьыс да Ванюркалысь гораа юасис сійö. Пиыс эз вочавидз. Сöмын чужöм вылас вежсис. Пывсян дорö матыстчигön зурасис мамыскöд. Буретш сэтысь вöлі петö.

— Мый нö, мамö, лоис?— видзöдліс Байтуган мамыслön вирöсь ки вылас.

— Ветлы да самöварсьыс пöсь васö вай,— корис мамыс, сэсся ышловзöмön содтіс.— Миян нöшта öти пи эм...

Тайö кывъяссьыс Байтуган нёнпом чибук моз чеччыштіс да котөрön уськöдчис керкалань.

* * *

Пахталкасö вöчны Байтуган петіс водз асывнас. Сынöдыс абу на доналöма, ыркыдінад позö кокныдджыка уджавнытö. Бöрас жар лоö. Нинпу керйысь горсö сійö сöмын öні казяліс.

— Таті пилитны ковмас,— аслыс шуис мужичöй.

Босьтчис пилитны, да пиньясыс пилаыслön гөнösь лоины. «Мый нö тайö?— шензис Байтуган.— Сюзьыслön позйыс али мый нö тані вöлöма?»

Пилитіс мöдлаті. Горсйыс коли чуркаас. Эз вермы кутчысьнысö да поткöдіс сійös.

— Сöтанаыд! Сюзьыслön пи вöлöма,— гыжъявны кутіс юрсö Байтуганыд, оз тöд, мый и вöчны. Ванюрка садьмытöдз колö кытчöкö тайös шыбитны.

Сідзи и вöчис. Босьтіс да шыбитіс кулöм сюзпысö петшөр пöвстö. Сьöлöмыс дількуні, да пахталкасö эз и кут вöчнысö.

* * *

Питöгыс кольöм сюзöс тайö войнас мöд ускötтьö суис: некодös сёйöм вылö эз сяммы кутны. Вөр бокö воом бöрын пуксис нинпу вылö да унмовсис. Вöтнас бара паныдасыліс пиыскöд. Сійö пыр горзіс, чуксалис отсöг вылö. Кöсийö лэбны да оз сяммы, бордясыс вынтöмösь на да.

Сюзь садьмис, сьöлöмыс мыйыськö повзöма. Видзöдліс гөгөрбок — некод абу. Кутшöмкö вын кыпöдіс сійös сынöдö и нуöдіс муяс весьтöд вöртас сайсянь мыччысьысь шонділань. Водзын, му вылын, тыдовтчис сьöд ёкмьль. Сійö вöлі зэв ыджыд. Оз вөр, быттö куйлö му бердас топöдчöмön. Сюзь гөгөрвоис, мый сійö матыстчö грездлань. Тöдö, мый тані олöны йöз. Öні, асьяывывнас, найö узьöны на. Кытшовтіс грездсö, пуксис öткөн сулалысь сирпу вылö. Сійö быдмö Байтуганлön йöрын. Мыйла буретш татчö вайöдісны сюзöс бордясыс? Сійö ачыс эз гөгөрво.

Лёкысь горöдіс петук. Сюзь повзис, но эз лэбзы. «Мыйла нö татшöм гораа горöдісны? Гашкö, мыйкö лоис? Гашкö, сэні менам пийö?»— сійö лэбзис вöвлöм оланінлань, кытісянь кыліс петуклön горöдöмыс. Кыдзи веськаліс пытшкösас, ачыс эз

гөгөрво. Петук, чипангяс, уткаяс лёкысь босьтчисны горзыны да котравны. Ставыс гудыртчис. Сюзь некодос эз вөрзёд, өдйө петис да некытчө пуксьывтөг лэбзис вөрлань.

* * *

— Байтуган! Байтуган!— горзис Марпа. Сылысь гөлөссө кылөм бөрын чайтан, мый кыткө öзйөма. Сэтшөм весьөпөртана чилзис.

Байтуган пукалис пызан сайын да тшай юис. Кылис мамыслысь лёкгоршөн горөдөмсө да ньөв моз уськөдчис ывла ывлө.

— Мый нө, мамө, лоис? Мый нө татшөм лёкысь горзан?!

— Кутшөмкө звер став чипангяссө ви-и-ө-ма!— дась вөли бөрддзыны шогысла олөма нывбаба.

Байтуган пырис вөв оланінас. Аддзис куйлысь петукөс да гөгөрбок видзөдліс.

— Чипаныс ни öти эз коль али мый?— юалис мамыслысь сійө.

— Э-э-э!

— Весиг гөнтөр оз тыдав. Кытчө нө найө вошины?— аскөдыс сёрнитігмоз Байтуган кавшасис йирк ывлас. Пемыд пельөсысь казялис чипанөс.

— Öти сюри! Ловъя!

Пажынөдз асланыс дзебсянінысь петісны и мукөд чипангясыс. Найө, тыдалө, эз на гөгөрвоны, мый колины петуктөг. Сылөн сьөлөмыс потөма сюзътө аддзөм бөрын. Сійө өд чипангясысь өна пöрысьджык вөли. Со и лёктор лои ськөд сюзълөн нем виччысьтөг мыччысьөмсьыд.

Байтуганлөн видзөдласыс зурасис сирпуө. Зэв тшапа сійө сулалис йөрас. Тайө пуыс — на рөдлөн кевмысянін. Быттьө видзө налөн рөдлысь вынсө, сы отсөгөн жрецгяс шыасьоны Ен дорө. Пу гөгөр сөстөм, ставсө идралөма, пелькөдөма.

«Войнас вөв оланінас эз-ө сюзъыд волы?— тайө мөвпсьыс Байтуганлы эз ло лөсьыд сьөлөм ывлас.— Сійө водзөс кө мынтө аслас пиысь-а?» Мужичөй матыстчис петшөр чукөрлань, кытчө шыбитіс сюзпылысь шойсө. Сэсса корсис косджык места, кодйыштис гутор да дзебис...

* * *

Скворечьяслы витөд поз нин вөчө Байтуган. Öти луннас. Пилитө, черөн лөсалө, мөлөтөн тотшкөдчө, а юрас öти пөлөс мөвпгяс гудрасьоны. Ставныс ичөт пи йывсьыс. Сылы өд вит арөс нин тырис. Зэв визув да, Ен ськөдөн, дзоньвидаза. Но оз сёрнит. «Мыйла нө тадзисө лоис? Эг кө эськө ме сэкинад пөрөд нинпусө, гашкө, мөдногөнджык лоис менам пиуккөд? Ванюрка өд оз лэдз вөли пөрөднысө. Эг кывзысь со. Пахталкасө кө нуа вөрас да сэтчө коля?» Со татшөм мөвпгяс новлөдліс юрас Байтуган. Унаысь төд ывлас уськөдлывлө, кыдзи сэкинад вошлі шондіыс. Мый водзын кө өд саймовтчыліс жө сійө? Ичөт писө нулісны орчча сиктгясса төдысьяс дорө. Быдөн ас ногыс висьтавлісны, мый водзөсө лоө. Öтияс сьөлөм сетлісны, мый детинкаыс сёрнитны кутас. Мөдгяс шулісны, мый татшөмөн и коляс. Кодлы и эскынысө?

Байтуган, кор гөгөрвоис, мый пиыс чужөма немөйөн, быд

лун кевмысис сирпу дорын. Сійö весиг шыöдчывліс сюзь дорö, кодлысь писö виис, прöща сылысь корис...

Ичöт пиис, Микаль, матыстчис ай дорас. Байтуган весиг эз казав. Бергöдчис — сы водзын Микаль вашгялö. Мужичöйлөн став жугыль мөвпгясыс жбыркнитісны-лэбзисны юрсыс. Байтуган петкөдлö пиукыслы вильöн вöчöм сквореч позсö:

— Мичаа артмис?

Детинка чургöдö певсö да гогйöдлö юрсö.

— Ыджыд певтö нин со петкөдлан? Аддзылöмыд кыскö... Ставсö öд тэ гөгөрвоан.— Байтуган сывйыштис писö.

Дыр на эскö тадзи сулалісны ая-пия. Эз кө...

— Айö-ө!— гора шысыс Байтуганлысь кок сөнъяссö быттö ородісны. Пельясыс оз эскыны, мый тайö Микаль шыасис. Айыс шензёмөн видзöдіс быдтас вылас, а мöдыс индö кытчöкö. Бергöдчис — сирпу вылад сюзь пукалö!

— Айö!— бара горöдіс Микаль.

Тайö здукас сюзь кыпöдчис, кытшовтіс керкасö да лэбзис вөрлань.

— Аттьö, тэныд, сюзьöй,— вашкөдіс мужичöй. Сингясыс вазисны...

* * *

Пахталкасö киняулас топöдöмөн Ванюрка пöль веськөдчис клубань. Орччөн пöльöн шуысыс восьлалö. Грездын куимсё во тырёмсö пасйöмөн клубын котыртöны важ көлуй, доз-мукъясысь выставка. Детинкалөн корём серти Ванюрка тшöтш жö мөвпыштис мыйкö вайны сэтчö. Сійö, дерт, тайö пахталка йывсыс уна вермас висътавы. Кыдзи шондіыс бырлö, нинпу, сюзь, немöй Микаль йылысь. Нöшта унатор на олöма мортлөн син водзас сувтö...

Удмурт кыв вылысь вуджöдіс

Алексей ПОПОВ.

ПЫДДИ ПУКТАНА АВТОРЪЯС!

Редакцияö гижöдъяснытö ыстігөн быть колö юртны:

1. Ассыныд ним, вич, ов; кор да көні чужлöмныд (лун, тöлысь, во).
2. Паспорт юръяс: номер, серия, кор да көні сетісны, гортса адрес (прописка серти).
3. Индивидуальной налогöвöй номер — ИНН (кодлөн эм).
4. Страхöвöй свидетельство номер.

Тайöс юөрттöг редакция гонорар оз вешты.

*Журналын йöзöдтöм гижöдгяс
редакция оз рецензируют и авторыслы найöс оз мöдöд.
Редакция оз век во öти кывйö авторгяскөд.*

Комп. набор и верстка **Н.Кузнецова.** Корректор **Т.Югова.**

Адрес редакции: 167982. ГСП-2, г. Сыктывкар, Дом печати, каб. 202.
Телефоны редакции: 24-47-52 (гл. редактор), 24-51-52 (общ. отд./факс).

E-mail: kodzuv@mail.ru

Подписано к печати 14.04.2010. Формат 70х108^{1/16}. Печать офсетная. Усл. печ. л. 7; усл. кр.-отт. 8,4; учётно-изд. л. 7,54. Тираж 997. Заказ № . Регистр. *ПИ № ФС 3 - 0226*. Публикация материалов по освещению реализации социально значимых проектов осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Кировская областная типография», 610000, г. Киров, проезд Динамо, 4.